

KHANGHAM SABBATH SCHOOL
LAISIANGTHO SINNA

KORIN MASA LEH NIHNA

Adenilton T. de Aguiar

ရေးသားသော

1 and 2 Corinthians

စာအုပ်အား

သိက္ခာတော်ရမ္မဆရာ ဦးမိုးခိုင်ငိုခေါ်နန်မှ
တီးတိန်ချင်းပြန်ဆိုသည်။

July, August, September
2026

Sabbath School Lesson
တီးတိန်ချင်းဘာသာ

ထုတ်ဝေသူ
ဦးမိုးမိုးလှ (၀၀၅၈၉)

ဥက္ကဋ္ဌ
မြန်မာပြည်သတ္တမနေ့ဥပုသ်အသင်းတော်
၆၈ ဦးဝိစာရလမ်း၊
ရန်ကုန်မြို့

ပုံနှိပ်သူ
ဦးမောရစ်ချစ် (၀၀၃၅၄)
မန်နေဂျာ
ကင်းစောင့်ပုံနှိပ်တိုက်
၂၀၆ ရွှေသစ္စာလမ်း၊ ရန်ကင်းမြို့နယ်
ရန်ကုန်မြို့

အုပ်ရေ ၁၂၀၀

ဓမ္မဒါန

ပထမအကြိမ်

ASUNG A OM THUTE

01. Corinth ah Paul' Pasian Nasepna (June 27–July 3)	7
02 Singlamteh' Thupuak (July 4-10).....	18
03 Christ' sungah Kipumkhatna (July 11-17)	30
04 Pawlpi Sungah Mawhna (July 18-24)	41
05 Na Khempeuh Pasian Minthanna ding (July 25-31)	53
06 Khalam Silpiak (August 1-7).....	64
07 A Kibang Itna Khat (August 8-14)	75
08 Christ' Thawhkikna Vangliatna (August 15-21)	86
09 Itna in Nasem sak (August 22-28)	97
10 Christian Citakte Pasian' Nasepna (August 29-September 4)	108
11 Kepcinna leh Mission (September 5-11)	119
12 Kamsang Zuaute tawh Kizopna (September 12-18)	130
13 Hehpihna, Itna leh Kikhawlhpihna (September 19-25)	142

Christian Nundan leh Tecipanna A Thupaipi

Lai kikhak nasep pen sawtvei pi hikhin napi bei ngeilo hi. A lai kikhak dan kikheel suksuk bek hi. Tua hi a, mipi thu kizaksakna (social media) in laidal thuthang (ᄇᄇᄇᄇᄇ) khenggawp ta hi. Bangpeuh hitaleh a thupaipi in email leh khuaphia laikhakna teng zong, a nasepdan uh kibang veve a, theihhuai thu, lungsim leh ngaihsutna tawh kizopna omsak thei veve hi.

Mihing te banghang in lai kikhak hiam? Dawn pakna khat in gennop nei uhhi cih ahihi. Sawltak Paul zong tua mahbang in gen ding tampi nei hinapi'n; a hopihnop mite tawh maitang kimu theilo citciat uhhi.

Tua ahih manin in Corinth mite bangpen laikhak a, tua laikhakte sungah thumaan thuthukpite om hi. Tuata lakah “*Note kiangah ka om laitak in singlamteh tungah Zeisu Christ a sihna simloh thudang peuhmah ngaihsut loh dingin ka ngaihsutsa ahihi*” (1 Cor. 2: 2). “*Topa Zeisu zong hau mahmah napi in, Ama' zawwna tawh note mihau nasuah theihna dingin; note hangin mizawng in hong kibawl*” (2 Cor. 8: 9). Tua banah itna a kiphuah lagui khat zong 1 Cor. 13 sungah om hiven.

Thukhat panin zong, Paul' laikhak a simkha peuhmah pen a lungsim uh buaithei mahmah ding uhhi. Pawlpi sunga buainate; zualzangna, pawlpi mite lakah kithutuahloh na hangin pawl kikhenna cih khawngpeuh om bialbual hi. Nangma pawlpi sungah tua bang peuh omtuak nasakleh; Corinth mite laka kinialna teng Paul in a vensakna teng sim dingin na kithawi khol in. Na pawlpi sunga buaina tepen hong cihtaak lo khathei sop ding hi. Corinth mite lakah suksia mahmah ahihlam namu zaw ding hi.

Corinth mite' buaina teng in lungsim hong buaisak zo mahmah a, Corinth mite tungah laikhakte in zong lungsim lazo mahmah hi. Amau' lakah thubuai hang hizawlo a, Paul in a talsik dan teng lungluthuai zaw hi. Pawlpi mite in amau mahmah, a gamtatzia leh a kimkot a mite ngeina teng pen Zeisu' lungdamthu tawh sittel dingin hanthawn a, Singlamteh thupuak

mahmah pahtawi hi. Paul kammal mahmah zatsak lehang, lungdam thu sangin dinmun a niamzaw thupuak khat peuhmah peh “*anathema (samsiatna)*” (*Gal. 1; 8, 9*) ahi hi.

Paul’ hunlai in, Corinth khuapen hauhna leh vanzuakna, tembaw khawlna, khut siamna, tembaw lamna leh beelsekna ah minthang mahmah hi. A khuapi mahmah zong sum phualpi khat ahi hi. Tua kawmkal mahah zualzangna, biakna kihelzau ziazua in pasian tuamtuan te biakpiakna taattungte zong om hi. Corinth khua sung nisim nundan pen milim biakna in minthang vangvang hi. Hih taang ngeina pianpih teng hangin; Paul in Christian te a dingin Paul’ ngiimna bulpi leh amau a hanthotna teng zong hong telsak tuam zaw ding hi.

Tu quarter sungteng, Corinth mite tungah Paul’ laikhak teng encian ding hihang. Hih laisiangthothak laibu nihte sungah, Sawltakpa in Christian nundan leh teci panna thu paipi ahi lungdamthu hong piakhia a; tuapen zongin na khempeuh etcianna limlang tawh kibang hi. Vantung lam zuan khualzinna lampi ah eimah mimal ihi a, pawlpi tawh ahi zongin bangpeuh tuak taleng – a dawwna pen ahihleh Corinth mite sungah Christ a dingin nasepna tengmah hong hi ding a: “*Singlamteh tungah Zeisu Christ a sihna*” (*1 Cor. 2: 2*) mah hibek hi.

Zeisu hong paibaih ta ding hi. Tuhun pen Christ sungah ki pumkhat semsem ding; nidang sangin Khasiangtho sangzaw semlai ding; kha silpiakte peuhmah kuhkal takin zangsiam ding; a thokik i Topa tawh a thukzaw in kikhawlh ding hun ahi hi. Christian Pasian nasepna citak sep ding hun, kepcinna leh mission nasepna, kamsang zuaute tawh khalam kidonna, hehpihna, itna leh kikhawlhna sungah khantoh ding hun ahi hi. Singlam- teh’ thupuak leh Corinth mite tungah Paul’ laikhakna tawh a thuhilhna te kiptakin letkip hun ahi hi.

Adenilton Tavares de Aguiar, PhD, in, Brazil gam, Bahia gamkee Cachoeira khua Northeast Adventist College ah Laisiangthothak lethkhatna lamah professor hi a, 2010 kum panin tuni ciang dong sem gige lai hi.

Lesson 1

June 27–July 3

CORINTH AH PAUL’ PASIAN NASEPNA



SABBATH NITAKLAM

Tukalsung Simding: *1 Cor. 1:1; Gal. 1:1; Sawl. 17:16–34; 1 Cor. 5:9–11; Sawl. 18:4–10; 2 Cor. 2:4.*

Kamngah: Zankhat Paul in maangmu a, a maang sungah Topa in, “*Lau kei in, lung kia kei inla, na thugen zom in. Hih khuasungah Keima’ mi tampi om a, zong hong ompih kahih manin; kuamah in nang bangmah hong cihlo ding hi*” a cihhi (*Sawl. 18: 9, 10*).

English minam missionary lianpa William Carey in, ama’ nuntakna dingin khedap khuipa ahihhang, a naseppipen in kha hotkhatna hi cihhi. Tua mahbang in Paul zong puan -buk bawl tawh nungta (*Sawl. 18: 1-3*) a; a nasep taktak ahihleh Christ kiangah mite paipihna ahi hi.

Tukal in, Corinth khuapi ah Paul’ Pasian’na asepna teng en ding hihang. I muh ding tengpen, tua pawlpi in; buaina tawh kidim bialbual a, kum tulnih khit tuni a ei’ buai nate tawh a kibang mello zong tam hi. Kum bangzah hiam khat Christian hihkhit, pawlpi sungah na a semkhinsa khat a dingin dotna khat: Christian kipawlina limlim buaina nei ngeilo a omngei hiam? A dawn na’ng bel kitelcian lel hi.

Paul in Corinth ah zong tua bangte phukha khin ahihhang Singlamteh thupuak (*1 Cor. 2: 2*) tawh naphu hi. Tuni a tona te peuhmah tua thupuak tungah cihtakna bektawh maingat ding hihang. Tu quarter sung, 1 leh 2 Corinth sungpan i muh thupuak teng peuh mah eima' nunna sung zatttheih sawm ding hihang.

SUNDAY

June 28

Paul, Pasian Sapsa Zeisu' Sawltakpa

Paul in Corinth mite a laikhakna kamhonna in, amah Zeisu' Sawltakpa dingin "*Pasian in a hong teel*" (*1 Cor. 1: 1; 2Cor. 1: 1*). A laikhakte kamhonna ah, tawmno khat cih lobuang, a vekpi phial mahin Zeisu tawh kipawlna vive mah ahihlam amah kiteelcian a hih manin tuabang danta in kam a hong hi.

1 Corinth 1:1 leh Rom. 1:1 simin. A thupi mahmah bang thunih pen Paul in a Pasian'na sepna sungah bulphuh phadeuh hiam? (*Gal. 1:1 enkak in*)

Paul in sawltak dingin amah a kiteelna pen Pasian' deihna cih. Mihing maimai teel hilo a, Pasian ngiatin a teel cih telcian hi (*Gal. 1: 1*). Jeremiah mahbang in Paul zong Pasian in anu' naubu sungpan a teeltuam hi a (*Jer. 1: 5*) Pasian' hehpihna hang (*Gal. 1: 15*) hi a, dawibia minamdangte lakah Christ' lungdamthu tangko ding ahihman ahi hi.

1 Corinth. 15: 8 sungah, Paul in, ama kiangah Christ in a thawhkik khit ciangin hong kipulaak (*1Cor. 15: 5-7*) cih. Tua khitdeuh ciangin zong amah akiteeltuamna pen Zeisu tawh maitang kimuhna pan hi cilai hi (*1 Cor. 15: 9-11*). "*Zeisu' sawltakpa*" cih in ngaihdan tampi huam hi. A neupen in Zeisu in sawl ahihna hong lak hi. Hih kammal teng mahtawh Zeisu' sawltakpa ahihna (*Rom. 1: 1; Titus 1:1; Gal. 1: 10*); thuhilhsia leh lai hilhsia (*1Tim. 2: 7; 2Tim. 1: 11*) Paul in pulak den hi. Thu ahilh a lai ahilh zongin, Christ a ding hiden zaw hi. Tomgen leng Paul in Zeisu' sawltakpa ahi hi.

Zeisu in, Paul Sawltak ahihna thu laigil; Paul' nundan thu laigil ahi hi. Paul' ngaih sutna leh lungsim khempeuh sungah Zeisu tawh kidim hi. Zeisu pen tuabang ahihna thu 1Corinth a thupatna lungdamthu a sunna ah kuavei bang gen hi. Paul in Zeisu a itzia pen tatsatlo in Zeisu ngaihsun in a thu gengen hi. Ama' cinlehkep sunsun te in Christ-bulphuh nundan a neihtheihna dingun Zeisu hawmsawn nuam hi. Amah pen Sawltak dingin a kiteel ciangin; amaute zong Topa' sapna om bangbang in a citak Zeisu' nungzuite hiding in a kizam ahi uhhi.

Paul pen Sawltak dingin kizam hi. Nang bang dingin hong kizam a, nang hong kisapna na koici theih hiam? Tuabang khatzong a om keileh; Pasian tawh na tonkhawpna ah bangpeuh kikhial kha hiam?

MONDAY

June 29

Athens pan Corinth ah

Sawl. 17:16–34 simin. Corinth a paima in Paul koiah om a; bang hih hiam?

Sawl. 17:16–34 sungah Paul in Corinth a paima in Athen mite tungah thuhilh cih. Tualai in Athen ah pai ding geelna bangmah a omloh hang, Berea mite langdona phukha vat ahih manin, a lawmte huhna tawh Athen paikha vat hi (*Sawl. 17: 13-15*).

Timothy leh Silas tegel in Paul tawh kikhawlta dinguh ahih manun; Athen ah Paul a paipih teng un Berea ah a kileh uh hong kulta hi (*Sawl. 17: 15*). Sawltak 17: 16-34 sung ah Paul in amau ngakin a omsung teng a nasep teng om hi. Biakinn sungah, khuapi tual sungah leh Areopagus cihte ah Zeisu thu gen hi. Zeisu' thu gen khawl thei hetlo a, tua bang ahih theihna dingin hunlem a ngah bangbang in zang hi.

Sawl. 18: 1–11 simin. Paul in Corinth vatung in a taam sungteng tawntung bang hih hiam?

Paul in a khualzin nihveina ah Corinth ah vapai hi. Tualai ah Paul kumkhat leh a lang taam hi Luka in cihhi. Ama' ngeina ombang in, Paul in a Pasion'na sepna pen biakinn sungpan in kipan hi (*Sawl. 18:4-6*). Sawltak 17: 1, 2 in tuapen Paul' ngeina naci hi. Zeisu in zong a nungzuite a thupiakna (*Sawl 1: 8*) ombang in; Paul in Jew mite masak hi (*Rom. 1: 16; Sawl 13: 46*).

A nunung penin Corinth panin Silas leh Timothy tegel in hong pawm uh a, tua ciangin “*Paul in ahun neih khempeuh thuhilhna in zangin, Zeisu pen Christ ahi hi ci in Jew mite kiangah teltak in a gen hi*” (*Sawl. 18: 5*). Corinth ah a taam sung tawntung “*Pasian' thu hilh*” in manlah mahmah hi (*Sawl. 18: 11*). Hihthu tawh kipawl in Paul in kiteltak in a pulak thu in “*singlamteh tungah Zeisu Christ a sihna thu simloh, thudang peuhmah ngaihsutloh dingin ka ngaihsutsa ahi hi*” (*2 Cor. 2: 2*) cihhi.

Athen khua leh Corinth khua ah Paul' khualzinna tungtawn in hunneih khempeuh Pasion' thu gen ding koibangin hong hilh naci hiam? Zeisu' thu mitung ah na hawmsawn theihna dingin nahun hoih koibang in zangthei ding nahi hiam?

TUESDAY

June 30

Corinth Khuapi

Sawl. 18:1–3; 1 Corinth. 5:9–11 leh 1 Corinth. 8:4 simin. Corinth khuapi sumbawlina, mihingte omzia leh biakna lam na koici muh hiam?

Corinth khuapen a sumbawlina leh a hauhna tawh tanglai in minthang hi. BC 146 kum in Rome mite in susia uh a; 44 BC ciangin *Julius Caesar* in Rome gamhuam dingin lam kik hi. Laisiangthothak sungah hong kidawk penin hih Rome mite Corinth ahi hi. Paul hunlai in Corinth khua pen Athen tawh tungnun a kituh kinken uh hi a, a tungnun zawkna

mun tampi om hi. Corinth in vanlei vanzuakna a nuam mahmah tuipigei tembaw khawlina nih nei hi.

A leikiat dan leh amun hoihna hang mahin Paul in Corinth a teel hihtuak zaw hi. “*Tuabang in lungdamthu kizeel theihna'ng thu khat hong om hi. Corinth ah khatvei a kiphuh khit nakleh, tualai panin leitung khempeuh ah kipuak sawn thei ta ding ahi hi*” —Ellen G. White, *Sketches From the Life of Paul*, p. 99.

Tuateng banah, Corinth hauhna leh sumbawlina hang mahin Paul in zong tuipuan buk khui in zuakna tawh nungta in tuakuapi sungah lungdamthu tangko thei hi (*Sawl. 18: 2, 3*). Khuapi lian leh hau sungah Pasion'na sep pen tona haksatna omlo hideklo hi. Corinth khua ah biakna nam tuamtuan tawh gamlum ziazua in minthang (*1Cor. 8: 5*) a, taattung tampi takte zong *Apollo*, *Athena* leh *Aphrodite* pasiante a banah *Sarapis* leh *Isis* kici Egypt pasiante aa zong om ziazua hi.

Hihbang biakna buaihuai ziazua kawmkal ah; zahmawh zualzangna lamah zong min nei lailai hi. Greek mi leitung thu leh tangthupu *Strabo* in; Corinth khua Aphrodite tungah biakpiakna in a neih uh siangtho-zualzang numei 1,000 bang Aphrodite biakinn mahah om cihhi. Laisiangtho siamte in hihthu hoihtak ngaihsun uh a; Corinth mite tawh kisai in Athen mite thu thansak mawkmawk ding bangin pulak uh ahih hang; tanglai leitung in zeh-zualzangna pen na zangpha mahmah lel uhhi. Corinth bek thamlo mun khempeuh ah zualzangna tawh buai kawikawi uhhi. Milim biakna leh zualzangna peuh mahpen a nisim nundan uh hingiat a; hih a dahhuai thu tengpen 1 leh 2 Corinth sungah ki teltak in hong kihilhcan ding hi.

Corinth ah Pasion'na sepna sungah, Paul in milim biakna buaina leh mihing suahtakna tawh kisai haksatna om hi. Tuni in bang haksatna peuh in lungdamthu tangkona ah bang haksatna hong piangsakthei hiam? Koibang in zo ding? Tuni eima khuapite ah a omkhak leh zong; Corinth te aa tawh koibang in ki lamdang hiam?

WEDNESDAY

July 1

“Hih khua sunga Tampi om”**Sawl. 18:4–8 simin. Paul’ thuhilhna na in bang gah hiam?**

Corinth a om Jew mite lakah Paul’ nasepna pen, ama’ deihzah in gahpha mello hi. Langdona leh huatna peuh na phukha leltak hi. Laisiangtho in “*amaute un amah nial uh a gensia*” (Sawl. 18: 6) cih. Greekpau in *blasphemeō* cihpen, mihing khatpeuh “*mawhna zong; mawhsak*” cihna ahi hi. Thukhat panin Paul vangkiamsak nuam a, ama’ nasepna ah gualzawh theihna’ng teng dalsak nuam uhhi.

Bangbang hitaleh, Corinth mite biakinn a Paul’ nasepna te mawksuah samlo hi. A nasepna peuhmah Pasian makaihna ahah manin, Pasian in “*Keima kam panin a paikhia ka thu in a hawmpi in Kei kiang hong tungkik lo ding*” (Isa. 55: 11) cih. Biakinn ukpa Crispus leh ama’ innkuanpihte in Zeisu pen Messiah hi cih sangthei in kituiphum ding cih peuhmah Jew mite pawlkhat in lam-en vetlo uhhi (Sawl. 18: 8). Amau bek hilo “*Corinth khuami tampite in zong thuhilhna ngai in um uh a, a ki tuiphum uh*” (Sawl. 18: 8) zong Crispus in a thuzawhna hang hihtuak zaw hi.

Sawl. 18:9, 10 simin. Corinth ah a phutkhak haksatna te hangin Paul’ lung sim ding na koici muhsak hiam? Pasian in Ama’ nasempa koibang in thapia hiam?

Paul in biakinn pan a paikhiat lianleh, thapiakna khat tuakkha lian hi. Zan ciangin a maang sungah Christ ngiat hong kilangh in Isa. 41: 10 sunga kammal omsa bangin “*nang hong ompih ka hih manin laukei in*” cih. Tua laitak pen Paul Corinth ah omgige in “*thanem in launa tawh kaliing*” (1 Cor. 2: 3) cih. Deihatak in langdona khat hangin Berea panin Athen ah apai kul ding hita hi. Tuabang langdona hangmah tawh Corinth

panin zong paikhia khin hihtuak lailai hi. Ahihhang tutung in bel tuabang hisamlo hi. Zeisu in Paul kiangah “*hih khua sungah Keima’ mi tampi a om hi*” (Sawl. 18: 10) aci hi. Tua mite tungah hotkhiatna thuthang puak dingin Paul pen Pasian khutzatpa ahi hi.

Isaiah 41:10 simin. Hihmun ah bang kamciam lamdang hong kipia hiam? Nangma nisim nundan koibang in sukha thei ding hiam?

THURSDAY

July 2

Corinth Mite tungah Paul’ Laikhakte

1 Cor. 1:11–13; 1 Cor. 4:14; 1 Cor. 5:11; 1 Cor. 7:1; 1 Cor. 14:37; 40; 2 Cor. 1:12; 2 Cor. 2:9; 2 Cor. 11:3 leh 2 Cor. 13:10 simin. Paul in Corinth mite tungah a laikhakna hangthu hihmun tengin koibang in hong telciansak thei hiam?

1 Corinth. a gelh laitak in Paul in Ephesus ah om hi (1 Cor. 5: 9). Corinth lamah thute late hoih khollo cihthu **Chloe** te innkuan hongpai in zasak uh hi (1 Cor. 1: 11). 1 Cor. 1-6 sungah Paul in Chloe hong zaksak thubuai teng siansuah dikdek phot hi. Tua buaina tepen pawl kikhenna, zahmawh zualzangna, zumthu kineihna leh angzuakna cihte ahi uhhi.

Paul in zong tangtawh dotna lai khat na ngah kha hi (1 Cor. 7: 1). Tuateng a dawnkikna tawh 1 Cor. 7 pan a zomteng hipah hi. Tua dotnate pen kiteenna, kikhenna, tangval/nungak siangtho hihna, milim biakpiakna ante, biakpiakziate, khalam silpiakte zatdan leh thawhkikna tawh kisai telcianna dik cihte ahi uhhi. Corinth pawlpi pen thubuai tawh kidim in khankhin nailo uhhi. Na khuatual pawlpi in zong thubuai tampi nei vencin e. Ahihhang Corinth pawlpi bel suksia zawtham lai hi.

Corinth mite tungah Paul’ laikhak masapen in tulai eima’ hun tawh zong kipawl thei lua tham hi. Tuni pawlpi tampitak te in zong eimau tumtak in thubuai kinei ngeingai hilo hiam? Hih laikhak in eite hong nak

thuhilhlua hi. “Paul laikhak khempueh lakpan a kicing pen, a ciaptehhuai pen leh a vangneipen laikhak ahi hi”—Ellen G. White, *The Acts of the Apostles*, p. 301.

Paul in Corinth mite tungah thumvei liivei bang laikhak hihtuak hi (2 Cor. 10: 9). 1 Corinth masiah in zong laikhat khak khin ahihang (1 Cor. 5: 9) tua laikhak ki mansuah hi. 2 Corinth madeuh in zong laikhat mah nakhak a, mipilte in “lungkham sinkhamna lai” (2 Cor. 2: 3, 4, 9; 2 Cor. 7: 8) ci uh a, tua zong ki mansuah kik leuleu hi. Pawlkhat in tua laipen 1 Corinth hi aci tawh; tua laikhak sungpan themkhat 2 Corinth sungah gelhkik hi a ci tawh om ziazua uhhi.

2 Corinth sungpan in, Corinth pawlpi mite pen amau kimkot leitung ngeina te in tuamcip cih zong kiphawk kha lai hi. Amaute un kidemna, vangneihna, hauhna leh tuhun in pawlpi a ding tona a suakthei peuhmah pimuh mahmah uhhi. Tuatawh a kikelki in Paul in Christ a bulphuh ngeina, lungdamthu limlang sungpan leitung etna cihte phuhsak sawm hi. *Eite in zong hih leitung pen lungdamthu limlang sungah ettheih ding bangzah thupi nasa hiam?*

2 Corinth 2:4 simkik in. Tua mite Paul in bangzah in lainat in don ci hiam? A kilehbulh in midangte tungah eima’ lungsim bangzah in vot thei ding hiam?

FRIDAY

July 3

Ngaihutbeh Ding: EGWhite, “*Corinth*” pp. 243–254, in *The Acts of the Apostles*

“*Corinth ah lungdamthu a tangko ciangin sawltakpa in Athen a zat ngeidan a minngahna tawh a kibanglo khat zangkik zaw hi. Deihtak in kinialna kipunna cihte peel in ‘singlamteh tung a kikhai Zeisu Christ lobuang bangmah theihloh ding’ (1 Cor. 2: 2) in lungsim khetat khin hi*”—Ellen G. White, *The Acts of the Apostles*, p. 244.

“*Paul in zong gualzawhna ciangkhat nei hinapi, tualai a amuh nate tawh pawlpi khat puh ding pen lunghiang mahmah zel hi. Corinth*

khua limlim pen dotna a hau mah mah nasepna phualkhat hi ci in ngaihsum a hih manin, nutsiat sawmta hi.”

“*Nusia in a hoihzaw munkhat a lungngaih laitak in; zan ciangin a maang sungah Topa hong kilang in ‘Lau kei in. Lungkiakei inla na thugen zomin. Hih khua sungah Keima’ mi tampi om hi’ (Sawl. 18: 9, 10) cih. Hihthu pen Corinth ah taamsuakna ding leh; ama’ khaici vawh teng Topa in khangsak ding kamciam ahihlam Paul in telcian pah hi. Tua ciangin Zeisu Christ’ dial nuai ah pawlpi lian khat mah hong po khia hi*”—Ellen G. White, *Sketches from the Life of Paul*, pp. 106, 107.

“*Corinth ah Paul in kumkhat kha guk nasem hi ci in ki ciamteh hi. Corinth ah a hanciamna teng pen a dalzo om hetlo in khangpha mahmah ahih manin bulpi munin zang phial hi. Pawlpi honpi khatmah ki puhbeh lai hi. Tua pawlpite lakah Paul a omtheihloh manin, a kiamna munteng pen, a thuk mahmah a muibun ama’ laikhakte in panpih thei mahmah a; Pasian’ kammal bangin sanguh ahih manun, tua laikhakte biakinn te sungah kisim ngiatngiat hi*”—Ellen G. White, *Sketches from the Life of Paul*, p. 109.

Kikupding Dotnate:

1. Paul pen Zeisu’ sawltakpa a kicih theihna dingin Pasian kiangpan sapna ngah ngiatpa ahi hi. Eimah kua ihihlam theitel in hong kisapna bang cih theih ding bang hangin thupi hiam?

2. Tawlkhat sung, Paul in Corinth ah nasepna khawlzaw in nutsiat ding zah dongin lungkia khin hi. Bangin Paul’ lungsim kikheelsak hiam? Pasian’ na sepna khat nut- siat dingzah in lungkiat laitak in hihthu in koibang in hong huhthei hiam? Eite zong tuabang ihih hun ding a om hiam?

3. Corinth pawlpi mite pen amau’ kimkot a leitung ngeina tengin huzaap gawp cih kitelcian mahmah hi. Tuni eite zong tuamah bang ihi uhhi.

Koibang in leitung ah om in (John 17: 11, 25) “pumpi deihna, mit tawh mu in i deihte leh mite kisaktheih pih nate ahi leitung nate khempeuh” (1 John 2:16) in huzaap saklo thei ding hiam? Eima kimkot a ngeinate in i pawlpi khawng a sialam in hong huzaap thei bangteng peuh a om diam?

Lesson 2

July 4–10

SINGLAMTEH’ THUPUAK



SABBATH NITAKLAM

Tukalsung Simding: *1Cor. 1:17–31; Col. 1:20; 1Pet. 2:24; Sawl. 13:16–47; 1Cor. 2:1–5.*

Kamngah: “Sihna a thuak mite a dingin singlamteh tungah Christ’ sihna thu pen a haihuai thu ahi hi. Ahi zongin hotkhiatna a ngah eite a dingin Pasion’ vangliatna ahi hi (*1 Corinth. 1: 18*).

Cicero, Rome te laigelh siam leh thugen siampa in, Rome mite in singlamteh thu peuhmah pen, mawhna daan piakna bangin lungsim sungah zong ngaihsut khakloh ding cih thuhilh ngei cihi. Tua Cicero in Zeisu’ suahma zalom lang lai in sikhin a hihhang, ama’ thu pulaakna tungtawn in Rome mite in singlamteh pen bangzah in hua uh cihna ahi hi. Lungsim sungah zong ngaihsun lo ding hiliang zen hi.

A kilehbulh in Paul in, “*singlamteh thupuak in Pasion’ vangliatna*” (*1Cor. 1: 18*) cihi. Paul a dingin Singlamteh in Pasion leh mihing kikal ah kilemtuahna (*Eph. 2: 16; Col. 1: 20*) hi a, Zeisu’ kiniamkhiatna lim lianbel (*Phil. 2: 8*), leiba lianpi a kilohna mun zong ahi hi (*Col. 2: 14*).

Tua singlamteh in Corinth mite' buaina a dingin a dawnna ahi hi. I Corinth sung ah gamlapi zong pai kullo in Paul in a lungkham penpen thu in: pawlpi sungah pawl kikhenna hipen hi. Paul in a lungkham mahmah lam kamhonna sungah a genkhith (*1 Cor. 1: 1-3*) leh lungdamkohna (*1 Cor. 1: 4-9*) khitlian ciangin hih thulu tawh kipansak pah hi (*1 Cor. 1: 10-17*).

Tukal sungin, singlamteh thupuak vangliatna in Corinth ah thupiang buaina teng khempeuh a ding a dawnna ahinna thu kisin ding hihang.

SUNDAY

July 5

Singlamteh Lungdamthu

Paul in Singlamteh lungdamthu pen eite tungah Pasion vangliatna cihhi. “*Singlam the tungah a kikhai Zeisu Christ' sihna*” pen Paul thuhilhna thubulpi ahi hi (*1 Cor. 2: 2*).

1 Corinth. 1:17–31 simin. Paul in hiteng ah bang thupi sak hiam?

.....

I Corinth. 1:18–31 sungah, Paul in *mihing' haina leh vantung' pilna* tehkaak hi. Singlamteh in mihing siatpen na leh Pasion' hoihipen na hong lahkha hi. I Cor. buppi sunga tengpen I Cor. 1: 17 bekin hong pulaak khia ziau thei hi. Christ' singlamteh in vang neilo a kisakkhak lohna dingin (*1 Cor. 1: 17*), singlamteh thupuak in eite' thuhilhna khempeuh sungah thulaigil hidden ding hi (*1 Cor. 2: 2 etbeh in*).

Paul in, amah pen *tuiphumna pia ding hilo a, singlamteh thupuak hilh ding bekin* hong kisawl cihhi. Hih thu pulaakna in i kantel ding thu nih hongpia hi.

T-2

Amasa, Greekpau “*sawl*” cihpen *apostellô* hi a, *apostle* (*sawltak*) pan mahin hong kaakhia ahi hi. Tua hi a, Paul ading sawltak' nasep bulpi taktak pen lungdamthu tangko mah hipah hi.

Anihna, Paul in tuiphumna thu a genna pen tuiphumna thupilo, thuhilhna zah in thupi zolo cihna zong hituanlo hi. *A kituiphum mite in, amau tuiphumna a pia kuate cih a thupitsak luatna uh pen a taigawp hizaw a*; amau kituiphumna taktak Zeisu nialna hizaw a cihna ahi hi.

“*Thugen siamna pilna*” (*1 Cor. 1: 17*) a cih ciangin, thugen siam peuhmah a lung-sim sungah sia hi acihna zong hituanlo hi. Mihing' pilna tawh Singlamteh thupuak peuh peengsak lohna ding acihna hizaw hi. Hihthu inbel Greco-Roman thugensiam dangnaalte acihna ahi hi. Athen ah Paul in tangthu, pilna leh thupilna cihte zang himah taleh gah gahpha mello lel hi. Tua ahin manin ‘*Paul in bangmah ngaihsut mel a nei hetlo Corinth mite a matzawh na'ng nasepna dingin lampi dangkhat zuihsawm zaw ta hi.*’ A buaihuai kinalna cikhawngte pelhin ‘*Corinth mite lakah, singlamteh tungah sihna thuak Zeisu longal bangmah kathei kei*’ a cihbang in hihding khensat hi”—Ellen G. White, *The Acts of the Apostles*, p. 244.

Singlamteh thupuak peuhmah semnen in zaibawl luatna in koibang in peeng zawsop saktei hiam? Corinth mite tungah tangthu, pilna leh thu theihna tetawh Athen ah ahin sangin Corinth ah gahphazaw hi. Eite zong lungdamthu i tangkona dingin tangthu, thu pilna leh science pilna te in hong huhtheih hun a omthei ding hiam?

MONDAY

July 6

Sihna Thuakte a dingin Haihuai

Mihing' haina leh vantung pilna tehkaakna ah, Paul in “*sihna thuakte a dingin tua singlamteh thupuak in haihuai*” (*1 Cor. 1: 18*) cihhi. I Cor. 1: 18-31 sungteng ah haihuaina leh haina gukvei om lakpanin hih in a om masapen ahi hi.

1 Corinth. 1:20, 21, 23, 25 leh 27 simin. Paul in, Sihna thuakte a dingin sing lamteh thu in haihuai a cih ciangin a cihnopna bulpi hihmun tengin koibang in hong telciansak thei hiam?

.....

Greekpau in 1 Cor. 1: 18 a *haihuaina* cihpen *môria* ahi hi. Hih kammal in lai siangthothak sungah nga vei om (1 Cor. 1: 18, 21, 23; 1 Cor. 2: 14; 1 Cor. 3: 19) hi. Hih leh a dang hihte innkuanpih kammal te in zong laisiangthothak sungah tamveipi mah om uh a, tuate lakpan a lang bangpen Paul' laikhak sungpan vive ahihi. Hih kammalte innkuan te in 1 Cor. sungah tam ompenpen hi.

1 Cor. 1; 18, 23 sungah Paul gen haihuaina cihpen in, mihing' lungsim cidamlo cihlam hizawlo in, gamtatna leh ngaihsutna ginalo, khensatna ginalo leh Pasion langdona cihna hizaw hi. Hihthu pen 1 Cor. sungah ama' laigelh thulu te mahmah in laktel ngiat hi.

Hih khuapi a Paul' dinmun ngaihsutsak in. Pilna, theihna leh leitung dinmun sang a kisial mahmah mun ah hong paikha hi. Tuathu tawh kizom in, Galilee gam Jew mi khat ahi Nazareth khuami Zeisu, Rome mite in a khailup uh, sihna pan a thokikpa; amaute' mawhna bek thamlo leitungbup mawhna a lohsakpa tangthu zong Paul in genlai hi.

Hihpa'n thuthuk genthei ding maw? A kua ciamnuihnuih ahia leh? Hihthu pen thu thuk ngaihsutna thak hitheilo ding, thupilna tuamtuam tetawh etciantheih zong hi mello; lungsim cidamlo a mawk paupau, pilna nei Corinth mite a dingin thupi lakluat ding zong om mello ci uhhi.

Paul' thupuakte pen, dawibia te a ding haihuai mahmah khinta a, Jew mi tampite a dingin zong haivai semzaw tham hi. Jew mite'n Messiah dingin a lam-etpa uh Rome mite un khailumta maw? Messiah cihpen Rome mite' khailup ding hilo in, tuate a lawnkhia dingin a lam-et uh hizaw hi.

Tuabang lian mahin, Paul in Corinth ah langdona tampi tuakkha hi. Tuateng bilbial kawmkal ah Jew' kha leh Gentile' kha khempeuh tungah lungdamthu in a gualzo dikdek hi.

Hih teng ah thupuak khat om hi. Bang langdona peuh phukha taleng, thumaan zakna ding lungsim kihong mi tampi Pasion in nei hi. Tua mite in Corinth bangin gitlohna sungah om mahtaleh; tua mite phak theihna dingin Pasion' khutzat hihtheihna ding kisa in om ding hihang.

TUESDAY

July 7

Hotkhatna Ngahte a ding Vangliatna

1 Cor. 1: 18 sunga thupuak in mikhat peuhmah lampialsak ngeingei ding hi. Sing lamteh cihpen a enpa etdan tawh kizui in khatna nei hi. Pasion a langdo mite a dingin tua thu in haihuaina hi a, Ama' hotkhatna a lam-ente a dingin vangliatna ahi hi.

Colossian 1: 20 leh 1 Peter 2: 24 simin. Zeisu in eite a dingin singlamteh tung ah bang hong hihsak hiam?

.....

Nungin i muhsa bangin, lungdamthu tangkona ah "*thugen siamna pilna te in Christ' singlamteh vangliatna hang kisalo ding*" (1 Cor. 1: 17) cihhi. 1 Cor. 1: 17 khuavak sungah, haihuaina pen Pasion' vangliatna hizaw a, mihing' pilna hilo (1 Cor. 1: 18) cih hong telsak hi. Mihing' pilna tawh a kikelkii mahmah Singlamteh in, mihing' pilna pen haihuai mahmah ahihlam hong lahkha hi.

1 Cor. 1: 18 pen Greekpau in "*sihna a thuak mite*" cihpen amau' gamtatna bangin a thuak uhhi cihhi. Tua Laisiangtho munpen "*Amou leh amou sihna a kitun mite a dingin singlamteh thupuak in haihuaina ahi hi*" ci in kisimthei lai ding hi. Greekpau in *apollymi* (*susia ding*) cihpen 1 Cor. 1: 19 sungah "*susia*" ci in kiletkhia hi.

Hiteng ah bang teng piang hiam? Atang 18 sunga thute leh tua mite kisiatna tang 19 na pen Paul in Isa. 29: 14 sung a siksats ahi hi. Atang 19 ah, Pasion in suksiatna nungah omkhinkhian ahih manin, amau leh amau kiskusia a cihtawh hong kilehbulh pian hi. Ahih hang kitukalh hetlo hi. A cihnopna pen amau leh amau ki suksiat ding a kisa peuhmah Pasion in usia ding hi cihna ahi hi.

Sihna thuakte cihtawh tehkaakna in “*hotkhiatna ngah eite*” (*1 Cor. 1: 18*) cihpen hotkhiatna peuhmah Pasion kiangpan bekin hong pai cihna ahi hi. Paul in hotkhiatna ngah eite acih ciangin, eimahmah kihonkhia tawm cihna hilo hi. Eimah kihonkhia tawm theilo hihang. Eima’ hotkhiatna in a pualam munkhat ah bulkip nei hi.

Suksiatna pen amau kihih tawm hi a, hotkhiatna ahihle hong kipiak kul a, mawh nei mite tungah hehpihna silpiak ahi hi. Pasion in a um mite honkhia taktak cihpen 1 Cor. 1: 21 ah kitelejian mahmah hi. Haihuaina cihpen bel, Christ’ singlamteh tungtawn in Pasion in mihing a ding hong piakkhong thupen nialna hi a (*1 Cor. 1: 30*), suksiatna sihna hong tun hi.

“Mawhna thaman in sihna hi a, Topa Zeisu Christ tungtawn in Pasion hong silpiakkhong pen tawntung nuntakna ahi hi” (*Rom. 6:23*). **Paul in 1 Cor. 1: 18, 19 sungah ama pulaksa khat koibang in pulak kikpha hiam?**

WEDNESDAY

July 8

Messiah Khat Kikhailum

“*Jew mite in na lamdang kal uh a, Greek mite in pilna thupi sak uh*” (*1 Cor. 1: 22*) Paul in cih. Singlamteh – Pasion geelna, Messiah, kikhailupna – pen Jew mite’n a kalh uh nalamdang hilo hi. Greek mite’n a deih uh pilna namte zong hibeek tuanlo hi. Mite lam-etna tawh kilehbulh gawp hi.

Nungzuite in a kikhailum Zeisu a saan daan uh pen, eite khempueh in zong sim ding hang a (*Maku 8: 31, 32; Maku 9: 30-32; Maku 10: 32-*

34), tua ngaihdan khempueh in thutuampi khat ahihna leh Jew mite a ding bang pen kihhuaina ahihliang thu tel ding hi hang. Gengensa bangin Jew mite in Messiah cihpen Rome mite a zogawp dingin lam-en mahmah uh ahihhang; tuabang hong hibeeklo in, aneupen in galvai beek in zong zolo hi.

Zalom tampi sungmah ah Singlamteh pen Christian te a dingin upna limpua ahi hi. Zalom khatna a Christian mite a dingin, singlamteh tungah aki khailum Pasion cih limlim up-hak a sakmahmah uh pen; tu zalom sawmniehlehkhat Christian’ lungsim sungah ngaihsut haksa mahmah hi. Ahihhang, hihthu in lipkhaphuai lua ahih manin tuate pen a ciinhuai thu ci in ngaihsut huai hi.

A kikhailum Messiah lim tawh hotkhiatna ngiimna a kizawh dong semding cih vanuai buppi tungah lahkhiatna ahi hi. Tua a singlamteh mahmah leh a tungah a si Topa cihthu pen hih leitung ah mawhneite a dingin lamdanglua mahmah hi. Mawhneilo vanmi te nangawn in Topa Zeisu bia uh cih ngaihsun in.

Sawl. 13: 16–47 (*a diakin 26, 38, 47*) **simin. Singlamteh’ thu bang teng hong hilh hiam?**

.....

Paul in lungdamthu hilh dingin Christ in kei hong sawl cih. Tua ahih manin Paul in zong a kikhailum Messiah’ thupuak hillpah hi (*1 Cor. 1: 23*). 1 Cor. 2: 1-5 sungah tua thu mah tomsuut kik hi. Sawltakpa in Christ’ thupiakna bangin citak hi. Lungdamthu tang kona ah zong “*mipilte kam thukpite*” zanglo hi (*1 Cor. 2: 1*). “*Singlamteh tungah Zeisu Christ a sihna thu*” (*1 Cor. 2: 2*) bek bulphuh hi. Paul’ kampau leh thupuak in “*leitung mi pilte zat kammal te leh siamnate kazang kei a, Pasion’ Kha Siangtho vangliatna tawh thu kahong hilh hi*” (*1 Cor. 2: 4*) cih. “*Mihingte pilna*” pen muhtangpi mahin “*Pasion’ vang- liatna*” tawh kilehngat linlian hi (*2 Cor. 2: 5*).

A kikhailum Messiah cihpeuhmah Jew mileh Greek mite'n lam-en vetlo uhhi. Eite' lam-etna bangin Pasian in nasem hetlo cih hihthu in bangci hong hilh naci hiam? Eima' lam-etna bangin nate hong pianloh ciangin, hih ngaihdan pom siam theihding banghang in thupi nasa hiam?

THURSDAY

July 9

Christ, Pasian' Vangliatna leh Pilna

1 Corinth. 1:19, 20, 30, 31 sungah Paul in, Pasian' pilna leh mihing' pilna peuh mah kibang hetlo, a tuam vilvel ciat cih. Theihhuai thu, tuabang pilna zong Paul in nial tuan samlo napi, Pasian' pilna a demsawm pilna ahiehleh nial cinten hi. Mihing' pilna in mawhna sungpan mihing suahtak zolo hi. Pasian' pilna Christ bekin hihna semthei hi. Anuai a sazian enin.

Hotkhiatna ngah eite a dingin	Singlamteh thu in Pasian'vangliatna	<i>1Cor. 1:18</i>
Pasian hong sap mite a dingin	Christ in Pasian' vangliatna	<i>1 Cor. 1: 24</i>

1 Corinth. 1:18 leh 1 Corinth.1:24 tegel in Christ pen Pasian' vangliatna hi a, mite a mawhna sung uhpan honkhia zo cih honglak hi. *“A haihuai thu ci in a ngaihsut uh i thu hilhna a ummite Pasian in hotkhiatna apiazaw hi” (1 Cor. 1: 21) cih. “Hotkhiatna ngah eite “ (1 Cor. 1: 18), “a um mite“ (1 Cor. 1: 21), “Pasian in a hong sap eite“ (1 Cor. 1: 24) cihteng khempeuh in a kibang vive uh hi a, upna tawh hotkhiat ngahte ahi uhhi. “Tua Christ' lungdamthu in ... thu ummi khempeuh a honkhiazo Pasian' vangliatna ahi hi” (Rom. 1: 16).*

Christ in Pasian' vangliatna bek hilo a pilna zong hilai hi. Cihnopna ah, Pasian in tuathu tungtawn in mawhna buaina talsik a, tua buaina pen mihing pilna in a talsik zolo hi. Mihing te'n Pasian a theih zawhna dingin hih Leitung pilna in hih zolo hi (*1 Cor. 1; 21*). Lehgen leng, Christ tungtawn in eite in hotkhiatna dingin mipil kisuak hi (*2 Tim. 3: 15*).

1 Corinth. 1: 24–29 simin. A phawkhuai kammal pawlkhat “haihuai, thanem, vanglian, pil” cihte in bang a deihna hiam?

1 Cor. 1: 24-29 a sinte'n a phawk ding uh haihuai (*haina*), *thanem* (*thanemna*) cih te ahi hi. A deihna bulpi in, mihing' pilna in singlamteh thupuak pen *haina* leh *thanemna* ci in ngaihsun cih. Ahihhang, *“Pasian' haina pen mihingte' pilna sangin sangzaw lai a, Pasian' thanemna pen mihingte' hatna sangin hatzaw lai hi” (1 Cor. 1: 25)*. Hihthu in Pasian thanem in hai hi cihna zong hilo a, Pasian' vangliatna leh pilna in mihing dinmun khempeuh sangin nakpi in sangzaw tham cihna ahi hi.

“Pasian in note hong sap laitak in, na omzia uh ngaihsun un. Leitung mite hong muhna panin note a tamzaw mipil, mi vanglian, mi thupi zong nahi kei uhhi” (1 Cor. 1: 26). Eite a dingin bang thupuak om hiam?

FRIDAY

July 10

Ngaihsutbeh ding: EGWhite, *“Calvary”* pp. 741–757, in *The Desire of Ages*.

“Tuhun mite tampitak lungsim sungah, Calvary Singlamteh pen a zahtakkai leh a ciaptehuai na tetawh kidimsak uhhi. Kipawlina thupi te in khailupna thute tawh kizom pha mahmah uhhi. Ahihhang Paul' hunlai ahiehleh tua singlamteh peuhmah pen huathuai in lipkhaphuai salel uhhi. Singlamteh tungah sihna thuak mikhat peuh mihing' Honkhiaapa ci in pahtawi ding cihpen; zahkona leh langdona a sam hipah lel hi.

Jew mi leh Corinth a Greek mite in hihthu koici muh ding cih Paul in telcian lua hi. Ama' thungai Jew mite lakah tuathu tangko ding acih limlim in zong a hehlua ding mi tampi takmah ompah hi. Greek mite bangin pen abul abal omlo thu acih dinguh hihtuak lel hi. Tua singlamteh in mihingte a lamto ding leh a honkhia ding cih peuhmah, Paul pen a lungsim cidam nawnlo in muding uhhi.

Ahihang Paul a dingin, singlamteh pen a lunglutna sangpen nahi zel hi. Nazareth mi singlamteh tunga kikkaipa' nungzuite bawlsiatna matna a thuak uhpan kipan tua sing lamteh' minthanna in khawl nawnlo ta hi. Tuahun lai in Paul in, Zeisu' sihna in ama' nundan a kheelsakna hangin ama' ngiimna khempeuh vantung' deihna tawh a kipawl theihna hangin, mong neilo Pasion' itna ki pulaak hi. Mawhnei mi khat in Pa Pasion hong itna pen, Tapa hong ki piakkhatna sungah amuh ciangin; vantung huzaapna sung ah ki-aap ahih manin, lungsim kikheelna khat hong pian leh, Christ in ama' bangkim hita hi"—Ellen G. White, *The Acts of the Apostles*, pp. 245, 246.

Kikupding Dotnate:

1. Gethsemane huan sungah, Zeisu in, “*Pa aw, ahithe ding ahihleh, hih hai tawh hong kipelhsak in*” (*Mate 26: 39*) cih. Hih thungetna tungtawn in singlamteh tungah Zeisu hong piaksak in bangzah mantam ci hiam?
2. Paul in, “*Pasion' haina pen mihing' pilna sangin pilzaw*” (*1 Cor. 1: 25*) cih. Pasion' pilna leh mihing' pilna koibang in kilamdang hiam?
3. A kikhai Christ thu pen Jew mite a dingin dongtanna hi a Greek mite a dingin haina ahi hi. Tulai eima' thuhilh bangkhawng in, tulai khangthakte a dingin tua mahbang hisakthei ding hiam?
4. Paul in, “*Kha Siangtho a neilo mite in Pasion Kha Siangtho in a hong piak nate sangtheilo uhhi*” (*1 Cor. 2: 14*) cih. Hihmite lungsim a sukhazo dingin amau kiangah Zeisu' thu koic gending ihi hiam? Ei' tatlhehekna bekin amaute a baanzo diam?

Lesson 3

July 11–17

CHRIST SUNGAH KIPUMKATNA



SABBATH NITAKLAM

Tukalsung Simding: *1 Cor. 1:12–17; Rom. 1:29; 1 Cor. 1:10; 1 Cor. 3:1–4; Phil. 2:5–8; 2 Cor. 11:23–28; Col. 1:24.*

Kamngah: “Sanggamte aw, note khatlehkhat kithutuak in, pawl kikhenna omkha lo in, na lungsim uh, na ngaihsutna uh leh na ngiimna te uh nakikhatsak na dingun, i Topa Zeisu Christ min tawh ka hong thum hi” (*1 Corinth. 1: 10*).

Gamsa te enleng pawlkhatte in tam leh tawm leh alom, ahon, apawl in kikhawl uhhi. Ngia hon, dolphin ngahon leh miksi galkap hon cihbang in ahonpi in om uhhi. Tua banah Chimpanzee zawngte in zong a hon in ki-itna kip mahmah in a tawmpen 15 pan 150 dong bang hon omthei uhhi. Cihteihang, ahonpi mahin lung kituakkim zo tuanlo a khatveivei a kuhpate kilaii gawp thei uhhi.

Mihing zong tua ganno te mahbangin, hon kikhawlh bek thamlo, tua mihon lak mahah a kilaii gawp mah omthei veve hi. I pawlpi sungah zong tua mahbang ahi hi. A zahtakhuai makaipite sungah zong

kipawlkhenna omthei veve hi. A suuksia zaw kanlai in honkhat leh honkhat kithutuak zolo lailai uhhi. Na pawlpi sungah tuabang namu ngei hiam?

Namuhkhak leh Paul in zong Corinth ah Mukhin talsik khin hi. Tukalsung in 1 Cor. 1-4 sung ending hang a, Paul in pawlpi sunga kinialna te Christ sungah ki pum khatna tawh gualzawhpih in a daihsakna teng entel ding hihang.

SUNDAY

July 12

Pawlpi sungah Pawlneu Kikhenna

Paul in, “*note lakah pawl (neu) kikhenna om khalo in, lungsim leh ngaihsutna ki thukhat sak un*” (1Cor. 1: 10) cihthu in 1 Cor. 1 pan 4 na sungteng huamzo hi. Laisiang tho siam tampi takin tua kipumkhat in Paul’ laikhak khempueh huam khin hi ci uhhi.

1 Corinth. 1: 12–17 simin. Khuatual makaite tung kinga in pawlneu kikhen na in bul leh bal bangmah neilo cih hihmun teng in hong koici hilh naci hiam? Paul in koici siansuah hiam?

Paul in, Corinth mite lakah kipumkhatna a omlohna pen kamkhauh mahmah tawh pulaak hi. Greek pau *schisma* (pawl khenna 1Cor. 1: 10) leh *eris* (kitot kiseelna 1Cor. 1: 11) cihte zang hi. *Schisma* pen noun hi a, (verb *schizô* ‘khenkham’), laisiangthothak sung ah kithutuaklohna tawh pawl kikhenna thu a genna mun tampi ah om hi. Noun ahi *eris* (kitot kiseelna) zong, Christian te in zatloh dingin tamveipi pulaak hi.

Rom. 1: 29; Rom. 13: 13; 1Corinth. 3: 3; 2Corinth. 12: 20 leh Gal. 5: 20 simin. Tua eris (kitot kiseelna) tawh bang mawhna teng kigualsuk lai hiam? Bangzah suksia ci hiam?

Corinth mite kithutuah lohna teng a pualam ah hong kidawkkhia a, khatlehkhat thu kinei (w&m;pGJ) uhhi (1 Cor. 6: 1-3). Pawlpi mite thu kineihna tawh kisai Paul in “*Note a dingin zumhuai mahmah hi*” (1Cor. 6: 5) cih. Topa’ nitak-an (*nekkhop*) nekna sung na ngawn ah a kithutuahlohna tenguh hemkhia hetlo uh cih (1Cor. 11: 17-22).

Pawlpi mite lakah ki pumkhatlohna pen lauhuai mahmah a, Paul in zong lung hihmawhpih mahmah ahah manin; Corinth mite a laikhakna sungah zong, thubuai a gen masakpen mah hipah hi.

1Corinth 1: 12–27 simkik in. Pawlneu kikhenna pen pawlpi ki thutuahna dingin a lauhuai mahmah thu ahiam pulak in. Na khuatual pawlpi in tuabangte koibangin pelhna dingin bang hihhuai nasa hiam?

MONDAY

July 13

Zeisu Bulphuh

1 Corinth 1:10 simin. Paul in “Lungsim, ngaihsutna leh ngiimna kithukhat” a cihpen bang a cihnopna naci hiam?

Pawlneu kikhenna in Christ tungah mikhat’ cihtakna nialna ahi hi (1Cor. 1: 10). Pasion in, “*Ama’ Tapa i Topa Zeisu tawh kikhawl dingin*” (1Cor. 1: 9) hong sam hi. Eite’ Topa in Christ ahah manin Amah bulphuh ding hihang. A lungluthuai dotnate a dawnna ah “*Christ kiphelsuah ahiam? Note a dingin Paul kikhai hiam? Paul min tawh kituiphum nahi uhhiam?*” (1Cor. 1: 13) cih. 1Cor. 1: 13 pen ‘hilo hi’, Christ kiphelsuah lo hi ci in dawnkikna ahi hi. Eite a ding a kikhai pa Christ hi. Eite in Pa’ amin, Tapa’ amin leh Kha Siangtho amin tawh i kituiphum uhhi (Mate 28: 19).

Paul in, eite pen “*Christ’ pumpi nahi uh a, (mimalsim) in a pumpi na khat ciat nahi uhhi*” (1sCor. 12: 27). Pumpi in na tampi aneih mahbang in, na khatsim in ama’ nasep ciat om a; pumpi khat mah hi vevelai hi. Pumpi in hoitak in na aseptheih na’ng in, a na khempueh in

zong amau' panmun ciat panin nasem ding uhhi. Hih thugentehna pen Paul in *kithutuahloh* sangin ***kithutuah*** ding a deihzawkna ahi hi. Ki batlohna tuamtuamte sungmah ah kithutuahna Paul in lam-en hi. Tua bek thamlo Paul in kibanglo mah taleng kithutuah veve ding lam-en hi.

Bangbang hitaleh, ngaihsutna leh ngaihdan khempueh i Topa Christ tungah aap ding hi. Christ in eite' Topa anahih sese zong Paul a dingin belhmun nahi pah a, tuazong 1Cor. kamhonna (*1 Cor. 1: 2, 7, 8, 9, 10*) hipah hi. Paul in pawlneu kikhenna leh mihing makaite' thu a genmaa in; eite in Zeisu Topa in nei ihihna pulaak masa hi. Pawlpi in mihing makaite' bulphuh lo hi. Christiante in Zeisu bulphuh uhhi.

Zeisu in Topa ahihna pen 1Cor. a kipatna lamah pulaak khin a, tuamah in "*Lung sim, ngaihsutna leh ngiimna kithukhat un*" (*1Cor. 1: 10*) a cihpen hong telcian sak hi. "***Ki thukhat***" a cihna, Greek pau in ***katartizô*** pen; na khat peuhmah ama' ommun ngei ah koihpha kik cihna ahi hi. Mihing makaite tungah kinga in pawlneu kikhenna hong om ciangin; pawlpi in ama' dinmun ngei a tunkik dong puahphat kul a, tua mahmah zong angkhuahna sisak in Christ sungah kithukhatna bek tawh piang thei hi.

A beisa kum sawmsim lai in, Seventh-day Adventist pawlpi in Bible study pia ding small group ki thupisak mahmah hi. Pawlneu kikhenna leh small group cihin koibang in kilamdang hiam? Tua small group te pawl kikhenna a suahlohna ding koici kidawp kul hiam?

TUESDAY

July 14

Pilna leh Khanghamna

Pawlneu kikhenna cihpen mihing makaite' muhdan tawh apiang tamzaw hi. Pawlpi kithutuahna leh pawlpi mite khalam cidamna a dingin lauhuaina hi a, Christiante Pasion'na sepa ah muhkhihna tawh tua pawlpi makaite pimuh luatna hangin, thu um mite sukha thei hi. Tuabang gamtatna panin kidemna hong piangsak a, pawlpi zong kikhenna piangsak hi. Tuabek thamlo, eite in Christian ihihna ah mihing makaite bulphuh

luatna tawh; eima' nunna sungah Christ pen Ama' dinmun panin a hemkhia kisuak thei hi.

1Corinth 3: 1–4 simin. Corinth mite khangham lohna teng Paul in hiteng ah koibang in pulaak hiam?

.....

Kha lam a khangham thu umte in Pasion' pilna kipahpih sak (*1Cor. 2: 6, 7*) a, tua in Kha Siangtho tungtawn in hong kizom sak (*1Cor. 2: 13*), tuhun khangthak pilna tawh hong enkaak siamsak (*1Cor. 2: 6*), mihing' pilna (*1Cor. 2: 13*). Pasion pilna pen Christ' Singlamteh sungah kihongkhia hi (*1Cor. 2: 1-4*). Tua sang a kitezawlai in, Pasion' pilna pen, Christ' thuaksiatna, sihna leh thawhkikna sungah hong kilakkhia hi. Ki thukhat ding Paul thuumna a tomgen kikmaa in (*1Cor. 3: 1-17*) Paul in ama' laisimte peuhmah in pilna diktak leh Christ sungah khanghamna neih ding phawksak nuam hi.

A pil a khangham Christian te ahihleh kha-mite hi a, cilehsa hilo, naungek hilo hi (*1Cor. 3: 1*). "*Kha Siangtho a nei mite bekin Kha lam thute theithe*" (*1Cor. 2: 13, 14*) ahih manin amaute un khalam thute pen khalamthu mahtawh enak hi. Apil a khangham Christian te in, nawizu hilo, antak tak tawh kivak uh (*1Cor. 3: 2; Heb. 5: 12*) hi.

Thu ummi "*nawi bek a nelaite pen, naungek ahih manun amaan leh amaanlo thu bangmah phawkthei nailo uhhi. Ahizong in antak icih pen, asia leh apha a khenthe* a lim leh a limlo khenthe ta, khangham khinsa mite ahi uhhi" (*Heb. 5: 13, 14*). Apil a khang-ham Christian te in **mihing tuamtuam hinapi un "kei Paul pawl; kei Apollos pawl"** (*1Cor. 3: 4*) cilo uhhi.

Tua mihing tuamtuamte khempueh pen "*Pasion'na a semkhawm mite*" (*1Cor. 3: 9*) ahi uhhi. Pawlpi khat in a om eite in Pasion' lo leilet, innpi leh biakinn (*1Cor. 3: 9, 16, 17*) ihi uhhi. Christ tungtawn in Pasion tawh i kipawl uhhi (*1Cor. 3: 11*).

Na pimuh mahmah khat hangin nakpi takin na lungkia dikdek ngei hiam? Tuabang nahih ngei khakleh, tua tungtawn in bang pilna sinhuai nasa hiam?

WEDNESDAY

July 15

Christ *bangin* Sila' Dinmun

1 Corinth 4: 1, 2 simin. Mikhat peuhin mihing makaite tungah muhdan maan a neihtheihna ding hiteng ah bang hong kihilh hiam?

.....

1 Corinth 3: 1–4 sungah, Paul in khalam lohna hangin pawlkhenna om cih genkiau hi. Ahizong in tuathu a telkkeh madeuh in “*eite in Christ' lungsim i nei uhhi*” (1 Cor. 2: 16) cih. Hihthu inbel Christ' ngaihdan leh tatdan acihna hihtuak pen hi. Lamkhat panin, thu ummi in “*Christ' lungsim*” a neih ciangin Christ' bangin ngaihsun gamta hi.

Hih lungsim pen nisim nundan sung khempueh ah zat ding pen baihlo hi. Greco- Roman hunlai in, gam leh minam vai, thu pilna leh ngaihsutna, biakna lamah kidemna tamthei mahmah hi. Leitung ngeina tawh saan theihna ding deihna hangin Corinth pawlpi in Leitung dinmun zuisak ta hi. Tuhun i pawlpi a dingin zong tuabang lauhuaina omthei ding hi.

Philippi 2: 5–8 simin. Hihmun in “Christ' lungsim” koibang in hong telcian saktei naci hiam (1 Cor. 2: 16)?

.....

Corinth mahbang in Philippi ah zong pawlneu kikhenna mah (Phil. 2: 1-4) tawm kha mah na om veve hi. Phil. 2: 1-8 sungah, Christ bangin sila' dinmun ah omna in, eima lunggulhna peuhmah sihsak ding; Zeisu bangin eileh eimah sangin midang thupha piak ding kalngiat hi.

Christ tawh akibang sila dinmun a omna pen Paul in “*Christ' nasepte*” (1 Cor. 4: 1) cih. Hihthu in Christ a dingin tua mite in a huhte leh naseppihte acihna ahi hi. Mihing makaite peuhmah muhna maan taktak tawh muhtheihna dingpen Christ' makaihna etteh in bulphuh ding cih kician mahmah hi.

Nasem silate peuhmah pen “*kemcingte*” (1 Cor. 4: 1, 2) zong kici hi. *Kemcingpa* cihpen midangkhat' neihlehlam teng kemcing dingin muanhuai takin a ki-aap pa cihna ahi hi. Eite'n bangpeuh nei taleng, avekpi in Christ' neihsa vive ahi hi.

Thungetna tawh Philippi 2: 5–8 sunga thupuak pen lungngai dihin. Ama' pumpi a kinial liang Pasian hong itna koibang in manthei ding ihi hiam? Tua itna mah eite'n zong i neihtheihna dingin; eima lunggulhna koibang in sisak thei ding ihi hiam?

THURSDAY

July 16

Singlamteh a Lehtaankik Nundan

Mihing makaite tungah kingalel in pawlneu kikheno ding cih ciangin, i makaite panpihlo ding cihna zong hituanlo hi. Pawlpi' nasepna a makaihte peuhmah pahtawi in panpih ding hihang. Pasian in hih leitungah Ama'na semding in mihing mah aseh hi. Pawlpi makai a kicite' nundan peuhmah in Singlamteh tungah a kipiakhiapa a sutnakleh; tuate thugenna pauhmah ngaihtaak in zuihtaak hi.

Tuabang a cihna thu in, Pasian' thu a ngai ding mite a khemtuk ding vangliatna teng a lumletzo dingin singlamteh in vangliatna a neih hang ahi hi. Christ tawh akibang makaite in, amau' nasepna gualzawhna uhpén Pasian hangbek hi ci uhhi. Zeisu in zong Leitung ah Ama' nasepna sungah Pasian' min thangsak hi (John 17: 4).

Paul in, a citak Christian nasepna peuhmah; Singlamteh thu i cihcih thu tungah zungkha ding cih. Singlamteh i cihpen Pasian in Ama' hotkhiatna'ng pilna hong lahkhiat na ahi hi. Tua mahbang in, mihing' pilna ahihleh haihuaina naci leltak hi. 1 Cor. 4: 1-13 sungah, Paul in

Singlamteh koibang hi cih hong laktel hi. **Amasa** in, Christian makaite dinmun ding pen Pasion mah in hong ciangtanh sak hi (*1Cor: 4: 1-5*). **Anihna**, Christian' nasepna maantaktak a ding ciaptehma in thuaksiatna hi (*1Cor: 4: 9, 11-13*) cih. Hih a nihna zaw ahieh, khantohsak huai mahmah hi.

2Corinth 11: 23–28 leh Colossian 1: 24 simin. Christ a dingin thuaksiatna cih in bang a cihnopna ci hiam?

Christian makaite in Zeisu' khekchap zuihna tawh, amau' Pasion'na sepna hangun amau' sanggam pasal numei khatpeuh a ding sihna dongin a thuakngamte ahi uhhi. Paul in amah leh Apollos pen "*thahna thuak dingin thukhenna ngah mite*" (*1Cor: 4: 9*) kici hi. Amau mahmah pen gilkiat dangtak, puansilh neilo, inn neilo, satthuak (*1Cor: 4: 11*) cih. A ban zomin, amau pen simmawhna, bawlsiatna, gensiatna thuak uh a "*mite muhna ah tuni ciangdong niinbulom leh leivuithem bang bek kahi uhhi*" (*1Cor: 4: 12, 13*) cih.

Corinth mite pen *mihaute, kumpite, mipil misiamte nahi uhhi* (*1Cor: 4: 8, 10*) ci in lehgen liang hi. Kiphatsakna in pawlpi sungah kikhenna piangsak thei ahil manin Christian makai dik takte sungah mun ngahlo hi Paul in cih (*1Cor: 4: 6*).

Pawlpi sungah nangma dinmun in bangpeuh hitaleh Christ a dingin bangzah nathuak khin hiam? Nangma dawanna sungpan bang pilna peuh kingah thei ding hiam?

FRIDAY July 17
Ngaihsutbeh Ding: Ellen G. White, "The Training of the Twelve," pp. 17–24, in *The Acts of the Apostles*.

"*Pasion' thumaan upna sungah a kiplai a beibang mite' ki pumkhatna in, amau' neihsa thumaan in a kip vangliatna tawh kidim in, amau zong Pasion' teeltuam mite hi uh cih pulaakna zong ahi hi.*

Amaute' kipumkhatna in galte' ngiimna geelna teng suksiatsak a, cikmah hunin omnawnlo sak hi. Tulai thumaan in, lungsim sungah umin, a nuntakpih te, Pasion' mite suksak in, a vanglian huzaap hong suak hi" —EGWhite, *Testimonies for the Church*, vol. 1, p. 327.

"*Thumaan tausang tungah kipumkhat in a ding ding mite Pasion in makaih in mai nawtpih hi. Christ in zong leitung a ding hong kipiakhatna tawh 'tua mite pen mi tuam vilvel, gamtathoih gamtate' suksak hi. Hih siansuahna nasepna pen, pawlpi sungah a thumaanlote, pawl kikhenna leh kilemlahna te beisiangsak ding hi. Suksiat ding sangin lamphat zawk ding, amau' maiah hong piang sepding khempeuh thasaan in semsak hi.*

*Pasion in Ama' mite pen upna sungah kithukhat dingin a bawl ahi hi. Singlamteh madeuh in Christ' thungetna ah zong, Amah leh Pa in aki pumkhat mahbang in, nung zuite in zong kipumkhat ding a, tua hileh Pa in Amah a sawlna leitung mite'n umthei ding cih. Lungsim a sukha penpen hih thungetna in khang tawntung hong bansuksuk a, tuni dong mah ahi hi. 'Hih mite a ding bek thu hong ngen kahikei a, amaute' thugenna hangin kei a hong um mite a ding zong a hong ngetsak kahi hi' (John 17: 20)" —Ellen G. White, *Testimonies for the Church*, vol. 4, p. 17.*

Kikupding Dotnate:

1. Zeisu in leitungah nasep azawh dong mah ki pumkhatna dingin thungen hi. "*Amaute khempeuh pumkhat a suaktheihna ding ...Nangmah in Kei nahong sawlna thu leitung mite in a uptheih na'ngun*" (*John 17:21–23*) cih. Christ sungah pumkhat na in; leitung hon dingin Pasion in Tapa sawl ahiehna koibang in kipsak thei hiam? Pumkhatlohna in banghang in pawlpi a ding thaang hithei hiam?

2. **1Cor. 4: 9-13 sim inla, hihteng ah nungzuite koibangin kipulaak hiam entel in. Hih nungzuite akipulaakna pen in; leitungmi te'n a pimuh**

makaite dinmun tawh koibang in kilamdang hiam? Pasion' dinmun leh leitung dinmun koibang in ki lamdang ci hiam?

3. 1Cor. 4: 16 sungah, Paul in, amah etteh dingin Corinth mite hanthawn hi. Mihing makaite na etteh nuam hiam? Makai khat etteh cihleh hunlo taaklopi in pahtawi mawkmawk cih koibang in kilamdang a, a lauhuai hiam?

Lesson 4

July 18–24

PAWLPI SUNGAH MAWHNA



SABBATH NITAKLAM

Tukalsung Simding: 1 Cor. 5:1–13; 2Cor 2:5–10; 1Cor. 6:1–13; 1 Thess. 4:1–8; 1Cor. 6:19–7:9.

Kamngah: “Na pumpi uh Pasion in hongpiak, note sungah hong teng Kha Siang tho’ biakinn ahiamtak theilo nahi uhhiam? Note pumpi nomau neihsa hilo a, Pasion aa ahi hi. Note pen Pasion in hong leisa nahih manun, na pumpi uh Pasion’ minthanna dingin na zang un” (1 Corinthians 6:19, 20, NIV).

Mihing’ khuak pen a&jr\$Kyf tawh kibang hi. Ngaihсутна tungtawn in amau kiang a pai khempeuh hup in kem pahpah hi. I khuaksungah bangteng honglut cihpen kiphawk kha mello (*ciamteh sese keileng kithai zolo*) hi. Hita mahleh i khuak sungah omveve a, tuateng mahin ngaihdan sepdan tengmah hong sukha veve hi.

Tua hang mahin, ei Christian te nangawn, eima kimkot a thupiangte in hong suk-khak ding baih mahmah hi. Acil apat limlim in Christian pawlpi in hih buaina tengmah tuakkha limlim hi. Gentehna in,

Sunday tanna koipan hong piang hiam? Pawlpi in huhi lakpan in dawkkhia uh maw? Hi deksuai lo hi. Amau' kimkot a ngeina pan ahi hi.

Tua thu-khun mah pen Corinth mite lakah zong kimu kha hi. Pawl kikhen nopna lungsim tawh kisai a thuumna (*1 Cor. 1-4*) khit ciangin, Paul in zahmawh zualzangna, thu kineihna, angzuakna, kiteenna leh khattang omna (*1 Cor. 5-7*) cihte lamah paipih hi. Leitung dinmun in amaute tungah thunei mahmah hi.

1 Cor. 1-4 sunga Pawl khennopna lungsim in, a nunglam a gamtat hoihlo acihcih te a dingin kong honsak hi. Pawlpi sung mawhnate Paul in koibang in hilhcian a, Paul lai gelhna sungpan in bang pilna peuh kingah thei ding hiam?

SUNDAY

July 19

Upna leh Gamtatna kikal Kibatlohna

Christian tangthu sung tawntung ah Laisiangtho siamte, pastor te leh thu um mite in pawlpi koici om ding cih entel nuamin laisiangthothak sim uhhi. Sawltak te hunlai a pawlpi zong lamdang kisa mahmah khin hi. A thupi mahmah khat, mihingte in thubuai nei ciat cih zong kiphawk kha nawnlo pah zawsop hi. Pawlpi in koibang dan hilo ding cih eite'n zong laisiangthothak sungah simkhin kha ding hihang. Corinth mite tungah Paul' laikhakte tawh kipat huai mahmah hi.

1Corinth 5: 1–13 simin. Paul in bang thubuaina tawh pulaaksak in buaisak mahmah hiam?

Paul in "*a pa'zi*" (*1 Cor. 5:1*) acih ciangin sisan kinaihpil tawh zualzangna hi a, mi khatleh a nukik hihtuak hi. Hih dinmun pen "*Chloe' innkuan*" (*1 Cor. 1: 11*) in thu puak hi. Sisan kinai zualzangna pen a lipkhaphuai zia "*lawkite nangawn in a gamtatloh te*" (*1 Cor. 5: 1*) cih. Tu in Christian pawlpi masa sungah piang tazen maw leh? Pawlpi mi khat in tua bang in gamta cih azak ciangin Paul pataulua hi (*1 Cor. 5: 1, 2*).

Hitamahleh hih dinmun in suksia semlai hi. Corinth pawlpi mite in tuabang dan gamtatna phal in koih hithiat bek thamlo kipaak mahmah lai cih azak ciangin Paul dipkua semsem lai hi (*1 Cor. 5: 1, 2*). Tua ciangin Paul in zong tua mimawhpa puahphat ding bek thamlo; upna leh gamtatna kikal ah kitelsiam lohna a om pawlpi zong puahphat sawmta mai hi.

Paul in zong a nu tawh zualzang liang lawmlawm pa a maisakzo tua pawlpi mah mah zong puahphat ding gen tangtang hi. Hi taleh tuabang a zahmawh zualzangna na ngawn kisial mahmah lai uhhi (*1 Cor. 5: 2, 6*). Tuapen Paul a dingin thuak hak mahmah hi. Hih mite in bangsung khial uh hiam?

Sisan kinaihpil tawh zualzangpa pen, pawlpi ina thuak tentan zawhna thu bang mah kitheihpilho hi. Amah haulua mahmah in pawlpi in noptuam pil mahmah hiam? A hih keileh "*a hihnop peuhpeuh hihthei*" (*1 Cor. 6: 12*) ahil manin, amau hih ding kilawm te, hihding in kilawm satheilo hiam? Kithei zo nawnlo hi.

Bangbang hitaleh, amaute in Laisiangtho palsatna kician mahmah taleh, a mit uh taw khin (*Siam. 18: 7, 8*) ahil manun kisial mahmah lai uh maw?

Laisiangtho in phal hetlo hitaleh "*itna leh saansiamna*" tawh pawlpi in sang in aki maisak zel bangpeuh omthei ding hiam?

MONDAY

July 20

Zulhtatnate Siansuahna

Zahmawh vai peuhmah siansuah haksa mahmah hi. Paul in zong haksa nasa mah mah hi. Hihbang hun ciangin Laisiangtho tungah citak thumaan takin thungetna leh itna tawh siansuah ding kisam hi. I ngiimna bulpi pen puahphat kikna ahilham manggilh hetlo ding hihang.

1Corinth 5: 1–13 simkik in. Hibang hun ciangin koicih ding Paul in ci hiam?

Paul in 1Cor. 5 sunga zahmawh thusia peuhmah pawlpi' khalna kismah cih. Tua a zualzang mipa hemkhia ding (1Cor. 5: 2), mawhsakna thukhen ding (1Cor. 5: 3), Satan tungah piakhia ding (1Cor. 5: 5), lakhia, paikhia ding (1Cor. 5: 13) cih. Pawlpi mite in tuapa peuhmah "*khawlhpih lo ding*" (1Cor. 5: 9, 11), bek thamlo "*tuabang mipa tawh an zong ne khawmlo ding*" (1Cor. 5: 11) cih.

Paul' kammalte khauhpai mahmah ahih manin khangthak te a ding bang zak thadah huai mahmah phial mahleh, a tangthu pian hunzui in theih tel kul hi. Maizumna mel theilo in mawhna bawlp tungah thukhen ahihna theihhuai hi. Gamtat dan a uangluat hun ciangin kamkhauh kismapha hi. Thu khat peuhpeuh ah tomcing takin telkheh zong kulveve hi.

"Note lakpanin hemkhia un" (1Cor. 5: 2; 1Cor. 5: 13). Pawlpi' khalhna a cih- nopna ahi hi.

"Satan tungah piakhia un" (1Cor. 5: 5). Pasian' thu mangin Ama' hong kepna sungah nungta nuamlo ahih manin; Satan' khutsungah omding in kilawm hi. "*Ama' khentatna gah lo taken*" cihna hipeuh hi.

"Khawlhpihlo ding" (1Cor. 5: 9, 11) "**tuabang mipa tawh anzong nekhawm lo ding**" (1Cor. 5: 11). Zahmawh zualzang mite tawh kinaikhawlhna panin, amau' zualzang na tawh midangte a kilawhsak dinguh lauhuai kici hi. Tanglai in an nekkhopna pen khat leh khat kithupit sakna ahi hi. Eite pen i kimkot in hong huzaap mahmah ahih manin, tua bang thusia hong om ciangin eima hihtheihzah in kikemcing ding hihang.

"Ama' kha a kihotkhiat nading" (1Cor. 5: 5). Pawlpi' khalhna cihpen puahphat na ahi hi. Mawhneite in amau dinmun kiphawk in, mawhnei nundan nusiasak hi. Paul in "*pumpi gimsakna*" (1Cor. 5: 5) acih pen a tunga mah hihtuak hi. 2 Cor. 2: 5-10 sungah a kisikkik mipa acihpen; hih 1Cor. 5 sunga zahmawh zualzangpa mah hihtuak hi. A gamta khial pawlpimi khat in, pawlpi tawh akikhawlh kik theihna dingin, pawlpi in a khalhna in muibun in a ngiimna tangtun hi.

TUESDAY

July 21

Pawlpi' Dinmun Kecinna

1Corinth 6: 1–11 sungah, Paul in pawlpi sungah thubuai anei mite Christian te in a vanaih dingdan hong kikuppih hi.

1Corinth 5: 3, 12, 13 leh 1Corinth 6: 1–13. Paul in Corinth mite leh eimah zong bang hong hilhciam nuam hiam?

1Cor. 6: 1 sunga Greek pau *pragma* pen "*thubuai*" cihna hi a, "*na khatpeuh, na*" in kiletkhia hi. Hitengah pen "*Upadi lamthu*" hihtuak zaw hi. 1Cor. 6: 1-11 thu pen gitloh na thusia lam hilo cih theih kul hi. Mipi thukhenna zum a thusiate tungah thuneihna pen Rom. 13: 1-5 sungah kipsak khin hi. Paul cihnopna pen Thuhilhikna 22; 22-24 sung a Moses in ahihbang in, zahmawh zualzangna thusia a omphet in zum ah thu bawlpah pen a cihnopna hi. Hihthu entel leng pawlsung a thusia khatpeuh a om ciangin Paul in laisiang tho bulphuh in thukhen cih lakhiatna ahi hi.

1Cor. 6: 11 sung thusia pen zahmawh zualzangna tawh kipawl Laisiangtho munte tawh thukhup suk (1Cor. 5 leh 1Cor. 6: 12-20) khin a, 1 Cor. 6: 1 sunga thubuai zong pen zahmawh zualzangna mah hihtuak hi. Tua thusia ahihleth mipite thubuai maw, neihsa kituhna maw, zahmawh buaina mah mawh kitelcian lo hi.

Tua thubuai in bangpeuh a nahi zongin, pawlpi mite in mipi thukhenzum a natun uhpén Paul nuamlo hi. Amaute un "*lawki thukhente*" (1Cor. 6: 1) kiang a kitut uh sang un Christian u lehnau sanggamte in, amau sungah thu siansuah theilo uh ahi hiam?

Pawlkat bangin a upmawh pongmaw un, 1Cor. 6: 1 sungah thusia nei tegel pen 1Cor. 5: 1 sunga pa leh tapa khawng hihtuak zawsop hi. Thu khat peuhpeuh ah, a buaina leh a thubul theih tel huai hi. Paul in, a pualam mite in Christian kipawl na dinmun hong muhdan ding lung himawh pen hi. Christian te in dailenbuk sunga puanniin te khawng mipi' muhna ah phokhia sedah uhhen (1Cor. 6: 6).

Innsung thubuai khawng zong leitung mite kikhensak dah lel uhhen. Rome te hunlai in, mihau, kumpi milian cihte in zumpi te sungah maipha ngahzaw hamtang uhhi. Tuatawh a kilehbulh in Christian te in Christ-bang thukhenna zangin, leitung ngeina leh dinmun tetawh kipelh uhhen.

1Corinth 5: 10, 11 leh 1Corinth 6: 9, 10 sunga Paul in a gualhsuk diudeu gitlohna sazian enpha in. Paul in milim biakna, guktakna, huaihamna leh sum duh luatna cihte pen banghang in zahmawh zualzangna tawh gualkhawm zenzen hiding hiam?

WEDNESDAY

July 22

Zahmawh Zualzangna' Gu-thoihna

1Thess. 4: 1–8 simin. Hihmun in siangthona leh zahmawh zualzangna pelh in omna koibang in kizomsak hiam?

.....

Paul in a tunga thutengpen mikhatpeuh tungah agelh ahihhang; a thukhunpi ahieh leh, tangzai takin Christian khempeuh a dingin zatttheih ahieh hi. Hih tungtang ah a dothuai khat: *Corinth ah bang thu teng piang hiam? Banghang in piangthei hiam?*

Corinth thu ummi pawlkhat in, lungdamthu tawh suahtak khit nungsang nakhem peuh hihtheih ding kiphata ci in um uhhi. Amau' cihdan tak hileh, gilpi pen an a dingin kibawl hi a, pumpi pen zahmawh a ding leh zahmawh in zong pumpi a ding cihi (1Cor. 6: 13). Paul in tuathu pen Christian' suahtakna thu telkhial ahiehlahm uh hilhician kik hi. Zahmawh lamah vangkeplohna in Christian' dinmun tawh kituaklo leh, lungdamthu tung tawn in hongpiak suahtakna zangkhial hi cihi (Rome. 8: 2; Gal. 5: 13).

Eite pen mawhna pan kisuakta a, mawhna bawltheih na'ng "suakta" ihi kei uhhi (Rome 8: 2; Rome 6: 18, 22). Ataktak in "pumpi in ... Topa a ding, Topa in zong pumpi a ding" (1Cor. 6: 13) ahieh hi. Eite in

Christ' neihsa (1Cor. 6: 15) ihi a, eimah ihihna bang bang in i gamtatna piangsak hi. Khatlehkhat zong kikai-awk bikbek in kizom uhhi. Tua thu mahmah pen 1 Cor. 6 sungah nam thum in hong khenkhiat sak hi.

Amasa, eite pen "Topa Zeisu leh Pasian' Kha Siangtho min tawh" (1Cor. 6: 11) *sawpsiangsa*, a *kisiansuahsa* leh *mawhmaisa* hong cihi. 1Cor. 6: 9, 10 sunga a kigualsuk diudeu mawhna teng leh; 1Cor. 6: 9, 10 sunga mipi maiah nasia takin a mawhpaih zahmawh zualzangna cihte in, *sawpsiangsa*, a *kisiansuahsa* leh *mawhmaisa* te' nundan sungah mun luah zolo uhhi.

Anihna, eite in *Christ' pumpi ah nate* (1Cor. 6: 15). Tuapen eite leh Christ kipumkhat ding cihnopna ahieh hi (1Cor. 6: 17). Zahmawh zualzangna cihpen Topa tawh kipumkhatna palsatna (1Cor. 6: 13, 15) ahieh hi. Kiteenna omlopi in zahmawh zangkhawm te in zong anihgel un "pumkhat" suakkhin uhhi (1Cor. 6: 16). Kha Siangtho tungtawn in Christ tawh kikhawlhna in, zahmawh waite ah zong Christian' nundan a neitheih dingin khentat theihna bulpi mah hipah hi.

Athumna, eimau pumpi in "Kha Siangtho biakinn" (1Cor. 6: 19, 20) hi. Zah- mawh waite ah vangkiamlo siangtho takin nuntak theihna ding in, Kha Siangtho hangin Christ tawh kikhawlhkhop ding lampi khatbek om hi. Rome 12: 1 sungah "a hingtang in biakpiakna, Pasian' maiah a saantaakcing in" na kipia un cihi.

Zahmawh zatkhialhna in mihing tungah siatna hong tunthei cih lungngai diih in. Christian te a dingin bangzah lauhuai hong ci hiam?

THURSDAY

July 23

Kiteenna leh Khattang omna

Paul in eite' pumpi pen "Kha Siangtho biakinn" (1Cor. 6: 19) cih a kipsakna pen zahmawh zualzangna a khaamna tawh kipawl ahieh hi. Kha Siangtho teenna biakinn hihna bek in siangtho nundan hong nungta saktei bek hi. Pawlpi icih in, i kimkot a omte khem peuh leh Christian

kipawlkhopna hong kikhentelna ahi hi. Tuabang ahihtheihna ding in Kha Siangtho ompihna bektawh hithei hi.

1Corinth 6: 19–7: 9 simin. Hih munin “zahmawh zualzangna pelhun” (1Cor. 6: 18) acih thukham koibang in hong telcian sak hiam?

.....

1Cor. 7 sungah zahmawh vai theihhuia thu tampi tak om hi. A baihpeng dingin, 7 na pen phelnih kisuah thei hi: (1) kiteenna vai hilhcianna (1Cor. 7: 1-24) leh (2) khattang omna tawh kisai hilhcianna (1Cor. 7: 25-40). 1Cor. 7 in zahmawh vai pen gen ding thupi leh kisam ahihna hong telcian sak hi.

Ahita zongin, 1Cor. 7 i simuh ciangun, Paul in Corinth khua a pawlpi sung thu om tetawh kizui in dotna kiciante a dawnna cih phawk ni. Ama' thu pulaakna pawlkhat sungah, amah'n kiteenna thupimuh khollo bang hikha ding a, ahihhang tua in ama' thubulpi hi zawlo hi (1Tim. 4: 1-3; 1Tim. 5: 14; Heb. 13: 4).

A ciaptelhuai thupiakna ah, “zahmawh zualzangna pelh un” (1Corinth 6:18) cih pen Christ tawh kizopna (1Cor. 6:17), Kha Siangtho biakinn hihna (1Cor. 6: 19) cihtawh a thukhup suk hi. Zahmawh zualzangna pelhna dingin lampi hoizhaw dang a omlai hiam? Omlo hi.

Pasian in zahmawh piangsak himah a, kiteenna sung bekah zatnuam ding cih. Zahmawh cihpen pasal khat leh numei khat kiteenna sungah hamphatna khat hi a, Lai siangtho in hong sehsak ngiat ahi hi. Paul in “zahmawh zualzangna pelh un” acih laitak in Joseph (Pian. 39: 6-18) phawk gige kha ding hi. Potiphar' zi in duh-aamna sungah a mainawtmaa in Joseph in “innsung panin taikhia” (Pian. 39: 18) cih. Hihthu pen Pian. 39: 6-18 sungteng ah liivei sang tawmzaw lo in pulaak hi.

LaiSiangtho inbel a cihlian lohhang, tua zahmawh a dingin Joseph in zineih ding kiteenna ngak phot hi (Pian. 41: 45). Joseph pen Kha

Siangtho tawh a kidim mipa ahi hi (Pian. 41: 38). Pasian' maiah zong thumaan gamta nuampa ahi hi. Amah pen Pasian Kha Siangtho tawh a kidimpa ahi hi (Pian. 41: 38). Pasian' maiah zong thumaan gamta nuam pa ahi hi.

Eite, pawlpi tawh ihi zongin, pawlpi ngeina tungah hong thuzawh thei muh dan hoihlote koibang in pelhthei ding ihi hiam?

FRIDAY

July 24

Ngaihsutbeh Ding: Ellen G. White, “A Message of Warning and Entreaty,” pp. 298–308, in *The Acts of the Apostles*.

1 Cor. 5: 10, 11 leh 1 Cor. 6: 9, 10 sungah a kigualsuk diudeu siatnate lakah, milim biakna leh zudawn zukhamna in zahmawh zualzangna tawh kizom in kigualsuk hi. Paul in. 1 Cor. 10: 7 (Pai. 32: 1-6) a suutkikna ah, milim biakna pawikhaamna peuhmah uangtak in nekna dawnna tawh zahmawh zualzangna lam tungpaphah cih (1 Cor. 10: 8).

EGWhite in zong “angkhuah in anhai laite in siangthona thupha sangthei nailo ding uhi. Mihing' pumpi in a thuakzawh thahatna in; eima pumpi tungah hong tung nate a thuakzawhna in lamdang mahmah ahihhang, uangtak in nekna dawnna tawh mawhna a bawlzom veve te in, amau' pumpi thuakzawhna kiamsemsem sakding hi. Simmawhna tawh palsat athuak pumpi' lunggulhnate dipsakna sungah, Christian akici mite in, amau' nasep uh thanemsak a, pumpi, lungsim leh gamtatzia te kiamsuk sak hi” cih.—Ellen G. White, *The Sanctified Life*, pp. 25, 26.

“Mikhat in angkhuahna a paihkhiat ciangin, lungsim sungpan pasian-zuau khem- peuh a hepkhiat ciangin; tua a awngthawlna munah Christ' Kha Siangtho hong lut hi. Tuabang mipa in; itna tawh na a sem upna nei a, gamtatna leh lungsim mahmah niinsak lo in kisiansuah hi”—Ellen G. White, *The Home Missionary*, November, 1889.

“Pasian in eite pen, a sangpenpen vantung dinmun siangthona ah hong lamto nuam hi. Tua dingin a Kha Siangtho in eite hong hanthawn den hi. Pasian' Kha Siangtho in a puahphatloh mihing'

lunggulhnate peuhmah sungah sihna khaici om hi—Ellen G. White, Manuscript 12, 1888.

Kikupding Dotnate:

1. Corinth ah thu um tampite in, leitung' ngeina tawh kipawl theih ding lunggulhna nei uhhi. Tua in Christian dinmun a dingin banghang in lauhuai hiam? Tuabang khialhna i bawl khaklohna dingin eimah mah koibang in kidal ding ihi hiam?

2. Paul' dotna kician mahmah “*Note pumpi in Kha Siangtho teenna biakinn ahih lamtak theilo nahi uhhiam?*” (1Cor. 6: 19) cih in 1Cor. 5-6 sunga “*Theilo nahi uhhiam*” (1Cor. 5: 6; 1Cor. 6: 2, 3, 9, 15, 16, 19) cih dotna sagih tetawh a thukhup hi. Tuata khempeuh in dawnna kip hongngen hi a “*himah ei*” cih ding vive ahi uhhi. Paul in pawlpi a deihsakna pen hih dotna teng panin koibang in natecian thei hiam? Eite'n zong banghang in awlmawh ding ihi uhhiam?

3. Kiteena pen Pasian hong piak hi (Pian. 1: 27, 28; Pian. 2: 18-24) a, zahtak ding ahi hi (Heb. 13: 4). Mite in khangluivai luadeuh e acih hun ciangin; Eden panin Pasian in hong piakkhong ahihlahm leitung ah koibang in lakhia thei ding ihi hiam?

Lesson 5

July 25–31

NAKHEMPEUH PASIAN' MINTHANNA DING



SABBATH NITAKLAM

Tukalsung Simding: 1Corinth 8; Sawl. 15:20; 1Cor. 9:1–6; 1Cor. 10:5–22; Thkna. 6:4, 5; Maku 12:28–31.

Kamngah: “Na hihna khempeuh uh, nekna dawnna ahi zongin, Pasian' min thanna dingin nahih un” (1Corinth 10: 31).

Corinth Masa 8-10 in 5 leh 6 sunga tenga zahmawhvai teng a thukhupna bek thamlo in, Corinth mite in laikhak mahtawh a dotna tenguh (1Cor. 7: 1) a dawnkikna mah hipah hi. Tua dawnna tengin Corinth masa sung buppi huamsuk pah ding hi.

1Cor. 7 sunga, kikheelna a cihcih peh ahihle, zahmawh zualzangna (1Cor. 5-7) leh milim biakna (1Cor. 8-10) sungteng tawh akizom thulute ahi hi. Laisiangthothak sung ah tuategel tonkhawm in kipulaak hi (Sawl. 15: 20, 29; Sawl. 21: 25; 1Cor. 6: 9; Eph. 5: 5; Col. 3: 5; Mang. 21: 8; Mang. 22: 15).

A huampi in, 1Cor. 5-7 sungah Paul in, zahmawh zualzangna thu khen a; 1Cor. 8-10 sungah ama' lungkhampi pen in milim biakna ahi hi. Christian peuhmah in tuategel peuhmah pelh ding cih (1Cor. 6: 18; 1Cor. 10: 14).

Nungkal in, Kha Siangtho biakinn hihna thu mukhin hang (*1 Cor. 6: 19, 20*) a, tua zahmawh zualzangna kipelhthei hi cihhi. Tukalsung in, ‘na khempeuh Pasion minthanna ding’ in hihna tawh milim biakna kipelh thei cih muleuleu ding hihang (*1 Cor. 10: 31*).

SUNDAY

July 26

Pilna leh Itna

1 Corinth 8: 1–13 simin. Paul in banghang in pilna leh itna tehkaak sese a, bangthu om hiding hiam? Bang a thupi bawl hiam?

.....

Thuthukzaw khat a pulaakna dingin Paul in milim biakpiakna an paulam in: midangte itlohna (*1 Cor. 8*) gen hi. Milim biakpiakna an thubuaina in, Corinth pawlpi phel nih suah hi. A omin zong a omlo pasian dangte peuh kitheisak uh in, tuate in nakhem peuh nektheih ding phalna hongpia ci in um uhhi (*1 Cor. 8: 4*). Tuate pen Paul in “*a hatte*” (*1 Cor. 4: 10*) cihhi. Tuabang gamtatna a langdote ahilhleh “*a thanemte*” (*1 Cor. 8: 9-12*) cihhi.

Paul in tuate tuabang in a minvawhna pen, amaute in nidanglai lawki sungah up-khialhna aneih tenguh a nutsiat zawh nailoh uhang ahi hi. Milim biakpiakna ante a thahat te in anek uh ciangin, Christian biakna leh milim biakna in nuamtak in tonkhawm theilel kici ding hi. Tua ahilh manin Paul in “*a thahat te*” in a thanemte a dingin “*tuuk theihna’ng palkhak ding*” hisak nuamlo hi.

Milim’ maiah biakpiakna a kinei ante nekna pen Laisiangtho in siatmuh mahmah hi (*Sawl. 15: 20, 29; 21: 25. Mang. 2: 14, 20*). Ahilhhang, hih Laisiangtho mun sunga te cih bangin Paul in genkhiatna neituanlo hi. Hihthu ahilhcianna sungah Paul in a lung hih mawhna pipen bel, pilna zatkhialhna tungtawn in kithutuah lohna khawng hong pian ding patau hi.

Paul in pilna sungah gitlohna om ci in mawhpaih lo a; pawlpi sungah kikhenna a piangsak thei kiliatsak na’ng pilnate a cihnopna ahi

hi. Itna kihello pilna in pilna taktak hi lo hi (*1 Cor. 8: 2*). Pilna taktak cihpen Pasion a it mi pen Pasion in a theih mi ahi hi (*1 Cor. 8: 3*).

Paul in Thuhilhikna 6: 4 siksian in thu um mite in Pasion khat bekma thei ding uh cihhi (*1 Cor. 8: 4-6*). A lunglut huaina khat, Thkna 6: 4, 5 sunga Pasion pen khat bek hi a cihna tawh kizui in, na Topa “*na Pasion na it ding hi*” cihhi. Moses mahbang in Paul a dingin zong itna omlo pilna in a mawkna hilel hi.

“*A thahat*” mite in amau’ pilna kimuang uh a, milim biakpiakna ante nekna zong lauhuai tuanlo hi ci uhhi. A hunlehmun tawh kizui in, tuabang in a hihtheihna ding uh zong Paul in sangveve ahilhna Wednesday leh Thursday ni ciangin mu ding hihang. Cihteih hang, “*upnaneu*” (*1 Cor. 8: 9*) te’ tuktheihna’ng palkhak ding ahilh khakleh, pelhpah lian ding cihhi. Christian peuhmah in Christ leh midangte itna hangin eima’ pumpi mahmah ki deek kidaam ding hihang.

Itna a kihello pilna peuhmah a sialam hong suak ding Paul in cihhi (1 Cor. 8). Koibang hun ciangin itna omlo pilna in siahuai thei hiam?

MONDAY

July 27

Angkhuallo Itna

1 Cor. 9: 1–6 simin. Hihmun in itna tawh eima’ pumpi kinialna a khiatna pen gamtatna tawh koibang in hong lakkhia hiam?

.....

1 Cor. 9 sung etpak in, Paul in ama’ Sawltak dinmun a kemcing bang hipak lel a, atung lama pilna leh itna tawh kisai agenna teng tawh kipawl khollo bang ahi hi. Laisiang tho cihpen acil apat in alian aneu a kikhen sitsetsa in kigelh hituanlo cih phawk in. Tua a hih manin, Paul in Cor. 9 sungah a gelh thute pen a masiah a tetawh kizomlo zong hituan lo hi. 1 Cor. 9 in, Christ leh i sanggamte tungah angkhuallo itna neihdan

gamtatzia hong hilhcian ahi hi. Itna hang bekbek in Paul in ama' hamphat na'ng pawlkhat nusia hi.

“Annek Tuidawn” (1Cor. 9: 4). Hitengah annек tuidawn acihpen sumtang tawh panpih na a cihnopna hipi pen hi. Sawltak khat ahihna tawh, Paul in ama' kep pawlpi mite kiang pan panpihna a ngah ding ahi hi. Biakna makai dangte in tuabang ahih hunuh zong om hi. Himah taleh Paul in tuabang hihlo in, puanbuk khuina tawh amah kivaak hi (Sawl. 18: 3).

“Thu ummi zi tonpih thei” (1Cor. 9: 5). Zineisa Sawltak khat in Pasion nasep khualzinna ah pawlpi panpihna tawh azi tonpih thei hi. Tuabang nupa te lakah **Priscilla** leh **Aquila** (Sawl. 16: 3), **Andronicus** leh **Junia** (Rom. 16: 7) cihte om uhhi. Ahihhang Paul in zi neilo (1Cor. 7: 8) hi. Zi nanei lel peuhleh, a nupa un pawlpi' panpihna tawh khualzin khawmthei lelpeuh ding hi.

“Nektawm zon tawh thuah ding hilo” (1Cor. 9: 6). Paul leh **Barnabas** a nihgel un, Pasion' nasep khualzinna sungah thaman ngah theilua uhhi (1Cor. 9: 4-6). Paul pen a nuntak na'ng in puanbuk khuipa hi (Sawl. 18: 3) a, Barnabas' nasep bel kitheihpih khalo hi. Amah pen a kipiazoo mahmah mipa (Sawl. 4: 36, 37) ahih manin, amah leh amah ki vaak tawm lel hi.

1 Cor. 9: 7-11 sungah, Paul in 1Cor. 9: 6 sunga thuteng mah kipsak in, amah leh Banabas in pawlpi' panpihna tawh nuntak theihna'ng thu om naci hi (1Cor. 9: 11, 12). Topa tektek in hong thupiakna ah **“lungdamna thu a hilhte in tua nasepna mah panin nuntakna a ngah ding uhhi”** (1Cor. 9: 14; 1Tim. 5: 18). Ahihte hangin **“hih hamphatna bangmah ka hong lakei uhhi”** (1Cor. 9: 12) cihhi. Tuabang in Paul in angkhual lohna lim khat lahkha (1Cor. 9: 1-18) in, Corinth ah lungdamthu hilhna tungpan hamphatna teng nial zaw hi (1Cor. 9: 19-23).

Nangma' hamphat theihna ding omgige napi, hong hehpihna muibun takin teci pan theihna ding; nutsiatna tawh a hoihzaw thei ding bangteng hiam?

TUESDAY

July 28

Abeisa Hunte pan Pilna Sinna

Paul in eima pumpi nialna pen ama' tuahkhak thute bulphuh in, milim' buaina lamah hong kiheita hi. Thukhat panin, 1Cor. 9: 27 sunga thu pen 1Cor. 10 sungah picin sakna hi a, amah mahmah mi ginalo a suahlohna dingin, amah mahmah a kideek kidaam ngiatpa ahi hi. Corinth mite in amah etteh saknuam mahmah a, a ettehtaak penpa in Zeisu hizaw cih zong theisak nuam hi (1Cor. 11: 1).

1Cor. 10: 7–11 simin. Israel in sehneel lakah bang mawhna bawl uh a, amau aki piatuam hamphatna hangin tua mawhna koibangin suksia semthei hiam?

1Cor. 10: 1–5 sungah, gamlak a Pasion mite' thu Paul in hemgen kiau hi. Meipi leh tuipi in Pasion' makaihna, ompihna leh kepcinna teng hong phawksak kik hi. Tua khit ciangin, annек tuidawn in zong Pasion' vaihawm sakna hong phawksak leuleu hi. Israel in meii leh tuipi sungah a omna uh zongpen kituiphumna tawh kipawlsak a, Christian te kituiphumna tawh kibang sak hi. Tua mahbang in annек leh tuidawn zong Paul mah in Topa' nitak-an ci in genteh lailai hi.

Thukhat panin, 1Cor. 10 in, Christian te in Israel' phutkhak tengmah a phukha a cihna zong ahi hi. Ahihhang tua tangthu banglian zilkik nuam nawnlo ahih manin, Israel mite tangthu suutphapha kik hi. Israel mite'n hamphat na'ng tampi nei uh hinapi'n, mi tampi in a sia vive utzaw tham uh (1Cor. 10: 6) a, milim biakna (1Cor. 10: 7), zahmawh zualzangna (1Cor. 10: 8) cihte ahi hi. Amaute tungah **“Pasion lungkimlo”** (1Cor. 10: 5) a cihpen lamdang sakhuai hetlo hi.

Israel mite in mawhna lianpi bawl uhhi ci in kawklel ding baihmahmah hinapi, Paul in, Christ' tangthu tampi a theitel mahmah Christian te in, hamphatna tuamtuam te nei uh hinapi'n mawhna lian bawl zawtham uh hihtuak cih. Tua ahiah manin vauna hong piakna sungah "*lungkip takin ka omzo hi ci in a kingaihsunte a pukkak lohna dingin kikem uh hen*" (1Cor. 10: 12) cih.

"*A kingaihsunte*" a cihpen, pawlkhat in amau apukthei ding dinmun ah a omlam a kiphawk hetlo om hihtuak hi. Tuni in tuabang i om kha diam? "*Lungkip takin ka omzo hi ci in a kingaihsunte a pukkak lohna dingin kikem uh hen*". Hih vauna angah khalo kua peuh i omkha tam maw?

Eima' thuakzawhloh ding zia-etna hong kipialo Laisiangtho in cih. "Ahih hang suahtakna ding lampi hong honsak" (1Cor. 10: 13) zel cih. A tuapipi mah banghang in mawhna sung kitukbaih lailai thei hiam?

WEDNESDAY

July 29

Milim Biakloh ding Vauna

1Corinth. 10: 5–22 simin. Banghang in milim biakna pelh huai hiam?

1Cor. 10: 14–22 sunga, Paul in, milim biakna an thu genkik hi. Milim biakna ante cihteh tuni tuhun ngeina tawh kibanglo kha ding a, ahihhang Laisiangtho hunlai in tam mahmah tuak hi. Lawkite biakinn a pasiante tungah gannote tawh abiakna piak uh ciang un, a phellang pen thunei siampite tungah kipia a, amau un tuasa zuak uhhi. Phelkhat leu leu pen mipi sumzuakna (jynfolUaps;) ah kipuak ziau lel hi.

Tua sate pen sa dangte tawh khentuam in kikoih tuanlo in kizuak khawm lel ahiah manin, Christian te in theilosa in tua milim biakna sa peuh

leikha hiau ding uhhi. Sawltakpa'n ngaihsut a piakna ah tuabang sate suakta takin Christian te in leithei lel uh cih.

Tuabang a milim biakna sa Christian innkuan in nethei ding uh hitaleh (1Cor. 8: 1-13), tua lawkite biakinn taattung te biakpiakna pawikhaamna sungah Christian te kihel ding kikhaam hi. A thu kiplat bel kitelcian lel hi: milimte in bangmah hilo lel ahiah manin Christian te in amau' inn vuah tua sate suaktak takin nethei ding uh a (1Cor. 8: 4), ahiah hang, amau' pawite in dawi biakna tawh kizom ahiah manin; Christian te in tua paw i ah kihelhuai lo hi (1Cor. 10: 20, 21).

Topa' nitak-an nekna sungah kihelna (1Cor. 10: 16) in Topa tawh kikhawlhna ahiah mahbang in tua dawibiakna zeh sungah kihelna zong dawi tawh kikhawlhna ahi hi (1 Cor. 10: 20).

Tua hi a, Paul mahin, "*note in Topa tawh nekkhawpna hai sungpan leh dawi tawh nekkhawpna hai sungpan in na dawnkhawm theikei ding uhhi. Topa tawh nekkhawpna an leh dawi tawh nekkhawpna an zong na nekhawm theikei ding uhhi*" (1Cor. 10: 21) cih. Zeisu in zong: "*kuamah in To nih' sila hikhawm theilo hi*" (Mate 6: 24) cih.

Paul mah in, Pasion in lungsim takpi tawh cihtakna deih cih. Milim biakna in "*Topa hehna piangsak*" (1Cor. 10: 22) cih. Tuabang a hihlohna dingin Paul in 1 Cor. 8: 4-6 sungah, a khial ngeilo thukham khat ahi "*Topa note Pasion na lungsim khempeuh uh, na nuntakna khempeuh uh leh, na tha hatna khempeuh uh tawh na it ding uhhi*" (Thhka 6: 4, 5) cih. Thkna 6: 5 sungah, nakhempeuh tungsiyah ah Pasion bek itna hi a, Zeisu mah in "*Nangmah na ki it mahbang in na vengte na it in*" (Maku 12: 31; Siam. 19: 18) cih.

Milim icih pen suang milim bekpeuh zong hituanlo hi. Na khat peuhpeuh zong milim kisuah thei lel hi. Nangma nunna sungpan bang milim peuh na paih khiat ding kizam hiam?

THURSDAY

July 30

Milim Biakna tengah Gualzawhna

1Cor. 8: 1–3 sungah, itna in milim biakna pan hong kemcing hi, Paul in ci hi. Hih thu suutpha kik in 1Cor. 10: 23-11: 1 sungah picin hi. 1Cor. 8: 3 sungah eite in Pasion i itna gen hi. Tualai ah, “*a kuamapeuh in note’ angsung ding bek zong kei unla; midangte phat tuamna ding zong zaw un*” (1Cor. 10: 24) cih. Tua in midangte itna ahi hi.

Maku 10: 17–22 leh Maku 12: 28–31 simin. Hihmun tegel a kibatna bang om a, 1Cor. 10 sunga dinmun bang ciangin koibang in zang ding ihi hiam?

Maku 12: 28- 31 sungah Zeisu in alian thukham nih: *Pasion itna leh midang itna* a henkhawm mahbang in, Paul in zong 1 Cor. 10 sungah tua mahbangin hih hi. A hau tangvalpa’ tangthu (*Maku 10: 17-22*) sungah, Zeisu in hih ki-itna thukham tegel henkop leuleu a, tualai ah zong Thkna 6: 4 (*Maku 10: 18*) leh (*Maku: 10: 19*) sunga thukham suangpek nihna mah na hemgen veve lai hi.

Tua tangval haupa’ buainapi pen, Pasion leh a vengte sangin ama’ neihsa teng itzaw tham ahi hi (*Maku 10: 22*). Vantung sumkholna te sangin ama’ neihsa teng manpha sazaw hi. Mi zawngte sangin ama’ sum manpha sazaw hi (*Maku 10: 21*). Amah milim biapa hipah hi.

Zeisu’ thuhilhna tawh kizui in, Zeisu in, nakhempeuh sangin Pasion itzawkna leh eimah ki it mahbang in midangte itna cih thukhun pen 1Cor. 10: 27, 28 sungah pulaksa mahbang in, tua bang dinmun akisapna munah zong zat theih dingin Paul in a hemin hong hanthawn hi. A cihnopna bulpi in, a hithei nakhempeuh in midang khat lungsim a sukkhak leh hoihna piangsaklo (1Cor. 10: 23) cih.

Hih thukhun mahmah pen “*nahih na khempeuh uh Pasion’ min thanna dingin hih un*” (1Cor. 10: 31) acihna sungah pilvang takin na

gawmkhawm thei hi. Pasion’ min thanna dingin hihding a cihte hang, milim biakna mahmah in mel leh lim tuamtuam tawh hong piangkha theiveve cih Paul in hong lak hi. Pasion bekma in a neih den ahi, vangliatna leh minthanna khempeuh dinmun ah a lutthei na khat peuhpeuh pen milim biakna mah hong hiveve hi (*Isa. 42: 8*).

1Cor. 10: 31-11: 1 sunga Paul’ kammalteng pen 8-10 sungteng a thuteng a ding thukhupna ahi hi. Ama’ hamphat na’ng a zonlohna hong telgen mahmah hi. “*Mite in hotkhiatna a ngatheih na’ng un*” (1Cor. 10: 33) cih. Tua mahmah Christ a ettehna mah hipah hi (1Cor. 11: 1).

Nangmah na ki it bangin navengte na koici it semsem thei ding nahiam?

FRIDAY

July 3

Ngaihsutbeh ding: EGWhite, “Idolatry at Sinai,” lai. 315–330, *Patriarchs and Prophets*.

“*Eite khatlekkhat kikhawlhna hoihtak in zangsiam hileng hamphatna lian mah mah ding hi. Vantung hamphatna a ngahsa mikhat peuhmah in, midangte’ lampi tengah khuavak tangsak ding vaipuak neipahpah hi. Tua hileh Pasion a it takpi mite in, amau pumpi angkhual milim biakna pan suakta pah ding uhhi*”—Ellen G. White, in *The Advent Review and Sabbath Herald*, November 18, 1884, p. 730.

“*Paul in eima kampau gamtat te in midang tengah koibang in sukha thei ahih manin eileh ei ki sittel dingin ama’ sanggamte hanthawn hi. Eimah mawhna neilo ding bang kihiphial taleh zong; upna neute a puktheihna ding peuhmah bangmah hihloh ding “nekna dawnna ah Pasion’ min thangsak ding” in hong hanthawn hi*”.

“*Corinth mite tengah Paul’ vauna kammalte in hun khempeuh a ding leh tuni tu hun eite a ding mahmah zong hithei lai hi. Milim biakna a cihte milim mahmah bia ngau ngau cihna hi tuanlo a, eima’ ang khualna, gualnopna leh eima’ lunggulhna teng bek picin sak denna cihte zong ahi hi*”—EGWhite, *The Acts of the Apostles*, pp. 316, 317.

“Nangma thuneihna bangin picing takin nasepna tawh Pasion’na sepna akhak ahal thei khat peuhmah na theihkhak leh; hih nawn peuhmah ke’n. Midangte’n thumaan a muh theihlohna dingun a mituh a humsak na peuhma hihke’n. Nakhempueh a kihihtheih hang, nakhempueh in phattuumna hong pia theilo hi”—Ellen G. White, *Testimonies for the Church*, vol. 9, p. 215.

Kikupding Dotnate:

1. Paul in, a khangham Christian khat’ gamtatna in a khangmoi khat gamtatna khantohna’ng khaktan thei cihi. Koibang danin hithei ding hiam ngaihsun dih in. Na khempueh tungsiyah ah Pasion itna; midangte zong eimah tawh akibangin itna in hih tona dawntheih na’ng lampi khat bek banghang in hithei sese hiam?

2. Christian te in akidop kei uhleh, a biakkhak theihuh bang milim om hiam? Na hoih hinapi, milim i suahtheih na bangteng om hiam? Na don mahmah nakhat in nangma’ milim hong suahlam na koici phawk ding hiam?

3. Paul in midangte thuhilh napi; lungdamthu hilhna ah amah miginalo a suahloh nadingin (*1Cor. 9: 27*) ama’ pumpi kakideek kidaam cihi. Tukalsung sinna tungpan in; nangmah, lungdamthu hilh dingin hong kilawmsaklo bangthu om hiam?

4. *1Cor. 10* sungah, Paul in milim biakna lauhuaina a genna ah “*milim biakna pelh un*” (*1Cor. 10: 14*) cihi. Milim biakna banghang in siahuai thei hiam?

Lesson 6

August 1–7

KHA SIANGTHO SILPIAK



SABBATH NITAKLAM

Tukalsung Simding: *1 Cor. 12; Eph. 4: 11–13; 1 Cor. 13; 1 Pet. 4: 8–11; 1 Cor. 14: 27; Amos 3: 7.*

Kamngah: “Na deih lianpen uh ki itna mah hisak un. Kha Siangtho hong piak siamna a tuamtuam te sung panin, thuhilh siamna ding na hanciam pha penpen un” (*1Cor. 14:1*).

Mihing’ pumpi mahbang in, pawlpi in zong na tampi kigawmkhawm hi a, na khat sim in akibanglo nasep khatciat leh siamna khat ciat nei uhhi. Tua silpiakte pen itna tawh a kizat ciangin, tua silpiakte in Thumgawm Pasion tawh kipawl theihna lungtang hong guan hi.

Tukal sungin *1Cor. 12-14* sunga kha silpiak thuhilhna teng entel ding hihang. Hi tengpen biakna sunga Christian hihna sungah amau’ lam-et gamtatna (*1Cor. 11-14*) pan in tawmno khat kisin ding hihang. Paul’ thu bulphuhpi penin kithutuah lohna tawh buaina teng ahi hi.

Hih thubuaina teng vengsakna dingin; pawlpi in pumpikhat hi a, nasep tuamtuam a nei na tampi kihel in “*Christ’ pumpi a khansak theihna*”

ding” (*Eph 4: 12*) deihna ahi hi. Tom gen leng, ‘a kibanglo nate panin, ki pumkhatna hong tungsak thei Topa Pasion in a pawlpi tungah kha silpiakte hong pia hi.

A taktak in cileng, Paul in 1Cor. 1-4 sunga pawlneu kikhenna a gengen teng a lungsim sungah tenglai a; a dawnna pen, pawlpi mite lakah Christ sungah kipumkhatna leh kithutuahna a neihloh uh hang ahi hi. Tu in Paul in, khalam silpiakte tawh kisai in ama’ telna bangbang pulaak in, tuathu mahmah khangto sakngiat hi. Paul a dingin, pawl neuneu kikhenna pelh theihna ding pen Christ leh Kha sungah kipumkhatna bek ahi hi.

SUNDAY

August 2

Silpiak Tuamtuamte

1 Cor. 12: 1 sungah Paul in, thulu thak khat hong pulaak leuleu a, “*tu in tua tawh kisai in*” cih. Greek pau in *tôn pneumatikôn* cihpen “*Khalam Silpiakte leh kha mite*” namnih in kiletkhia thei ahih manin: Laisiangtho thukante in Paul gennop pen “*khalam silpiakte maw, kha mite maw*” cih kikum zelzel uhi. 1Cor. 12: 4 sungah Paul in ‘*Kha silpiak*’ ci sitset ahih manin, Paul in khalam silpiak gennuam hihtuak zaw tham hi.

1Cor. 12: 2, 3 sungah Zeisu in Topa hi ci in hangsan takin pulaakna pen Kha Siangtho silpiak a masapen hi Paul in cih. Laisiangthothak hunlai in Zeisu in Topa hi cih ding pen Caesar in Topa hilo hi cihna zong ahi hi (*Sawl. 17: 7; John 19: 12, 13*). Tuapen a simtham in kumpipa langdo ding hanthotna hi pah a, sihdaan piaktaak hipah hi.

Zeisu leh Paul in, bawlsiatna lak sihlawh theihna ding mun ah zong Pasion sungah upna pen Kha silpiak hi ci in pahtawi veve hi. Upna pen silpiak bulpi taktak ahi hi. 1Cor. 13: 13 sungah zong upna mah amasapen in gual hi. 1Cor. 12: 9 sungah upna pen khalam silpiak hi cih Paul in telgen mahmah hi. Cihte hang, silpiak dang tampitak zong omlai hi. Kha Siangtho in a kibanglo silpiak tampitak mah hawmkhia a, a kism bangbang in “*Ama’ deihna bangin mimalkim tungah*” (*1Cor. 12: 11*) hongpia hi.

1Cor. 12: 1–6. Hihmun in bang bulphuh pen hiam?

Hiteng ah “*a tuamtuam*” acih in silpiak namtampi cihna ahi hi. 1Cor. 12: 1 sunga “*khalam silpiakte*” ci in Paul in a minvawh pen a tang 4 pan 6 sungah muhdan namthum tawh telgen kik a: “*silpiak*” (*charisma*), “*Pasion’na sepna*” (*diakonia*), leh “*gamtatna*” (*energçma*) ahi uhi. Hih kammal tengin khatna tuamtuam a neihte uh hang, Laisiang tho in hoihtakin a gawmtuahsa ahih manin sittel khentel zong kul tuanlo hi.

Khalam silpiak peuhmah in, thungawm Pasion’ omzia siks in kipumkhat theih nading in hong kipia ahi hi (*Eph 4: 8-11*). Kha Siangtho in thu ummite silpiak a piakuh ciangin, thu ummite lakmah ah Christ a dingin na a semkhia sak pen Pasion mah hileuleu hi (*1Cor. 12: 5, 6*). Thu ummite zong a mimal in silpiak kipia ciat (*1Cor. 12: 11*) ahih hang, thu ummite khempeuh kigawmkhawm in phattuumna piangsak hi.

Paul in kipumkhatna a bulphuhna phawk kikin. Banghang in pawlpi a dingin thupi thei hiam?

MONDAY

August 3

Kibanglona panin Kipumkhatna ah

Khatbek hihna kammal pen 1Cor. 12: 4-6 sungah “*Kha Siangtho a kibang, To a kibang leh Pasion a kibang*” cihteng pen 1Cor. 12 sungah dimkeei hi. Paul in, *Kha Siang tho akibang khatbek* (*1Cor. 12: 11*), *pumpi zong khatbek* (*1Cor. 12: 12*), *pumkhat* (*1Cor. 12: 12, 13, 20*) hi a, *Kha Siangtho khat* (*1 Cor. 12: 13 cikik leuleu*), *khatlehkhat ki thu tuakin kilemkim* (*1Cor. 12: 25*) cih.

Ki pumkhat ding deihna tawh kipawl in, Paul in, Christ’ pumpi sungah a kipawl “*na tampi*” (*1Cor. 12: 12, 20*) om a, “*Ama’ sungah hong baptized a*” (*1Cor. 12: 13*), “*na khatbek neilo, nam tampi nei*” (*1Cor. 12: 14*), ‘*pumpi khempeuh*’ (*1Cor. 12: 17*), ‘*a mal tuamtuam*’ (*1Cor. 12: 18*), ‘*pumpi nate*’ (*1Cor. 12: 22, 23*), ‘*nate a vekpi*’ (*1Cor.*

12: 26) cih. Hihteng pen, kithutuahna leh kibanglona tungtawn in, khalam silpiakte’ a deihna in, a kibanglona panin kipumkhatna a hanthotna ahi hi.

Hih pumkhatna leh kibanglona in Pasion’ omzia pulaakkhia hi. Pa in zong khat, Tapa in a dang khat leh Kha Siangtho zong a dangkhat mah ahi uhhi. Tua mimal thum te khat ciat mahin nasemkhawm in pawlpi puahpha in nasep na’ng vangliatna guan hi (*1 Cor. 12: 4-6; Ephes 4: 11-13*).

1Cor. 12: 12–31 simin. Na a tuamtuam te tampi anei pumpi tawh pawlpi leh a mite a genteh sese theihna in banghang hiam?

1Cor. 12 sungah, deihna bulpi khat pen, pumpi tunga nate khempueh in, khatciat in a omuh a, kibang hetlo (*1Cor. 12: 15-20*) uh hinapi, khatlehkhat kithutuah uh a, nasem khawm thei uhhi (*1Cor. 12: 21-26*). Khe in ama’ paina ding mun mit in ensak a, mit in bangmah lawng theilo ahihhang, khut bekin lawngthei hi. Nate pawlkhat in, na dangte sangin thanemzaw (*1Cor. 12: 22*), vangniamzaw deuh (*1Cor. 12: 23*) hitaleh, avekpi un a kisas vive mah ahi uhhi (*1Cor. 12: 22*).

A dahhuai thukhat, Corinth mite in silpiak pawlkhat pakta uhin pawlkhat donnop lohna lungsim nei uhhi. Corinth mite, tuabang mawhna pan kidaal theihna dingin, Paul in “*a hoihpen lampi*” (*1Cor. 12: 31*) ahi itna nei dingin sam hi. Thukhat panin, bang silpiak peuh hitaleh, itna tawh pilvang takin a kizat nakleh, Pasion lungdam sakna ahi hi.

1Cor. 12: 8–10, 28; Rome 12: 6–8; leh Ephes 4: 11 sungah silpiak sazian enphakik in. Nang silpiak bang hiam? Christ’ pumpi koibang in puahphatsak ding nahi hiam?

TUESDAY
“A Hoihpen Lampi”

August 4

“Itna cihpen silpiak tampi lakah khat hiziau lo hi. Tua silpiakte khempueh in amau’ ngiimna mun a tun hamtang theihna lampi ahi

hi” —Carl P. Cosaert, “1 Corinthians,” *Andrews Bible Commentary: New Testament* (Berrien Springs, MI: Andrews University Press, 2022), p. 1643.

1Cor. 13: 1–7 leh 1Peter 4: 8–11 simin. Kha silpiakte tawh kisai in itna in bang dinmun ah maapang hiam?

Corinth masa 13 in khalam silpiak peuhmah itna tungtawn in a kilawm bangin kizang thei hi cih hong hillhcian hi. 1Cor. 13 a kipatna ah Paul in 1Cor. 12 sunga silpiakte siksian in, itna a om keileh tuate khempueh in manneilo ahihna pulaak phadiak hi. Tua hi a, *pilna* (*1Cor. 12: 8*) leh *upna* (*1Cor. 12: 9*), “*mualte a kinsak zo*” *upna* (*1Cor. 13: 2*) in zong, itna omkei peuhleh a mawkna ahi hi (*1Cor. 13: 2*) cih. Upna omlo in pau tuam tampi pautheihna (*1Cor. 12: 10, 28, 30*) in “*a bil-aphuai zam leh daaltuah kitum tawh ki bang lel*” (*1Cor. 13: 1*) cih. Genkholna silpiak te thupitna zong itna om keileh tuamah bang ahi uhhi (*1Cor. 13: 2*).

1Cor. 13: 4-7 sungah, itna neihna leh neihlohna teng bulphuh leuleu a; itna in bangteng hih a, bangteng hihlo cih ahi hi. Itna a kilangsak dingin a kammal zatte pen, eima ngahna lam hizawlo in, eima’ hih ding lam vive hizaw hi. Tua hi a, itna neite in (1) *lungduai* (2) *migi* (3) *thumaan sungah lungdam* (4) *hehhak thuakzo* (5) *na khempueh um* (6) *nakhempueh lam-en* (7) *lungduai takin ngak* hi.

A kilehbulh in itna in (1) *hazatna lungsim neilo* (2) *kisatheilo* (3) *kiphasaklo* (4) *heh pakpaklo* (5) *angsung khaullo* (6) *a kilawmlo gamtalo* (7) *mawhna ciamtehlo* (8) *thumaanlote ah lungdam ngeilo* hi.

Hiteng ah gamtatna 15 tengin, tua silpiakte a kilawm takin zattheihhna dingin kiptakin lampi hong lah hi. Adiak in, itna taktawh kipawlte kikupna in 1Cor. 12 leh 14 sungteng ah om uh hi a, tualai munnih sungah Paul in khalam silpiakte tawh kipawl kinial na omthei teng a hillhciaanna ahi hi. Khalam silpiakte peuhmah pilna tawh zatsiamna ding

pen itna in a thupi pen ahi hi. Itna pen upna leh lam-etna tawh liangko kikim in a kikoih hi a, *“tua thum sungpan in itna lianpen hi”* (1Cor. 13: 13).

Banghang in upna sungah itna in thubulpi hithei sese hiam? Pasian hong itna bang i neihtheihna dingin, thungetna tawh khuavak lengkik sakna sangin lampi hoizaw bangdang omlai hiam?

WEDNESDAY

August 5

Pau Tuamtuam Silpiak

Pau tuamtuam te silpiak tawh kisai in, Laisiangtho sungah tua silpiakte alim aliim honglahna (*Maku 16:17; Sawl. 2: 1–13; Sawl. 10: 44–48; Sawl. 19: 6*) sungah, 1Cor. 13 sungah pau tuamtuam silpiak sungah gamdangpau pautheihna siamna pen khalam silpiak taktak ahilham telgen mahmah hi.

Kam tuamtuam pautheihna silpiak pen Paul in 1Cor. 12: 8-10 (*1Cor. 12:28, 30; 1Cor. 13: 1, 8 enkak*) sungah pulaak hi. 1Cor. 14 sungah zong genphapha lai hi. Greek pau in *glōssa “kam”* pen 1Cor. 12-14 sungah sawmnihi vei sang tamzaw om a; 1Cor. 14 sung bekah zong sawmlehnga vei tak om hi. Tua banah, Greek pau mah *heteroglōssos “pautuam”* zong 1Cor. 14: 21 sungah om hi. Hih nambat sang penin kamtuam pauna tawh kisai Paul lunghimawh cih kipsakna khat hipah hi. Hih khalam silpiak pen zatkhialh na leh simmawhna in Corinth pawlpi sung mipi biakpiakna ah buaina tuamtuam piangsak hi (*1 Cor. 14:23, 27, 33, 40*).

1Cor. 14: 5, 13, 26, 27 leh 1Cor. 12: 10, 30 simin. Pautuam silpiak tawh kisai Paul in bang thu hilhcianna tuam neilai hiam?

.....

Kampau tuamtuamte pautheihna silpiak pen tua pautuamte' khatna zong gentel theihna pilna tawh tonkhawm ding (*1Cor. 14: 9*) a: tua ahikhei ngalleh tua silpiak zatna in phattuumna neilo (*1Cor. 14: 6*) hi.

Hiteng ah Paul in a khatna gentheihna leh telcianna thupisak hi. Kamtuamtuam pautheihna a gensiasia hizawlo in, genkholnate nangawn a awlmawh lozo Corinth mite' lungsim puakzia kilanglua sa ahil manin a gen ahilham zing ciangin mutel tading hihang.

Hiteng ah, Corinth mite khempueh in gamdang pau pauthei leluh cih lunggulhna a neihna zong phawkhuai (*1Cor. 14: 5*) a; ahilhang tuabang piang dingin lam-et tuaklo hi (*1Cor. 12: 10*).

“Kha Siangtho sungah kituiphum ding ngetmaa in, pautuamtuam pautheih kul cih ngaihsutna pen, 1Cor. 12 leh 14 sunga Paul' hilhcianna teng palsatna ahi hi”—Raoul Dederen, *Handbook of Seventh-day Adventist Theology*, electronic ed., vol. 12 of Commentary Reference Series (Hagerstown, MD: Review and Herald Publishing Association, 2001), p. 620.

Na pawlpi sungah kamtuam pauthei a omkha hiam? Christ a dingin midang te a vaphak na'ngin koibang in zangthei uhhiam? Hihthu in Paul hong hilhcian kamtuam pauna tawh kisai koibang in hong telcian sak hiam?

THURSDAY

August 6

Thuhilh Theihna Silpiak

Thuhilh theihna silpiak in khalam silpiakte' thu Paul genna ah athupi dinmun khat ah om hi. Kamtuamtuam pautheihna silpiak a genmaa in, Pasian' thu hilhtheihna silpiak genmasa hi (*1Cor. 12: 10, 28; 1Cor. 13: 8*). Kampau theihna silpiak gen masaleh thuhilh theihna silpiak tawh etkak ciangin; kampau theihna in thuhilh theihna tawh akizopna ah ama' thupitna kiamtuam ding cih a ngaihsutna ahi hi (*1Cor. 14: 4, 5, 6, 22*).

Ephe 4: 11–13 leh 1Cor. 14: 3, 4 simin. Khalam silpiak teng a huamsa in, thuhilh siamna silpiak pen koibang in hilhcian tuam hiam?

.....

Thuhilh siamna silpiak in, puahphatna, hanthotna leh hehnepna ahi hi (*1Cor. 14 : 3; Sawl. 15: 32*). Thuhilh siamna cihpen, mailam thu ding bekbek genkhol bek thamlo, tulai hunin zong nundan kipattah dan ding zong gen ding ahi hi. Greekpau in *propheteuô* pen, “*thu khatpeuh genkhol*” ahil keileh “*mikhat tungtang thu gensak*” cihna ahi hi.

Etpak theih dingin, *telcian masak* dingin Sawltak 2: 29-31 (*Amos 3: 7*) sungah David pen kamsang khat ahihna tawh “*mukhol, thei khol*”

cihi. Telcian ding nihna pen Sawl. 15: 32 sungah **Judas** leh **Silas** tegel zong kamsang mah nakici hi. Amau *thuhilhna* uhtawh thu ummite tawh sauveipi thu kikum in, amaute’ lungsim thumaan sakin thahatsak hi.

Ephet 4:11–13 sungah, nungzuite’ hun sungteng peuhmah khalam silpiak tawlnge ngeilo hi. A tawp dong mahin kipsuak ding hilel hi (*Sawl. 2: 39*). Mi khatpeuh in kamsang kahi a cihleh Laisiangtho siksian in amah mah kisittel hen. A zaipi in genleng thukhun 4 om ding hi.

Amasa, ama’ thugen hong tung ding hi (*Thkna. 18: 22; Jer. 28: 8, 9*). **Anihna**, ama thugen te in kamsang dangte genna tawh kithutuak ding hi (*Thkna. 13: 1–3; Isa. 8: 20*). **Athumna**, ama’ nisim nundan pen Christ tungah ki-aap ding hi (*1John 4: 1–3*). **Alina**, kamsang zuaute pen amau’ gamtatna tawh kithei ding Zeisu in (*Mate 7: 15–20*) cih: kamsang maante zong tua mahbang hong hiding hi.

Kha Siangtho silpiak in hun nunung a beibaang pawlpi’ dinmun lahna hi Mang muhna laibu in cih (*Mang. 12: 17; Mang. 19: 10*). Ei Seventh-day Adventist te in, tua khalam silpiakte pen Ellen G. White tungah kipia a, ama’ laigelhte in pulaak hi ci in um hi hang.

Ellen G. White’ kamsang silpiak pen, banghang in eite’n umthei ihi uhhiam? Ama’ maapanna leh thu neihna tawh kisai dot ding bang omtheilai hiam?

FRIDAY

August 7

Ngaihsutbeh Ding: Roswell F. Cottrell, “Spiritual Gifts,” pp. 5–16, in Ellen G. White, *Spiritual Gifts*, vol. 1.

“*Mite in Topa muangin nasem dingin kuankhia uhhen. Tua hipeuhleh Pasion in amaute ompihpah ding hi. Khate ngahpih ding a kikheelna omsak ding hi. Nasem mi khat in thuhilh siampa, adang khatin laigelh siampa, adang khat in lungsim hoih deihsakna taktawh thungenpa leh adang khat in lasa siampa cihbang hithei ding hi. Midang khatin zong Pasion’ thu gensiamna neithe i ding hi.*”

Tua silpiak malkhat simin Pasion’ vangliatna hongsuak ding a, Amah in a nasem pa panpih ding hi. Pasion in mikhat tungah kampau siamna, adangkhat tungah pilna leh a dangkhat upna pia hi. Ahihhang a vekpi un lutang khat nuai ah nasem khawm ahi uhhi. Silpiak tuamtuaume in sepzia tuamtuum te piangsak himah taleh, “septheihna ding siamna a hong pia Pasion akibang ahi hi” (1Cor. 12: 6).

“*Eima silpiak neusa in kuamah’n simmawh kei hen. Nasem in kuankhia un. Na lian semthei ke’ng ci in uplohna tawh kuamah’n mawk khutzep in omkei uhhen. Nang mah ki en kei in. Na makaipa en in. Kiniamkhiatna, lungsimtakpi leh itna tawh nahih theihzah semin*”—EGWhite, in *The Advent Review and Sabbath Herald*, April 12, 1906.

“*Eimah mimalsim in midangte lungsim tawh panpihna kisam hihang. Pasion in ei’ lungsim bek hilo, mi’ lungsim sung peuhah nasem zawsop thei ding hi. Mimal tuam tuam tungah silpiakte in, “Pasion’na sem ding, Christ’ pumpi puahpha dingin, misiang thote kisakhol sak ding hi” (Ephet 4: 12).*”

“*Eite’ maiah haksatna omden ding ahihte i hang, i makaipa zui cinten in, khutkilen ki pumkhat in tua haksatna te maingat ni*”—EGWhite, *The Upward Look*, p. 141.

Kikupding Dotnate:

1. Khalam silpiak tawm ngaihsunlai in. A kiletkhialo kampau sangin banghang in thuhilhna thupizaw hiam? A kisapleh, Paul’ hilhcianna na matkik theihna’ng in 1Corinth 14 simkik in.

2. EGWhite' nundan leh a nasepna teng kikum unla, i pawlpi in banghang in amah khalam silpiak ngah takpi ci in umthei ihi hiam? Hih silpiak panin pawlpi in bang thupha saanlawh ihi hiam? Tua silpiakte zatsiamna ding bang tona peuh om hiam?

3. Nang hong ittaktak mi li leh nga khawng gualsuk in. Nang hong itna in itna taktak ahih nakoici theih hiam? Khalam silpiakte kikupna ah Paul in ki itna thu hizahta in a genna thu koibang in hong hilhcian naci hiam?

4. Itna thupi mahtaleh, thumaan a gen mikhat ngaihtaakcing ahihna khentel theih na dingpen hihbek banghang in hilo thei ding hiam?

Lesson 7

August 8–14

A KIBANG ITNA KHAT



SABBATH NITAKLAM

Tukalsung Singding: *1 Corinth 13; Mate 24:12; Gal. 5:22, 23; 1Tim. 1:14; 1 John 4:8.*

Kamngah: “Tu laitakin a omlai thuthumte pen, upna, lam-etna leh itna hi a; tua thumte sungpan itna mah a thu lianpen ahi hi” (*1Cor. 13: 13*).

Itna in nakhempueh zothei hi. Tua hangmah in Paul in zong nakgen mahmah hi. Mi tampi in i theih Greekpau *agapaô* pen Laisiangthothak sungah itna ci in kilet a, Paul’ laikhak sungah 135 sang tamveizaw om hi. Tua pen laisiangthothak sunga omzah alang phial mah ahi hi. Corinth pawlpite tungah Paul in a laikhakna ah a thu bulphuhpi ahihlah hong pulaakna mah hipah hi.

Laisiangthothak sungah mun kician mahmah pawlkhat; Rome 8: 35–39, 1Cor. 2: 9; 1Cor. 8: 3; Galati 2: 20; Colossian 1: 13; 1Thess. 3: 12 leh a dangzong omlai hi.

Ahihhang 1Cor. 13 a khengzo bangmah omlo hi.

Nungkal in, itna lotawh, nakhempueh, khalam silpiakte nangawn a mawkna cih mukhin hihang. Tukul sungin, 1Cor. 13 sungah akibang itna khat, a thukzaw in ensuk lai ding hihang.

I muhding thupen, itna cih lungsim ngaihsutna ciang khatbek hilo a, lungsim puak zia leh ngaihdan khat ahi hi. Tua ngaihdan pen eima' nuntak sungin gamtat kampauna tawh lahkhiatna ahi hi. Tualo peuhmah khiatna nei vetlo hi.

Itna in bang hi a, bang hih cihpen, Zeisu' nundan sungah kician takin hong kilah khia khin hi.

SUNDAY

August 9

Omloh Theihloh Itna

Nungkal in 1Cor. 13 sunga om itna' thukhun kisin khin hihang. Tu in Paul' kam malte a thukzaw kanlai in to khia ding hihang.

1 Corinth 13 simin . Itna thu a gen teng tomkaih in.

.....

Paul in kampaute (1Cor. 13: 1), kamsaanna, theihtelna, pilna, upna (1Cor. 13: 2), phattuumna neite (1Cor. 13: 3) a mawkna hi cilo hi. Itna a omkeileh amawkna hi cibek hi. Paul in a gen *itna* pen “*Strawberry duh ing, ka lawmte itlua ing, kazi kata ngailua ing*” cihpeuh hilel lo hi. Video sunga i muh ki it kingaihate peuh hilo hi. Kiteenna mopawi sermon khawngin kizang mahmah ahihang hukna lanna tawh itna te hilo hi.

Hih *itna* pen lawmngaihna, migitna, hoihna leh hehpihna khawngah khiatsuk theih ding hilo hi. Cihte hang, tuate in zong amau' dinmun tawh itna pen atawm atam in pulak veve uhhi. Hih *itna* pen Kha Siangtho in mihing tungah hong tuam piakngiat ahi hi. Tua hi a, 1 Corinth 13 sunga Kha Siangtho in hongpiak *itna* in, lawmngaihna, migitna, hoihna leh hehpihna cihte zong piangsak veve hi. Gamtatna, lungsim leh ngaihsutna teng khempeuh tawh Christ leh vengte tung kipiakkhiatna ahi hi.

Mate 24: 12 simin. Zeisu in bang vauna hiteng ah hong pia hiam?

.....

Tua ahih manin *agapç* in kisampha mahmah hi. Christ' vangliatna hangin, eima' innsung, pawlpi sung leh vengsung ah hi itna kivengsak theilo hi. Singlamteh tungah eite a dingin sihna nangawn a thuaklawh Zeisu' limlahna kinei gige hi. Hih sangin a hoihzaw a vanglianazaw itna lahna bangdang omnawn ding hiam? Eite in tuabang *itna* zah liang ki lakhia zolo ding hi taleh, Pasian' hehpihna tungtawn in, eima nundan sungah eima' hih zawhzah buangbel lahkhiat ding mah hiveve hi.

Hihbang itna i lahkhiatna ah na dangte khempeuh sangin, hih bang itna a kisam phadeuhte tungah, a thahat a puahphatna lam a piangsak theih ding hun in bang hun hipen ding hiam?

MONDAY

August 10

Itna in Ahiteng

Corinth Masa 13: 4–7 in tua chapter buppi laigil ahi hi. Paul in itna' dinmun teng bulpuh in – itna in bang hi a, bang hi lo; bangteng hihthei a, bangteng hihtheilo cihtawh pulaak hi. Kha Siangtho tawh a kidim mikhat in koibang in gamta cih ettheih dingin tua mipa' *itna* hong lakhia hi. Itna a lahkhiatna sungah, Paul in sepna kammalte zang hi. Paul a dingin *itna* cihpen lungsim leh lawpna peuh sangin gamtatna hipa zaw hi.

Tua ahihleh *itna* in bangteng hih hiam?

1. Lungduai (makrothymeô). *Makrothymeô* pen tona, haksatna te lakah lungduai cihna hi. Khatlehkhat kithuakzawhna zong ahi hi (Eph. 4:2).

2. Migi (chrçsteuomai). *Chrçsteuomai* pen laisiangthothak sungbup hiteng bekah om a, mundang ah tua pan a kaakhia laimalte bel om uhhi. Septuagint kici Greek Laisiangtholui sungah hih kammal pan in a kaakhia kammal tampi om a, Late sungah Pasian' hoihna leh hong hehpihna tawh kipawl kammalte tampi takmah om hi (Late 145:9). Itna in hoihna lah

cihciang in, Paul in, midangkhat i it nakleh Pasian hong veina leh hong hehpihna lim ciing ding cih.

3. Lungdam (synchairô) thumaan sungah. *Synchairô* mite tawh lungdam khawp theihna ahi hi (*Luka 1:58; Luka 15:6, 9; 1 Cor. 12:26; Phil. 2:17, 18*).

4. Thuakzo (stegô) nakhempueh. Laisiamte in *stegô* pen kemcinna tawh “*siin*”; puahphat nading in “*thuak*” cihte kikum uhhi. 1Cor. 9: 12 sunga tua thuakzawhna cihpen, laisiang- thot eite khempueh a dingin teeltheih ding anihna vive ahihi.

5. Um (pisteuô) nakhempueh. *Pisteuô* pen Greekpau upna (*pistis*) panin hong pai ahi hi. 1 Cor. 13 sunga, na khempueh um cihpen, khatlehkhat kitelkhihna teng hemkhia cih.

6. Lam-en (elpizô) nakhempueh. Laisiangthothak sungah, *elpizô* pen thuhoih hong piang ding cih lam-en tawntung a cihna ahi hi.

7. Lungduai takin (hypomenô) ngak. 1 Corinthians 13:7 sunga *stegô* leh *hypomenô* cih laimal tegel in kilamdanna neilo uhhi. Haksatna sungah thuakzo cihna ahi hi. Paul in kam tawpna ah *stegô* a zatkikkik noploh manin *hypomenô* zang hihtuak hi. A kibang thu khat pen kammal kibanglo a zatna hangin upna leh lam-etna a kibulphuh zawkdeuh nading in a zat hihtuak hi. Thukhat panin, upna leh lam-etna hangin itna kipkho thei hi.

1Corinth 13: 4–7 leh Galati 5: 22, 23 simkaak in. Hihmun tegel kikal ah a kibang thu namnih namu hiam? Eima’ nunna sungah hibang itna koibangin neitheih ding hiam?

TUESDAY

August 11

Itna in a Hihlohte

1Cor. 13: 4–7 simkik in. Itna tawh kisai Paul in banghang in a hoihnam hilo in a sialam tawh hilhcian zawsop hiam?

.....

Zanni in, itna in ahiah na sagih entel khin hihang: tuni in, itna in ahiahloh na nam giat en ding hihang.

Itna in ...

1. Hazatna lungsim neilo (zeloô). *Zeloô* pen ahoihlam in zangleng ‘*a hoihpen silpiakte deih*’ (*1Cor. 12: 31*). ‘*Khalam sialpiakte deih (zeloô)* (*1Cor. 14: 1*), ‘*Pasian*’ *thu hilh ding ngaihsut lianpen*’ (*1Cor. 14: 39*) cihhi. Sawl. 7: 9 sungah ahiahleh, lehpai zawsop hi. Khalam silpiakte deihna hoih lel hinapi; silpiak ngahte hazalo ding, tua hazatna in Pawl khenna piangsak hi (*1Cor. 3: 3*).

2. Kisatheilo (perpereoimai). Hih *perpereoimai* cihpen midangte kiangpan pahtawina ngahna dingin kisaktheih kampauna hi. Itna peuhmah in eimah kibulphuhna neilo hi. Anuai ah kitel semsem lai ding hi.

3. Kiphasaklo (physioô). Hih *physioô* in 1 Corinthians 8: 1 sungah Paul kammalkician mahmah “*theihna in kisatheih sak a; itna in mite kipsak hi*” cihhi. Amah a ki bulphuh a kiphasak acihna ahi hi.

4. Heh pakpaklo (aschçmoneo). Hih *aschçmoneo* in a khatna zailua mahmah hi. Zai citateu zongin mihing kikhawlhna leh lungsim omzia lamah zahtak huailo, zumhuai, ki lawmlo, muh thadah huai gamtatna hi. Paul in a genthapai keei Corinth mite lakah mi *thahatte* leh *thanemte* a cihnopna hihtuak pen hi (*1Cor. 4:10, 1 Cor. 8*).

5. Angsung khaullo (zçteo). 1Cor. 10: 24 sunga Paul in: “*A kuamapeuh in note angsung dingbek zongkei unla, midangte’ phattuum nading zongzaw un*” acih tawh a kibang ahi hi. **Itna** in midangte a dingin ama’ hamphatna piakhia liang hi (sinna 5). Mimalkim in midangte a ding vive kizonsak leng i veikpi in kihampha pah hi.

6. A kilawmlo in gamtalo (paroxynô). Hih kammal *paroxynô* in a hehbaih mahmah te lungsim sung omzia a cihnopna ahi hi. **Itna** i cihin lungtomlo cihna ahi hi.

7. Mawhna ciamtehlo (logizomai). Hih *logizomai* cihin ciaptehna lamtawh kisai a; **itna** in mi' mawhna ciamteh lo cih. A lehlam panin **itna** in maisak cihna ahi hi.

8. Thumaanlote ah lungdam ngeilo (chairô). **Itna** in mi' mawhna ciamtehlo bek thamlo tuate sungah zong lungdamlo hi. Midangte it takpi leng, amau' khialhna sungah i lungdam kei ding uh a, huh theihna'ng lampi zongzaw ding hihang.

WEDNESDAY

August 12

Zeisu' Limsuun Khat

1Cor. 13: 4–7 simsuk leng, limte khempeuh eima' lahkhiat kikna ah atawm atam in kithanem mahmah cih i phawk ciangin hong dahhuai ngeungau ding hi. 1 Corinth a gelhlai in Paul in Zeisu' lungsim neih tuak mahmah hi. Christ in ahihleh tua omzia teng khempeuh picing takin hong lahkha khin hi. Tua hi a, Paul in hong lahkhiat itna pen Zeisu' limsuun khat ahi hi.

John 13: 1, 34; John 15: 9, 12; 1Tim. 1: 14; 2Tim. 1: 7, 13; 1John 3: 16; leh 1John 4: 7–12, 19–21 simin. Hihmun tepan itna thu bangteng i kisin thei tam maw?

.....

Pasian in itna hi (*1John 4: 8*). A Tapa hongpiak dongin hong it hi (*John 3: 16*). Zeisu in zong hih itna pen picing takin hong lahkha hi (*Heb. 1: 3*). Itna bangzah in lahkha hiam cih i theihnop leh Zeisu sawtveipi et ding ahi hi. Laisiangthothak sungah Zeisu' limsuun i muhnopleh; 1Cor. 13 sunga Amah'n itna' hoihna a lahna teng hiding hi.

1. Zeisu in lungduai hi. “A mawhnei phabel kei kahihna hangmah in, *nidang ciangin Amah umin nuntak tawtungna a ngah ding mite etteh theih dingin Christ Zeisu in a lungduaina keitungah cingtakin hong lahtheihna ding*” (*makrothymia*)” (*1Tim. 1: 16*).

2. Zeisu Hoih hi. Laisiangtho in “**Topa Hoih hi**” (*1Pet. 2: 3*) cih. Hiteng ah “**Topa**” in Zeisu a cihna ahi hi. “**Hoih**” cihpen Greek pau **chrçstos** hi a, which comes from the same sepna *chrçsteuomai* pan hong kaa “*hoihna lahna*” pan hongpai hi (*1Corinthians 13: 4*).

3. Zeisu thumaan sungah lungdam. Zeisu in Pa' deihna zui in Pa' itna a ngah ciangin lungdam hi (*John 15: 9–11; John 17: 12–14*).

4. Zeisu in nakhempeuh thuak. Hebrew 12: 2, 3 sungah Zeisu in “*Singlamteh thuak*” ci hi “*maizumna kihta lo in singlamteh tungah sihna thuak ding ut*”. Kuamah dang Zeisu bangin a thuakzo omlo hi (*Phil. 2: 8*). Ama' maiah a om lungdamna hang hi!

5. Zeisu in nakhempeuh um. Ananias in Paul kikheel takpi hiam ci in a dot ciangin (*Sawl. 9: 13, 14*), Zeisu in, “*Keima'na sem dingin ka teelkhin hi*” (*Sawl. 9: 15*) cih. Zeisu in mihing pen amau' hihna bangin muziau lo a, Ama' vangtawh bang hong suak ding cih tawh mu hi.

Itna maan taktak in koibang cih Zeisu in koibang in hong lahbehbeh lai hiam?

THURSDAY

August 13

Upna, Lam-etna leh Itna

Tu in, itna in, lungduai, hoih, lungdamthei, kikheello, thu um, lam-en in thuakzo ci hang a; Zeisu in tuateng tawh kidim hi. Khatvei Zeisu sungah tuateng i muh khit ciang in, kalsuan kikna ding pen zuih ding hipah hi. Tuapen Corinth mite a dingin Paul' deih sakna ahi hi.

Tua hi a, “*lo*” a cihteng hemkhia peuhleung, Corinth mite gamtatzia taktak teng hong kilang ding: *hazatna lungsim nei, kisathei, kiphasak, hehpakpak, angsungkhual, a kilawmlo gamta, mawhna ciamteh, thumaanlote ah lungdam* hi. Paul in Corinth mite gamtatna teng kekkek hong gualsuk diudeu hi”—Verlyn D. Verbrugge, “1 Corinthians,” in *The Expositor’s Bible Commentary: Romans–Galatians*, revised edition (Grand Rapids, MI: Zondervan, 2008), p. 372.

Corinth mite in kisin ding tampi nei uh a, eite zongin i nei hi. Itna in bang teng hih a, bangteng hihlo cih i sinkhit ciangin; Paul in, itna maan taktak neihtheihna dingin, tawn tung itna neih masak ding hanthotna tawh a thu khupsuk hi.

Khatvei ciangin, genkholnate kisas nawnlo ding a; eite in pau namkhat bek kipau ta ding; tua ciangin, mihing’ pilna in kicingzolo leh Pasion’ theihna pilna (*1Cor. 13: 12*) in, pilna thak silsel hong hiding hi. Kham silpiak khempeuh in zong amau’ omna’ng a kispna teng a picin takciang in khawltu ding uhhi (*1Cor. 13: 10*). “*Itna ahiehleh om paisuak ding hi!*” (*1Cor. 13: 8*).

Tua mahbangin Christ hong kumkik ciangin, upna pen muhna hita ding hi (*1Cor. 5: 7*), sawtpi panin i lam-et tengin thutaktak hita ding hi (*Rom. 8: 24*). Adiak in thum- gawm Pasion in Ama’ dinmun ah kiptak in ompaisuak ding hi. Upna leh lam-etna cihte in zong a tawntung in kip paisuak ding hi. Upna in hotkhiatna ngahna (*Rom. 4: 3*) leh lam-et lunggulhna in zong leitungthak ah lungdam nopsakna hi ding a, tatkhiatna ngahna ci in kip paisuak ding hi. Pasion hong itna a hiehleh zong kip paisuak ding hi.

A sawtlo in i Topa’ maitang muta ding hihang (*1Cor. 13: 12*). Tuani hong tun dongin eite in i nuntakpih ding hoihna thum teng: *Upna, Lam-etna* leh *Itna* ahi uhhi. Hih thum kigawmna in Kha Siangtho tungtawn in Christian nundan a cingtaakna ahi hi. Tua a hih manin Christian tetungah tuathu kisan kinken ahi hi (*Rom. 5: 1–5; Gal. 5: 5, 6; Eph. 1: 15, 18; 4:*

1–5). Itna ahiehleh a lianpen mah higige a, Pasion omzia pulaakna lim taktak mah higige lai hi (*1 John 4: 8*).

“Pasion in itna” cih kammal lungngai photin. Akhiatna koibang taktak in i tel hiam? Adeihna phelkhat ciang bek khawng telzo ihihang, tua phelkhat nangawn eite a dingin banghang in lungdamthu hithei zawzen hiam?

FRIDAY

August 14

Ngaihsutbeh Ding: Ellen G. White, “The Need of Love,” pp.545, 546, *Review and Herald*, August 28, 1888.

“Amau’ nundan bangzah sang hitaleh, a lungtang un Pasion leh a vengte itna tawh a kidim kei ngalleh; Sawltak taktak hitheilo uhhi. Upna lian mahmah nei in, na lamdang pipi te bawlthei phial hileh zong, **itna** a omkei ngalleh a mawkna ahi hi. Lungsim taanzau mahmah in; itna taktak tawh ahilo thudang khatpeuh tawh a neihsa a lamsa teng mizawng te tungah piakhia zomahmah phial leh zong, tua piakkhiatna in Pasion’ deihna picingsak zo tuanlo ding hi. Ama’ hanciam zawhna tawh martyr’ sihna tuak phial taleh, itna tawh a hihkei nakleh, amahpen Pasion’ muhna ah amahleh amah akikhempa, lunggulhna kheng val tawh a kineihkhempa hilel ding hi” EGWhite, *The Acts of the Apostles*, p. 318, 319.

“Eite in gamtat hoihna ding sermon hoih tampitak neilel hihang. I kisapphat pen a hiehleh, a kisia ding kha te itna, Pasion’ tokhom panin hong luangsuk itna ahi hi. Christian maantaktak te in a pumpi bup un itna tawh kidimsak hi. Pumpi tung nakhempeuh khuak, lungtang, huhna khutte khete sukha ahieh manin, Pasion’ sehna munmun ah kiptak in ding tangzo in, khelbaite lam a pialpih lohna dingin amau’ paina’ng lampi kawisaklo in tang sak uhhi. Kha mangthang te a dingin a kuangkhiaden Christ hong itna in Christian biakna a dingin nuntakna bulpi ahi hi”—Ellen G. White, *Lift Him Up*, p. 134.

“*Christ’ lungtang panin hong luangkha itna bek in hong damask thei hi. Sing kung sungah a tui a luan a, pumpi sungah sisan a*

luan mahbang in; tua itna a luansukna mipa bek in kha liammaa teng damthei bek ding hi”—Ellen G. White, *Education*, p. 114.

Kikupding Dotnate:

1. Itna thu thuhaih Paul in a gualhsuk teng picing thei ding in na um hiam? Na up keileh bangteng peuh behlaphuai lai nasa hiam?
2. Paul in “itna zongun” (1 Cor. 14: 1) a cihteh bang a cihnopna ahidiam? 1Cor. 13: 4–7 sunga acihna tawh koibang in kizom thei ding hiam?
3. Na nisim nundan sungah koibang itna na zat ding kisam nasapen hiam? Na khua- tual pawlpi in bang kisampha pen nasa hiam? Banghang in Paul in itna pen; thuhilh siamna, kampau siamna leh pilna tetawh genteh sese hi ding hiam (1Cor. 13: 8)?
4. Paul in, Corinth pawlpi mite kipumkhatna omlohna pen itna tawh kipumkhat kikthei ding cih. Banghang hiam? I pawlsungah koibang in kizangthei ding hiam?

Lesson 8

August 15–21

CHRIST’ THAWHKIKNA’ VANGLIATNA



SABBATH NITAKLAM

Tukalsung Simding: 1 Cor. 15; Luka 24: 44–47; Mang. 20: 5, 6; Col. 2: 12; 2 Tim. 1: 12; 1Thess. 4: 13–17.

Kamngah: “Christ a kithokik saklo hileh kote’ thuhilhte in amawkna hi ding a; note’ thu upna zong amawkna mah suak ding hi. Christ kithokik sak lo hileh note upna zong amawkna hi ding a; na mawhna sung mahah note zong a omlai nahi ding uhhi” (1 Cor. 15: 14, 17).

Paul’ hunlai pekin zong misite’ thawhkikna a nial zong na omkhinzo liang hi. Sihna in mihing pumpi tungah banghah cih tua mite in thei uhhi. Mi’ si-luang in tuisuah in, tuakhit leivui a suakhit ciangin bangmah hinawnlo ta hi. Tanglai pekpan mahin mite sazel uh cih thei uhhi. Amau’ nuntakmaa in zong mite sisikhin uh cihzong thei uhhi.

Misite thawhkikna ding thu pen, tulai mite a ding in a hithei ding mahbang in a gen hihtuak lel hi. Tua hang mahin Paul in a gen kul liangtak hi.

Zong thupi veve tham hi. Zeisu thokik keileh; Amah mahmah zong Ama’ cihbang mipa hilo pah ding a; singlamteh in muibun nawnlo

in, eima mawhna leiba zong kiloh lo ding hi. Lungkiatna sungbek ah eizong omcip ding hihang. Ahihhang, i Topa thokikzo a, vantungah kahto khinzo in, eite hong ciahpih dingin hong paisuk kik ding hi.

Tukal in 1 Cor. 15 sunga Christ' thawhkikna bulphuh ding hihang. Corinth mite pawlkhat in, amau' kimkot a leitung mite huzaapna bangin thawhkikna omkei peuh ci mawkmawk uhhi. Tua thu a dawnthukna in Paul in Christ' thawhkikna bekmah eite' a ding hotkhiatna lam-etna khatbek om cih.

SUNDAY

August 16

Christ' Thawhkikna Tangko

Paul in lungdamthu bulphuh in 1 Cor. 15 kipansak hi. Lungdamthu a gen ciangin: (1) Corinth mite kiangah a thugen pen (2) amau un zong a saan uh pen, (3) amau mahun a telcian uhpen, (4) amau un hotkhiat a ngahna uh pen (1 Cor. 15: 1, 2) cih. Hih kamhonna in, hong pailai ding munte ah eite hotkhiat ihihna dingin Christ thawhkikina in thu phamawh khat ahihna hong theikhol sak hi (Rom. 10: 9, 10). Tua thawhkikna in lungdam thu' a dingin a thubulpi mah ahih manin; tuathu anial mite in Christ sungah upna a nial mah hipah uhhi.

1Cor. 15: 1–4; Luka 24: 44–47; leh Rom. 1: 1–4 simin. Hihmun tengpan thu kibang bang om hiam?

1 Cor. 15: 1–4 sungah, Paul' thupuak a tom-cing hi. "*Laisiangtho sunga ombang*" a cihpen Laisiangtholui kammal pawlkhat leh a buppi zong acihna hithei kha ding hi. Zeisu sihna thawhkikna in Laisiangtholui sunga Pasian' kamciam teng picing sak hi.

1Cor. 15: 2, 11 simin. Hih Laisiangtho munte in upna leh thuhilhna pen banghang in liangko kikim sak hiam? Hih tegel kizopna bang omthei ding hiam?

Christ thokik takpi hi cih a umte peuhmah in tua thawhkikna pen tangthu piang taktak hi cih up photphot kul hi. Hiteng ah, 1Cor. 15: 5-8 in laisiangthothak sungah mun thupi khat mahah hong om hi. Christ a thawhkik khit ciangin mi tampi mah in mu ngeingai uh a, tua a mu mite zong tuni in nungta gige lai cih Paul in hihlai a gelh hunlai in gen hi (1Cor. 15: 6).

Bulpat mahmah leng, Paul in, *amaute kiangah pai unla amau' muhna dong un* a cihna ahi hi. Christ thokik takpi cihthu amah in kiptak in a pulaakna ahi hi.

Tua mite pen mitmuh teci te ahi uhhi. Zeisu in "*hihthu khempeuh a thei tecite*" (Luka 24: 48) a cihte hi zawsop ding uhhi.

Christ' thawhkikna uptheihna ding bang thu paulam peuh i nei uhham? Eima' mitnuh lohpihi khawng, leitung vai leh vantung thu khawng uptheih ding bangteng peuh i neithe i ding uhham?

MONDAY

August 17

A Thokik Christ bekmah Eima' Lam-etna!

1Cor. 15: 9–19 sungah, Paul in, thawhkikna nialna hangin a lauhuai a sulzuite thu Paul in hilhcian hi. Thawhkikna omlo tawh thu ummite in tu leh mailam ah lam-etna bangmah neilo hi.

1Cor. 15: 9–19 simin. Christ thokik kei zenmawh leh bang kisuplawh hiam?

Tanglai lawkite a tamzaw un thawhkikna umlo uh a, a phadiak in Greek mite in kha leh pumpi khenkhia in pumpi a sih ciangin kha ahiehleh ama' painop nana ah pai ci in um uhhi. 1Cor. 15: 12-19 sungteng pen Paul in dotna khat tawh pan in, thuthukte pulaak khia hi. *Note pawlkhat in koibang teng in misite' thawhkikna omlo ciliang zawzen nahi uhhiam? (1Cor. 15: 12 laikungpu letna)*. Tualai in mitmuh teci tampi omlai ahieh manin thawhkikna uplohna peuhmah pen kisaangthei hetlo hi (1Cor. 15: 5-8). Tuasang a suuk zaw thamlai khatpen, thawhkikna omlo hileh; amaute' lam-etna in zuauthu tungah kinga hi a, amau zong mawhna sung mahah omcplai ahi uhhi.

Misite' thawhkikna a om keileh, Paul in, (1) Christ thokiklo (1Cor. 15: 13, 16); (2) eite' thuhilhna in amawkna (1Cor. 15: 14); (3) eima' upna in amawkna (1Cor. 15: 14); (4) eite zong teci zuaute (1Cor. 15: 15); (5) eima' upna in a mawkna (1Cor. 15: 17); (6) eite mawhna sungmah ah omlai (1Cor. 15: 17); (7) misisa te zong a mawkna mah hi veve (1Cor. 15: 18) cihhi.

Thawhkikna a omkeileh, thuhilhna leh upna in amawkna hi (1Cor. 15: 14). Greek pau in “amawkna” cihpen **kenos** hi. Letkhiat siam mahmah hinapi zailua liang hi. A let mite in zong kenos pen “**ahawm**” cihna hi a, thumaan omlo “*maanlo, muibun lo, ngiimna neilo, mungtup omlo, amawkna*” cihte kikumkum uh cihhi.

A khatna taktak bangpeuh hitaleh, thawhkikna omlohna mun limlim ah; upna pen a mawkna cih Greek pau in **mataios** (1Cor. 15: 17) ahi hi. Hih **mataios** pen **kenos** tawh kilamdang lua khollo ahiehang, a deihna bulpi pen; Zeisu nungta keileh, upna pen a mawkna, khemna hileh a: i mawhna tengzong maisak nailoh hiveve hi (1Cor. 15: 17). Eite zong tecizau ihi ding uh a, mi a khem leh khem a thuk ihi ding uhhi (1Cor. 15: 15).

Misite pawlkhat vanah, pawlkhat hell ah lengmang pahpah mawkleh; 1 Cor. 15 pen i koicah mawktam maw? Misite ihmu uh cihpen telcian mahmah ding bang hang in thupi thei ding hiam?

TUESDAY

August 18

Christ, Gah Masa

Zeisu a nuntak keinakleh, leitung ah i lam-etna teng khempeuh pen khemna vive hiding hi (1 Cor. 15:12–19). “*A mantakpi ci leng Christ thokik taktak hi*” (1Cor. 15:20). Zeisu' thawhkikna pen thu piangtaktak ahi hi. Tua tawh kizui in Christ hong paikikni ciangin, Christ sungah a sisa mite khempeuh hong thokik ding uhhi (1Cor. 15: 20–23).

1Cor. 15: 20–23 simin. Zeisu in “gahmasa” a cihin bang a cihnopna hiam?

.....

Tulaitak in hih leitung hunsia teng khempeuh pen, Christ sunga asi mite thawhkik na tawh kizosiang ta ding hi (1Cor. 15: 24; Mang. 20: 5, 6). Adam nunung penpa Christ in, hih kumpigam leh ukzawhna teng lakik in Pa kiangah aap kik ding hi (1Cor. 15: 25–28). Christ in Pasian' khutnuai ah Amah ki-aap in (1Cor. 15: 28) Adam leh Christ kizop na omzia hong theih sakna ahi hi. Hotkhiatna ngiimna sungah Adam masazaw in a hihzawh loh thu ahi, Pa' deihna nuai ah ki-aapna pen Adam nunungpenpa (1Cor. 15: 45) Zeisu amah ngiat in hihzo hi.

1 Cor. 15: 29–34 sungah, Paul in, Christ' thawhkikna nialna a haihuaina a tomcing in gen hi. Thu ummi khatin, Christ' sihna leh a thawhkikna sungah, Christ mahtawh a ki pumkhatna pen; kituiphumna tawh Christ in limlah (Rom. 6:3, 4; Col. 2:12) ahieh manin, a thawhkik takpina nialna bangmah neilo hi. Angaihsut haksa khat panin Paul mahin “**misite tang dingin a kituiphum te**” (1 Cor. 15:29) a cihpen ahi hi.

“*Tuataw kisasi ngaihsutna tampi om lakpan a kilawmpen ding khatin; a sikhinsa itlehngaihte tawh thawhkikni ciangin kimuhkik ding ngiimna tawh, kituiphumna a cihnop na hihtuak pen hi. Christ sungah a sisa a etteh taacking mite' nundan a dawnthukna zong hihtheih tuak hi. Hihthu ah, misite tangding in kituiphumna sangin, misite hangin kitui phumna hihtuak penzaw hi*”—Carl P. Cosaert, “1 Corinthians,”

Andrews Bible Commentary: New Testament (Berrien Springs, MI: Andrews University Press, 2022), p. 1652.

A nihna ah, thawhkikna a omkeileh, sihtheihna sungah gamtatna in zong khatna nei tuanlo hi (*1Cor. 15: 30–32*). Leitung gualnopna sunga kibual lelleng hoh hampaha zawsop lai ding hihang (*1Cor. 15: 32*).

2Tim. 1: 12 sunga Paul’ kammalte lungngai kikin. Eima’ mailam thu ding zong koibang in lungmuang thei ding ihi hiam?

WEDNESDAY

August 19

A Thokik Pumpi

1Cor. 15: 35–39 sungah, Paul in a thokik pumpi tawh kisai a tomcing in pulaak kik hi. Tuavai pen dotna nihtawh kamhong hi: “*Misite koibang in ki phongkik hiam? Bang pumpi tawh hong tho ding hiam?*” (*1Cor. 15: 35*). Hih dotnate pen 1 Cor. 15: 36-49) sungah dawngkhin zo hi.

1Cor. 15: 36–41 simin. Hihmun in 1Cor. 15: 35 sunga dotnate koibang in dawngkik hiam?

.....

Paul in, thawhkikni ciangin thu piang ding etkaak theih ding thuthum hong pia hi. *Amasa*, (*1Cor. 15: 36-38*) in pumpi pen khaici tawh kibang a, singkung khat hong suahna dingin tua khaici a sihphotphot kul cihi. Athuhillna kician petmah: thawhkikna cihpen Pasion’sep nalamdang hi cihi. *Anihna*, a kibang pumpi (*1Cor. 15: 39, 40*); i Leitung ah Pasion in ganhing’ pumpi tawh a kibanglo, kimlehpam tawh a kilawm dingin mihing’ pumpi hongpia hi. Tua mahbang in mihing’ pumpi in vantung nangawn tawh kilawmlel ding hi. A deihna bulpi pen minthang pumpi in tawmkhat mah hoihzaw hamtang cihna hi a (*1Cor. 15: 40, 41*), minthanna tawh a thokik pumpi in, amasa leitunga apuksa pumpilui sangin hoihzaw tham ding cihna ahi hi.

T-6

Hihthu in, hi Leitung pumpi leh a thokik pumpi a tehkaakna namlii tengtawh kitel cian mahmah lai hi. Hih Leitung pumpi in leivui, kisiabaih, thanem in cilehsa hibek hi. A thokik pumpi in vanpumpi, kisiatheilo, thahat in khalam pumpi hi (*1Cor. 15: 40–44*). Tua bang acih ciangin tua namnih tegel kizopna neilo a cihna hilo hi. Paul in Greekpau *sôma* “*pumpi*” cihpen; akiphum pumpi leh a thokik pupi kizopna ah zangkhawm veve hi. Leh etkik zawleng, a tunga tehkaakna li tengin zong kizoplohna omsak veve hi. I pumpi thak pen ahihleh, tu laitakin a muat thei pumpi tawh kibanglo ding hi.

Paul in “*khalam thu*” peuhmah a omlo nate tawh tehkaak lo hi. Zeisu in “*a ginalo hih pumpi pen Ama’ aa mahbang in a minthang pumpi in hong kheelsak ding hi*” (*Phil. 3: 21*). Pumpi taktak mah nei ding hang a, ahizong in muatna kisiatna omlo ding hi. Tu laitak in muatna, natna leh sihna kithuak zel ahih manin; hibangte a omlo pumpi Zeisu’ hong kamciam pen ngaihsut haksa kisa mahmah hi.

Tu a lei pumpi in ciangtan neilua ahih manin, thuakzawhna anei dingin hih leipumpi pen hong kheelsak ding cih kamciam in koibang in hong lungmuang sak hiam?

THURSDAY

August 20

Sihna Tungah Anunungpen Gualzawhna

1Cor. 15: 54–57 simin. Hihmun in sihna tungah a nunungpen gualzawhna koibang in hong gen hiam?

.....

1Cor. 15 pen, Paul in, a tumdang deuh thukhat pulaakna tawh kamhong hi: “*Cileh sa in Pasion gam luah theilo*” (*1Cor. 15: 50*) cihi. Lasiangthosim tampite in, Paul in van-tung ah nakhat peuh in ki omlo cihthu gen hi ci uhhi. Ahihhang Paul’ gen pen thu tuampi khat hizaw hi. 1Cor. 15: 50 sung tehkaakna in “*cilehsa*” pen “*kisiatna*” tawh teh- kaak a: “*Pasion’ ukna gam*” ahileh “*a kisia theilo*” cihi. 1Cor. 15: 42-49 sunga

thupiang mahbang in, hiteng ah zong Paul in tu a lei-pumpi (*misiluang*) leh a thokik pumpi tehkaak hi. A kiphum pumpi in kisiathei leh sihna pumpi hi a; a thokik pumpi ahihleh a kisiathei lo leh sitheilo pumpi cih (*1Cor. 15: 50, 53, 54*). A baihpeng dingin, *hih pumpi in vantung a luahtheihna dingin, a khengval kikheelna khatmah a kantan kul ding hi.*

A tomin, Paul in kisiat theihna leh sihtheihna pen eima' pianpilh mawhna pumpi cih. Jew mite laigelhna sungah, "*cilehsa*" cihin apuk mihing hihna hi a, Ama' hong paini ciangin tuategel natna satna teng khempeuh kipuahpha ding hi.

Mawhnei mihing ihihna hemkhia in (*1Cor. 15: 54*) minthanna sungah lut (*1Cor. 15: 51–53; 1Thess. 4:13–17*) ciangin, "*gualzawhna in sihna khuplet zohi*" (*1Cor. 15: 54*) a cihpen tangtung ding hi. Tuaciang in, hangsan laulo takin "*Sihna aw, na thahatna koi ah om hiam? Hell aw, na gualzawhna koi ah om hiam?*" (*1Cor. 15: 55*) ci in la kisata ding hi. Hiteng khempeuh in Christ hong paikikni ciangin a piangding teng ahi uhhi (*1Cor. 15: 51, 52*).

Ngaihsun limlim in: Sihna sungah mit i sitsuk khit ciangin i muhkik masakpen dingin Zeisu hong paisukna mah hipah ding a, misite Amah'n phong ding hi. Thu ummi khat a sihkhit kum tultampi sawtkhin tamahleh, "*mitphiat kalsung, pengkul nunung hong gin ciangin, misite in a sithei nawnlo dingin hong tho ding a; i vekpi in ikikheel ding uh hi*" (*1Cor. 15: 52*).

Nuntakhun tomlua ci in a phun ngeilo om ding hiam? Zeisu hong paibaih mahmah cihpen eimahtek in muding hihang. Ama' hongpai ciangin i ngaihsut masakpen dingin "Kalaisai, Topa, hong paibaih takmah ciaï" peuh cikha sop ding hihang. Hih ngaihsutna in "zekaina" koibang in hong telsiamsak naci hiam?

FRIDAY

August 21

Ngaihsutbeh ding: Ellen G. White, "God's People Delivered," pp. 635–652, in *The Great Controversy*.

"*Christ in Pasion ahihna pen thu ummite a ding tawntung nunna khamuanna hi. Zeisu in 'Kei hong um mite, a sih hangin a nungta ding hi: Kei hong umin a nungta mi in a singei nawnkei ding hi. Hihthu na um hiam?' cih. Hiteng ah Christ in Ama' hongpai kikna galdon et in a pauna ahi hi. Misiangtho a sisate zong kisiatheilo dingin phongkik ding a; a nungtalai midikte zong kikheel in sihna ciampo in vantung kahto ding uhhi. Hi tengah Christ in nalamdang a bawlsa Lazarus a photkikna pen; misiangtho a sisate thawhkik na'ng lim lahkholna zong ahi hi*"—Ellen G. White, *The Desire of Ages*, p. 530.

"*Pasion' Tapa in a ihmu misiangthote a photkikna awging hangin leitung kinak liin mahmah hi. Amaute unzong tua photna aw dawngkik uh in a minthang pumpi tawh hong thoto uh a 'Gualzawhna, sihna leh han tungah gualzawhna! Sihna aw na thahatna koi ah om hiam? Sihna aw, nagu koi ah om hiam? Han aw, na gualzawhna koi ah omta hiam?' (1Cor. 15: 55) ci in kiko ding uhhi.*

Tua ciangin a nungtalai misiangtho a thokikte in amau' awte sangsak in gual zawhna awngin kiko ding uhhi. Natna leh sihna thahatna tawh hansungah a lumsuksa pumpite in; sihtheih nawnlohna cidamna tawh teitang takin hong thokhia ding uhhi. A nungtalai gige misiangthote ahieh uhleh mitphialkal sung khatin kikheel uh in hong tho khia mite tawh, meii tungah i Topa dawntuah ding uhhi. Kimuhkhopna in bangzah minthang ding hiam! Sihna tawh a kikhen lawm it-te tawh kikhen ngei nawnlo dingin kikhawkhawm kik ta ding uhhi"—EGWhite, *The Story of Redemption*, pp. 411, 412.

Kikupding Dotnate:

1. Christ' thawhkikna mitmuh tecite thu lungngai kik in (*Sawl. 1: 22; 2: 32; 3: 15; 4: 33; 5: 30–32*). Tanglai kum tulnihlai in Ama' thawhkikna tecite koibang kihitheh lai mawk ding hiam?

2. Christ' thawhkikna in lungdamthu thulaigil khat ahi hi. (1Cor. 15: 1-4). Thawh kikna omlo hileh, i tangkoko Christ' sihna zong a mawkna hiding hi (1Cor. 15: 14). Christ mahmah in zong mawkish hiding hi. Banghang? Christ' thawhkikna vang koibang in nagenkhia thei ding hiam?

3. Paul' kammal kiukiau ngaihsun dihin: "misite thokiklo hizen leh 'eite in ne in dawn lel ni, zingciang silel ding hihang'" (1Cor. 15: 32). A cihnop bulpi bang hiam?

4. Na khan sungvuah misite'thu kikum un. Gupngahte vantung ah kilato pahpah hi leh, 1Cor. in banghang in thupi mello ding hiam?

Lesson 9

August 22-28

ITNA IN NASEMSAK



SABBATH NITAKLAM

Tukalsung Simding: 2Cor. 1:3-14; 2Cor. 2:17; 2Cor. 4:2; 1Cor. 16:5-7; 2Cor. 7:5-13; 2Cor. 2:5-17.

Kamngah: "Tualai ka gelh laitakin, note' dahna ding piangsak khalo in, note ka hong it mahmahna naphawkna dinguh ka deihna tawh kagelh hi a; lungkham sinkhamna leh khitui naptui kai in agelh kahi hi" (2Cor. 2: 4).

Sawltak Paul nuntakhun sungah lungnuam hithiat ngeilo hi. A thongkiat kihello in, ama' nuntakna nangawn alauhthawn zoteng amah'n gualsuk hi: "Jew mite khutsung ah, sawmthum leh kuavei satna ngavei tak kathuak hi. Rome mite'n thumvei hong sat a, khatvei suangtawh hong deng uhhi. Tembaw siatna thumvei katuak a; sunkhat leh zan khat tawntung tuitungah kalam ngei hi.

Khual ka zinzinna lamin tuikhang lauhuaina, misuamte lauhuaina, ka mipihte suk ding lauhuaina, Gentile mite' suk ding lauhuaina, khuapi sung leh gamlak ah lauhuaina, tuipi tungah lauhuaina, lam maanlote' hih ding lauhuai na: Nasem silbawl in ka om tawn tung a, ihmu manlo liangin ka omzel hi. Gilkiat dang-tak in ka

omzel a, annék ding neilo, giakna ding omlo, punsilh ding neilo in ka om hun tampi a om hi. Tuabang haksat na tuamtuamte kathuak banah, pawlpi a tuamtuamte a dingin lunghimawh in ka lunggim lai hi” (2Cor. 11: 24–28).

Corinth mite tungah a laikhakna sungah pawlpi a dingin “**lung hihmawhna**” nei cih i mu uhhi. Christ in eite hong itna a kiamngeiloh mahbang in, tua khempueh kawmkal mahah amaute a itna in kiam ngeilo hi. Zeisu in eite hong itna lengkik sak in Paul in zong tua itna mahtawh a pawlpite it thei hi (2Cor. 5: 14; 1 Cor. 11: 1).

SUNDAY

August 23

Lungdamkohna

2Cor. 1: 3–7 simin. Hiteng ah Paul’ lungdamkohna a hangthu bang hiam?

Paul’ lungdamna pen a thuaksia mite tungah Pasion’ hehnepna tungah bulphuhpi pen hi. Hihmun ah, hehnem (*parakaleô*) leh hehnepna (*paraklçsis*) pen sawmvei takmah om hi. 2Cor. sunga 29 vei bang a omna lakah hiteng ah sawmvei cihpen sehthum a she khat ahi hi. Pasion zongpen “*eite’ kisapna khempueh ah hehpihna nei Pa; leh haksatna khempueh ah hong huhden Pasion*” (2Cor. 1: 3, 4).

Pasion kiangpan hongpai hehnepna pen mimal khatbek in kepikbek ding hilo hi (2Cor. 1: 4, 5). A lungggim lungtang in Pasion’ hehnepna zong sangpah a; amah bangin a lunggim midangte tungah zong hawmsan theipan hi.

Paul amah ngiat in thuaksia mahmah photin, Pasion kiangpan zong hehnepna ngah photphot ahil manin midangte zong hehnem theita hi. “*Kote in gimna kathuak uh leh; note’ phattuumna ding leh hotkhiatna ngahna ding: Kote in huhna kangah uhleh zong note zong phattuumna*

ding leh hotkhiatna ngahna ding mah ahi hi” (2Cor. 1: 6). Hih pen itna ahi hi!

2Cor. 1: 8–11 sungah Paul in bang lungdamna pulaak hiam?

Paul in a thuaknate pen “*tehiph bei, tha in cinlo*” (2Cor. 1: 8) lua ahil manin, amah leh a lawmteng un beina tung dingin kingaihsun liangin lau uhhi. Tawlkhat sung bangpen thawhkikna in amau’ lam-ettheihlai khatbek hi ci in ngaihsun liang uhhi. Hitaleh Pasion in amau’ honkhia in thute hong kikheel hi (2Cor. 1: 10). Sihding launa pan (2Cor. 1: 8), Pasion in amaute hongkhia kik ding cih lam-etna hong neitheih uhhi (2Cor. 1: 10).

A beisa hunsunga Pasion hong zawhpihnate in mailam ah zong tuamah bangkik ding cih lungmuanna hong pia hi. Pasion in Amah a muantheihna dingun haksatna tetawh thuhilh hi. Haksatna te in khalam khanghamna hong tunthei a, aneupen in Pasion tawh hong kinaisak thei hi. Paul ‘ lungdamkohna sungah, Pasion hong lailut siakna vanglian leh Pasion hong hotkhiatna tungah eima’ lungdamna cihte a kihel in om uhhi (2Cor. 1: 11).

Lampi khat peuhpeuh eite khempueh in i phutkhak ahi haksatnate vengsak na dingin bangteng kizangthei ding cih nangmuhna ahi hiam?

MONDAY

August 24

Lungsim Takpi leh Kitheihna Lungsim

Zanni in, Paul in, Corinth mite a itna thu kisinna ah, Paul in Pasion kiang panin hehnepna a ngah mahbang in; Corinth mite haksatna ah Paul in zong hehnem hi (1Cor. 1: 1-11). Tuni in ahil leh, Corinth mi thu ummite tungah, Paul leh a naseppihite in a lahuh thumaanna hangin amau a itna teng zong muhbeh lai ding hihang.

2Cor. 1: 12–14; 2Cor. 2: 17 leh 2Cor. 4: 2 simin. Paul’ lungsim takpi in Corinth mite a itna koibang in pulaak hiam?

Corinth Nihna 1: 12–14 in, Paul’ laikhakna sunga a nunglam a omlai thuteng hong theikhol sak hi. Paul thumaanna leh nungzui ahihna pen Corinth mite in dong theizel uh hi. Paul in malmel neilo in khentatna nei mello gamtatna hangin Sawltakna semding in kilawmlo hi ci uhhi. Paul in a dawnna ah, amah leh a naseppihte in amau tungah hoih theihtawp in kong hoih uhhi cihhi.

Paul leh a pawlte’ gamtatzia pen kammal nih tawh pulaak hi: Lungsim takpi leh kitheihna lungsim (2Cor. 1:12) ahi hi. “**Kitheihna lungsim**” cihpen Greekpau in *haplotçs* hi. Tuapen hiteng ah mimal vangekepna, kampau gamtat kikepna hi a: a tomin, tatlehhek siangthona lahna ahi hi (Eph. 6: 5; Col. 3: 22). Thukhat panin zong hih “**kitheihna lungsim**” (Greekpau *eilikrineia*) hi a, vangekepna tatlehhek siangthona mah hiveve hi.

Paul in ama’ ngiimna teng a pulaak sukna bek hi a Corinth mite in telkhialh huailo hi. Paul in ama’ lungsim takpi leh kitheihna lungsim pen Pasian’ bulphuh ing cihhi. Hih Paul’ ngaihsutna pen New English Translation Bible in hoihtak in pom a; “*gamtatna siangtho leh Pasian kiangpan hong pai kitheihna lungsim*” hi (2Cor. 1: 12). Tua tangneu sungmah ah, Paul mahin, Pasian’ na septeihna siamna peuhmah peneima tungah hong paik hi cihhi.

Paul’ a langpang te (2Cor. 1: 13, 14) akihona masate kammalte letkhial gawp hih tuak hi. Paul in ama’ ngiimnate pen kician in telnop ci in vaipuak langiat hi. Ama’ ngiimnate in thumaan kammalte hi a, ama’ ngiimna leh gamtatna te pen “**Topa Zeisu’ ni**” ciang in kitelkheh ta ding hi cihhi (2Cor. 1: 14).

Nangma’ deihna leh ngiimnate in bangzah in hoih a, bangzah in na lungsim takpi himah taleh; telkhialh na leh uplohna tawh kipelthei ding hiam? Tua thute pan nangma muhna bangin midangte ngiimna khawngpeuh nangmah tekina na sittel dingpen bangzah kidop kul dingin na um hiam?

TUESDAY

August 25

Itna a dingin Ngiimna Kheel

Corinth mite pawlkhat in Paul’ ngiimna leh itna um zolo uhhi. Tuni in Paul’ in ama’ khualzinna a kheel liangna hangthu enpha ding hihang (2Cor. 1: 15–2:4).

1Cor. 16: 5–7 simin. Paul in khualzin na’ ng mun a gelmasakna bang hiam?

Paul in Corinth ah omkhin zo hihtuak hi. 1Cor. 16: 5, 6 sunga geelna bang hileh Macedonia kantan phot ding a, Corinth hong ciahkik ciangin, phalbi sungteng Corinth ah taam sawm hi. Corinth panin, Judea ah pai ding a, Meceadonia pan a kaihkhop Jerusalem a mizawngte a ding sumpite puak sawm hi. Ahita zongin, Corinth pan hong pai Timothy in hong thupuak thusia hangin ama’ ngiimna kheelngiat hi (1Cor. 4: 17; 16: 10; 2Cor. 1: 1).

Paul in, Ephesus panin Corinth ah paisuak vingveng dinga, Timothy hong thu puakpen siansuah sawmpah hi. A khualzin nading ama’ geelnathak ahileh Ephesus – Corinth – Meceadonia – Corinth – Judea cihbang ahi hi (2Cor. 1: 15, 16). Ephesus panin Corinth ah paitheipah hinapi, Ephesus mahah hong kilehkik hiau hi. A geelna kheelkik mai hi. Apai nunungpen lai in tuahpha khollo ahiah manin, a geelsa ombang in Corinth ah paikik nawnlota hi. Ephesus mahah ciahkik in, laikhak tamai zaw hi. Khatvei a vahawh kik a, thu suuksiat tuakzaw ahiah manin laikhakzaw hi (2Cor. 2: 1, 3).

Paul' ahawh nunung penlai in kitelkhial gawp hi. Corinth mi pawlkhat in Paul pen muanhuai keilua, hong it hongngai keilua ci uhhi (2Cor: 1: 17). Tua mawhsakna adawna in, Corinth mite' mit lungdamthu lamah heisak hi. Pasion in Ama' kamciamte pen Christ sungah hong picinsak mahbang in; Paul in zong hunlem penpen khat ciangin Corinth ah a hawh ding ngiimna pen kiptakin lengge lai hi (2Cor: 1: 18–22).

“Pasion’ thuciam khempeuh ahihpa pen Amah ahi hi. Tua ahih manin Zeisu Christ hangin Pasion phatin ‘Amen’ i cihna zong Ama’ hangmah ahi hi” (2Cor: 1: 20).

Paul in a dawnthukna pen, Corinth mite'n ahihtheih zel bangin a buaihuai mah mah leh a nunzui in **'himah/hilo'** cihte hilo hi. Christ sunga Pasion' nasepna tepen a tawn tungin **'himah'** ahih mahbang in Paul dawnkikna zong **'himah den'** hi (2Cor: 1: 19).

Tua hi a, Paul in Corinth mite kiang a vahawh sangin laikhat a khakzawkna pen, amaute' it taktak ahihna hang hizaw hi (2Cor: 2: 4). Dahna apiangsak hawhna khatkhit ciangin khatvei vahawhkik vatleh; Paul' ngiimna lungnopna ngah zawlo in, dahna dang khat peuh piangsak zawsop ding hi (2Cor: 1: 24; 2Cor: 2: 3). Paul' ngiimna hoih mah mah pen kitelkhial gawp zawsop hi.

WEDNESDAY

August 26

Maisakna leh Itna Kiphosakkikna

Corinth mite kiangah a nihveina a vahawh sangin; Paul in Ephesus a tun ciangin **'dahsakna lai'** (2Cor: 2: 3, 4; 2Cor: 7: 8, 12) a kici pen khak hi.

2Cor: 7: 5–13 simin. Amaute Paul' laikhakna pan bangthu hong om a, tua thu Paul in koibang in dawngthuk leuleu hiam?

Tuakhit ciangin Paul leh Titus tegel in Macedonia ah akimuh uh ciangun; Paul in khauhtakin alaikhak na hangin thuhoih hong piang cih Titus kiangpan in za a, Sawltakpa nuamlua hi. Acil in Corinth mi pawlkhat in Paul langpang mahmah napi in tu in pawlpi buppi in Paul tawh pangkhawmta uhhi. Pawlpi mite in sawltakte' nasep a baihzaw in puahphat saktehi hi.

2Cor: 2: 5–11 simin. Hitengah a deihna bulpi bang hiam?

Hihmun tengpen pawlpi kikkhalna thu ahi hi. Laisiangtho siamte in tua mawhneipa pen, 1Cor: 5: 1-5 sunga anu tawh mawhna bawlp a hihtuak asa omuh a; Sawltak Paul in ama' khualzinna ah a khentatna ginalo, amaute zong donselo cihbang in Paul tungah mawhzonna a piangsak; pawlpi sungah zong huzaap lian aneipa khat hithei ding hi ci in kikum zel uhhi. A thupaizia tawh kizui in anihna hihtuak sawnsawn zaw hi. Thukhat peuhpeuh ah, pawlpi sungah a thupipen in mawhna khat a siansuah zia thupi mahmah ahihna hihthu in hong telsak hi.

Hihthu paizia in pawlpi sung kikkhalna peuhmah, mawh maisakna leh amawh a khialpa tungah itna kipsakkikna thupi ahihna hong hilh hi (2Cor: 2: 6–8, 10). Tua banah pawlpi sung kikkhalna pen na mahmah ahihhang kulkisam cihzong hong theisak hi. Cih nopna bulpi in, lungsim hoih deihsakna neimah taseleleng; pawlpi pawlkhat in, mawhna bawlte, a Langtang mawhna hiphialmah taleh; talsik in amawhna uh siansuahna bangmah neingei hetlo uhhi.

Alangkhat leuleu ah, a khauhmahmah, maisakna neilo, a kip bekbak mi zong na omveve lai hi. Mawhna siansuahna ah itna tawh sep kul hi. Tua hi a, Paul in pawlpi it ngiat ahih manin (2Cor: 2: 4) tua mawhneipa tungah itna kipsak kik dingin pawlpi han- thawn hi (2Cor: 2: 8).

Paul in Pasion’ kiangpan itna sangkha in, Corinth pawlpi a itna tungtawnin, Corinth pawlpi in zong mawhneipa it theita uhhi (2Cor. 2: 8) Itna tungtang bang hong hilh naci hiam?

THURSDAY

August 27

Christ sungah Gualzo

2Cor. 2: 12, 13 simin. “Dahsakna lai” akhak khittet Paul koiah pai a, bang vahih hiam?

.....

Paul in Titus hong tunkal ngaklah lua in a lungsim tawldam thei hetlo hi (2Cor. 7: 5, 6). Tua pipi mahin Zeisu’ thu zong genlo in omtheilo sawnsawn hi (2 Cor. 2: 12). Paul in Zeisu itlua mahmah hi. Tua laitakin lianin ama’ laikhak bangciang tung cihbel thei nailo phot hi. Titus tawh kimu meng theileh, Corinth mite’ dawnkikna zong zanuam luata hi.

Troas khua ah Paul’ nasepna picing mahmah hitaleh *“tualai ah sawt taam theilo hi. Pawlpite kepcin kula, a diak in Corinth pawlpi don ding Paul’ vangikpi khat ahi hi. Troas ah Titus tawh kimuh ding lam-etna; Corinth mite kiangah a laikhak pen amaute un koibang in sanguh cih zanuam mahmahta ahih manin alung bang kiaman phial hi. ‘Ka sanggampa Titus tawh kimulo kahih manin ka lungsim tawldam cih omngei lo’ cih. Tua ahih manin Troas panin paikhia in Macedonia kantan in Philippi ah Timothy tawh kimu uhhi”*—Ellen G. White, *The Acts of the Apostles*, p. 323.

2Corinthians 2: 14–17 simin. Macedonia ah Titus tawh akimuhuh ciangun, Corinth mite in ahoihlam in saanguh cih a zak ciangin Paul in bangcih hiam?

.....

Nuamlua mahmah in Paul in Pasion in *“gualzawhna tawh Christ a paina khem peuh ah eite hong zuisak”* (2Cor. 2: 14) cih. Christ a tenna lungtang sungah *“mun khem-peuhah paknamtui a kizelh bangin Christ theihna kizelsak”* (2Cor. 2: 14) cih.

“Dahsakna laikhak” in Paul’ in a aatnop gah hong gahthei bilbel ahih manin Paul in Christ sungah lungdam hi (2Cor. 7: 5–9). Gualzawhna lianpi khat ahi hi. Tua laitakin 2 Cor. 2: 17 sungah amah in Christ Sawltakpa ahihna kipsak phapha hi (2Cor. 2: 17; 2Cor. 1: 12). Hihmun tungtawn in, a thumaan Christ’ nasempa leh, nasemzuau a kikhentel theih na pen: a thumaan sawltakte in Pasion thu ahihna vuah Zeisu itna tawh hilh uh a: Sawl- takzuaute ahih uhleh, amau’ angung khantohna dingin lungdamthu pen inn-lusik pai in gen kawikawi uhhi.

Bangpeuh ihih zongin, a diakin Zeisu’ mintawh ihih ciangin, bangpen in na lungsim hong khoihkha pen nasa hiam?

FRIDAY

August 28

Ngaihsutbeh Ding: EGWhite, “The Message Heeded,” pp. 323–334, in *The Acts of the Apostles*.

“Lungkhamna lianpen a thuakkha mite in, midangte hehnepna hong tunthei pente hi uh a; amau tunna peuhah nitang khuavak tangsak thei uhhi. Tua mite pen, haksatna in ahoih anem dingin a puahphat sate ahi uhhi. Gimna a thuakuh ciangun Pasion a munna uh mansuah hetlo in, Pasion hong huutna itna lenkip semzaw uhhi. Tua mite in Pasion kepna hoihna tecipangte ahi uhhi”—Ellen G. White, *God’s Amazing Grace*, p. 122.

“A siangtho Christian nuntakna in khuavak, hehnepna leh daihna hawmsawn den hi. Tuapen siangthona, ciimna, thumaanna leh zattelna tetawh ki pulaak hi. Tua huzaap pen siangthosakna, angkhuallo itna in kemcing gige hi. Amah a neipa paina peuhah

khuavak tangsak a, Christ tawh kidim hi—*God’s Amazing Grace*, p. 122.

“*Sawltak Paul in, pawlpi sungah mawhnate puahphat kul ci ahihhang, mawh neipa a puahphatna ah amah zong kikemcing mahmah hi. Tuabang in a puahphatna hang thu patau takin hilhcianpha hi. Tua mawhneipa lawmpa ahihna, mi’ muhtheihna dingin gamta hi. Amaute ’n na asak mahbang un amah in zong nasaveve cih telcian sak hi. Amaute a don mahmahna zong pen, ama’ lungsimsuak ahihna zong theitelcian sak hi*”—Ellen G. White Comments, in *The SDA Bible Commentary*, vol. 6, p. 1094.

Kikupding Dotnate:

1. **2Cor. 2: 1–14** sungah, Paul in ama’ nasepna sungah ama’ vang kipkho sak hi. Tuabang in Pasion’na sepna banghang in phamawh hiam?
2. Paul in ama’ khualzin na’ng geelna teng a kheelziauna tungtawn in; Christian’ nasepna ah kikheeltheihna/kipuahtheihna kisas nasa hiam? Kul-kisas bangin suahtatak in kikheel theih in banghang in thupi thei ding hiam?
3. Paul in ama’ nasepna sungah gimna launa tampi tuak hi. Hihthu in pawlpi makaite zong mihing mah hi a, midangte mahbangin dahthei uh cih hong lak hi. Amau’ nasep olzaw deuh thei dingin pawlpi mite in koici huhthei ding hiam?
4. Paul in Christ sungah a gualzawhna a genma in (*2Cor. 2: 14*) in a lungsim omthei nawnlo cih (*2Cor. 2: 13*). A thanemna leh thahatna koibangin genkhawm thei hi ding hiam?

Lesson 10

August 29–September 4

CHRISTIAN CITAKTE PASIAN’ NA SEPNA



SABBATH NITAKLAM

Tukalsung Simding: *2Cor. 3:1–9; 2Cor. 4:7–18; 2Cor. 5:11–15; Col. 1:19–23, Eph. 2:13–16; 2Cor. 6:11–7:1; 2Cor. 7.*

Kamngah: “Gimna katuah zelzel uh hangin ka sikei uh a; lung hihmawhna ka tuahuh hangin ka lungkia kei uh a; gal tampi ka tuah uh hangin pawl kaki tasam ngeikei uh a; liamna baina katuah hangin ka sikei uhhi. Kote pumpi tungpanin Zeisu’ nuntakna a kilattheihna dingin hih ka leitung nuntakna pumpi mahmah uh zong Zeisu sihna bang mah ka thuak zelzel uhhi” (*2 Corinthians 4: 8–10*).

Nungkal in, Paul in ama’ Lungsimepni Takpi leh Kitheihna Lungsimepni kipsakpha in, amah in Corinth mite tungah a itna kiamsak zohi cih mawhsakna panin amah kidaalzo ta cih mukhin hihang. Ama’ khalam tate a dingin deihsakna lianpen tawh nasem den hi. *2Cor. 7* lam hong zuatpilh *2Cor. 2: 12–17* sungthu khat tawh kamhong hi. Tuabang in hihna tawh Christ a ding nasepna diktak khat pulaak khia hi. Tua thu ah Paul’ ngaihdan panin pilna tampi kingah thei hi.

Tukal in, 2 Cor. 3-7 sunga Christ a dingin kha angahna teng Paul in a genna en ding hihang. EGWhite in “*mawhneite hong kikheelna leh thumaan hangin hong siangtho na in; Pasian nasem khat pen Pasian in Ama’ nasem dingin a sapna teci lianpen ahi hi. Sawltak khat hihna teci zong a kikheel mite lungtang tungah kiciamteh a, amau’ nundan thak in tecipang hi. Amaute’ sungah Christ leh ama’ vangliatna lam-etna piangsak hi. Pasian’ nasem khat pen ama’ sepnasa ciaptahna teng in nakpi takin thahatna piakik thei hi*” —Ellen G. White, *The Acts of the Apostles*, p. 328.

SUNDAY

August 30

Nasepna Maan taktak Gahte

2Cor. 3: 1–9 simin. Eite zong Christ’ laikhak koibang in hithei ding hiam?

Thuneite tungah hoihsakpihna lai cihpen Greco-Roman hun lai in laang mahmah hi. Ahihhang, Paul in tuabang laite tawi selo lel hi. Corinth mite nundan a puahpha Kha Siangtho vangliatna in Ama’ nasepna maantaktak cih teci panna ahi hi. Corinth pawlpi a din theihna zongpen, ama’ pilna leh hanciamna zong hikhollo cih Paul in telcian hi (2 Cor. 3: 4–6). Ama’ zaa khanna ding khawng ahizong omlo hi (2Cor. 3: 5; 1Cor. 2: 2).

Paul in ama’ Pasian nasepna pen thuciam nih tawh genteh hi: thuciamlui pen Moses tawh hi a; thuciamthak ahihleh amah leh anseppihte tawh cih. Lai a nawhsim mi in, thuciamlui in hotkhiatna’ng lam-etna hong pialo ci uh a; ahihhang tuabang hilo hi. Hot khiatnapen thuciam alui athak ah zong omveve hi.

Thuciamlui pen *lungdamthu mahilhna* ahi hi. “*Gentile mite zong a upna uh hangun Amah tawh kipawl theihna dingin Pasian in a bawlina dingthu Laisiangtho in na matheih hi. Abraham kiangah lungdamthu*

T-7

na mahilkhohol a, Pasian in leitung mite khem peuh thupha a piakna dingin nangmah hong zang ding hi” (Gal. 3: 8) naci hi.

2Cor. 3: 1–4: 6 sungah, Thuciamlui cihpen, amau’sepna hanciamna tawh Pasian a lungdamsak ding mite lim kipuasak muding hihang. Thuciamthak ahihleh Pasian in amau te a ding ahisak ding kamciamsate khempeuh muangin Pasian’ hehpihna tungah a kinga te cihna ahi hi.

Paul in lungdamthu tungah mite’ dawnthukna kibanglo nammih genkhia a: thu um mite dawnthukna leh thu umlote dawnthukna ahi hi. Pasian in ahongpiak a kibanglo lung damthu, Laisiangtho lui ah khat leh laisiangthothak ah a dangkhat cihbangin nammih a gen hilo a; “*eite’ sepzawhna hang hilo, Ama’ ngiimnasa bang leh a dikna hangin Pasian in eite hong honkhia in, Ama’ mi dingin hongsam hi. Leitung pianmapek in Zeisu Christ tungtawn in tua dikna a hongpia hi*” (2Tim. 1: 9).

Hihthu in 2Cor. 2: 14-4: 6 sunga tangthu kisuut kik hilel hi ci in nial ding hilo hi. Tua tangthu sungah pawlkhat “*hotkhiat*” leh pawlkhat “*kisiatna tung*” (2Cor. 2: 15) cih thu a hilhcian nopna hang ahi hi. Moses’ nasepna peuhmah pen uploh muanlohna tawh dawngthuk uh ahih manun; Moses’ nasepna pen *kisiatna* leh *sihna* nasep ci in kimusak phial uhi. Corinth mite in Paul nasepna umuh ahih manun, Paul’ nasepna in; dikna nasep, nuntakna hong pia Kha Siangtho nasep hong suak hi.

Hibang in Corinth mite in hotkhiatna ngahlawh uh ahih manun, Paul’ nasep na pen thumaan cih tecipanna ahi hi.

MONDAY

August 31

Thuaksiatna leh Minthanna

2Cor. 4: 7–18 simin. Paul’ thuaksiatna teng gualsuk in. Koibang in kanzanzo thei hiam?

.....

John Huss, Bohemia gammi, biakna puahphapa in Zeisu' thu a pulaakna “*Amah in leitung Makaipipa hi a, eite ihihleh a kihhuai sithei mi hi napi hang a – eite a dingin hong thuaksak veve hi. Tua ahihleh eite'n zong banghang in thuaklo tuan ding ihi hiam; thuakna in hong siangthosak thei hi*”—Ellen G. White, *The Great Controversy*, p. 105.

Sawltak Paul in zong, zalom tampi laipek panin Christ a dingin thuaknuam cih pulaak khinzo hi. Amah zong pen a kitambaih leibeel ahihlel lam kithei hi (2Cor. 4: 7). “*Gimna ka tuahzel uhhang ka sikei uh a, lung hihmawhna ka tuah uh hangin ka lungkia kei uh a, gal tampi kaneih uh hangun pawl ka kitasam kei uh a, liamna baina katuah uh hangun kasikei uhhi. Kote' pumpi tungpanin Zeisu' nuntakna akilatna dingin hih ka lei-tung pumpi mahmah zong, Zeisu' sihna hangmah in kathuak zelzel uhhi*” (2Cor. 4: 8-11).

“*Zeisu' sihna*” hangin acihpen, a tunga ama' thuaksiatna teng a cihnopna hihtuak pen hi. Tuakhit deuhmah ciangin “*Zeisu' nuntakna*” cileuleu a, sihna pan suahtakna leh tu mahmahin a nuntakna sunga Kha Siangtho vangliatna a cihnopna hihtuak hi. Hiteng khempeuh pen thawhkikna thua gennopna bulpi ahi hi (2Cor. 4: 12).

“*Sihna leh Nuntakna*” cih tegel pen 2Cor. 4: 10-12 sungbek ah zong thumvei om hi. Tuazong pen hih leinunna pen sihna tawh kihelzau lai cih hong phawksakna ahi hi. A hizongin tawntung minthan hun ciangin sihna omnawnlo nuntakna neita ding hihang (*Mang. 20: 14; Mang. 21: 4*).

A thupi penkhat, 2Cor. 4: 7-18 in, lungdamthu pen a kitambaih mihing in tangko ahiah manin minthanna peuhmah Pasian a ding bek cih honglak hi (2Cor. 4: 15). Pasian' na semte in thuaksiatna pen khatveivei bekmah thuakkha uhhi. Ahihhang hiteng ah eite' tuahkhak thute pen; eite hong ngak gige tawntung minthanna tawh tehkakna in; tawlkhat sung neucik bek hilel hi (2Cor. 4: 17). Thu ummi in upna tawh nungta hi; muhna tawh hilo hi (2Cor. 4: 18; 2Cor. 5: 7).

Paul in, hong tungding nuntakna lam-etna naneilua liang ahiah manin, apauna mun khempeuh ah tuathu vive hong luang daudau hi (2Cor. 5: 1-10). A sithei ama' lei-pumpi zongpen lei-inn tawh genteh ziaulel hi. A lehlam ah “*Pasian in a lamsak inn*” a cihzong pen a thokik pumpi a cihnopna hi a (2Cor. 5: 1), khang tawntunga thu ummite lam-etna pi ahi hi.

Eite in bangsung peuh kantan himah taleng; hong tungding thawhkikna, eimah thokik ding cih lam-etna neihding banghang in thupi hiam (1Cor. 15: 52)?

TUESDAY

September 1

Christ-Bulphuh Kilemna Nasep

2Cor. 5: 11-15 simin. Hihmun in Paul' nasepna peuhmah Christ-bulphuh nasepna ahihlam koibang in hong hilh naci hiam?

Paul in, Christ a dingin ama' sepna teng a pulaak kul ding cih thei hi (2 Cor. 5: 10). Amah in “*Pasian zahtak ding*” leh Christ' lungdamna thu tawh mite a zoldan ding thei hi (2Cor. 5: 11). Hih zahtakna cihpen Christ vang apiakna leh kihtakna cihte hi a; Paul in Christ a itna leh Christ in amah a itna sungah a khamuanna cihte kihel bilbial hi. Laisiangtholui sungah, Pasian kihtakna cihpen, lungsim khempeuh kha khempeuh tawh Ama' lampite tawn, Amah it in, Ama'na sem (*Thkna. 10: 12*) ding cihna ahi hi.

Paul' nasepna ah amah-kibulphuh lo in Christ-bulphuh zaw hi. Amah kiphat tawm lo hi. Ama' kiphatsakna pen Christ hizaw hi (2Cor. 12: 9). “*Singlamteh tungah i Topa Zeisu Christ' sihna thu bek kakisialhpih ding*” (*Gal. 6: 14*) cihhi. Tua hi a, Corinth mite in amah a kisialpih theihna ding (2Cor. 5: 12) zongpen; amah a langpang te in amau mah a kibulphuh uh bang hilo in Paul in Christ-bulphuh in a nasepna ahi hi.

2Cor. 5: 16–21; Col. 1: 19–23; Ephet 2: 13–16 simin. Paul in “kilemna nasep” a cihpen bang a cihnopna hiam?

Christ in kilemna nasep *siampenpa* ahi hi. Tua mahbang in Amah in “*kote tungah kilemna nasep hong pia*” (2Cor. 5: 18) cihhi. 2Cor. 5: 16-21 sungah kilemna ding thu pen om zelzel hi. Tua pen Paul a ding ahi a, eite a ding mahmah in kisampha mahmah hi.

Pasian in Ama’ Tapa sihna tawh mawthoihna tungtawn in mihing pen Amah mah tawh hong kilemsak hi. Pasian tawh akilem mi peuhmah mithak ngeina (2Cor. 5: 17) a nei ahi uhhi. Tu in ahihleh “*kilemna thupuak*” pen Christ’ lungdamthu tangkona tawh tangko ding ahi hi (2Cor. 5: 19). Tua tawh kizui in Paul in “*Christ tawh kipawlna hangin eite zong Pasian tawh a kibangin midik i suahtheihna dingin mawhna aneilo Christ pen eite tangding in mawhneimi a suaksak hi*” (2Cor. 5: 20).

Christ in nang a ding hong hihsak teng ngaihsun in. Khialhna mawhna teng, siatna teng khempeuh pen nang a ding vive ahihhang, Amah in singlamteh ah hong hihsak khinzo hi. Hiteng khempeuh pen nang leh midangte kizopna, a diakin Topa a theilo mite tawh kizopna koibang in hong huzaap hiam?

WEDNESDAY

September 2

Siangthona ah Sapna

2Cor. 6: 3–10 sungah, Paul in, Corinth mite pen Pasian tawh kilemsak hi. Ama’ haksatna leh a gualzawhna teng gualsuk deudau in Christ’ nungzui hihna leh Pasian’ nasempa khat hihna in bang cih hong lak hi. Atom in, amah’ n haksatna zong gualsuk a (2Cor. 6: 4, 5), siangtho nuntakna (2Cor. 6: 6), nasepna galhiam (2Cor. 6: 7), nasepna sungah kisukkhakna te (2Cor. 6: 8-10) ahi hi. Paul in Corinth mite pen Pasian tawh kilem dingin a thuhilh khit ciangin, a siangtho in nuntak ding; thu umlote leh a siangtholo nate’ huzaap khempeuh pan kikepsiam ding cihte Paul in hanthawn lai hi (2Cor. 6: 14–17).

2Cor. 6: 11–7: 1 simin. Hihmun in siangtho nuntakna acih koici gen hiam?

Hih munah Paul in pawlpi sungah ki it kingaihna kisampha mahmah ci hi (1Cor. 6: 11–13). Pasian tawh a kilemna mite ahih uhleh; mi khatlehkhat a kilem sawm ding uhhi. Tua mite in a pheilam in midangte tawh kilemna neite hong suak uhhi.

Tua banah, a siangtho dingin anuai a thu guk tawh hong samlai hi (1) “*Thu umlo mite tawh hakkol kikimlo puakhawmlo ding*” (2Cor. 6: 14); (2) “*Amaute’ lakpan in hong paikhia un*” (2Cor. 6: 17); (3) “*Kikhenkhia un*” (2Cor. 6: 17); (4) “*A sianglote lawngkei un*” (2Cor. 6: 17); (5) “*Lungsim leh pumpi aninsak thei khempeuh panin ki siansuah in*” (2Cor. 7: 1); (6) “*Pasian zahtakna tawh nungta in siangtho sinsen un*” (2Cor. 7: 1). Hih hanthotna tungtawnin Pasian in milim biakna tawh kikhen in siangtho nuntakna hong kal ahihlam hong phawksak hi.

A langkhat lamah, tuathu in, Christian pawlpi peuhmah biakinn siangtho ahihna kamciam sagih hong laklai hi: (1) “*Amaute lakah Ka teng ding hi*”; (2) “*Amaute tawh Ka omkhawm ding hi*”; (3) “*Amau’ Pasian Ka hi ding hi*”; (4) “*Amaute Ka mi hi ding uhhi*”; (5) “*Note Ka hong sang ding hi*”; (6) “*Amaute’ Pa kahi ding hi*”; (7) “*Keima tapa leh tanu te nahi ding uhhi*” (2Cor. 6: 16, 17, 18).

2Cor. 6: 16 sunga kamciam 4 tengpen 2Cor. 6: 17 sunga thupiak kizom thum teng hong pianna bulpi ahi hi (2 Cor. 6: 17 a *thupatna ah Tua ahih ciangin cihpen enin*). Hih thu in, siangthona cihpen mi khatpeuh hanciamna pan hi mawkmaw lo in, lungsim sung ah Khasiangtho nasepna hi cih hong lak hi. Siangthona pen Pasian kiangpan hongpai ahih teihang, thu um mite ahih uhleh; amau’ sep ding teng semveve in milim biakna nial sinsen ding uhhi.

2Corinth 6: 16–18 sunga Pasian’ kamciam in siangthona pen koibang hi ci hiam?

THURSDAY

September 3

Hehnepna Leh Lungnopna**2Cor. 7 simin. Corinth mite kisik cihthu a zakciangin Paul' lungsim koibang hihiam?**

.....

Paul in “*note kong it mahmah hi*” (2Cor. 7: 3; 2Cor. 6: 11) acih ciangin ama’ lungtang pan itna bangzah a lungkhia diam? Ki it thuk ding a deihna in Paul in “*na lungsim uh hong pia un*” (2Cor. 7:2) naci hi. “*Note lungsim sungah*” acihpen Greek leh Zopau sungah a omloh hang, mikangpau sungah athu paizia tawh kituak in a nazat ahihi.

Corinth mite in zong, Paul leh a pawlte kiangah a lungsim uh hon uhhi. Tua thu hangin tang 4 na ah lungdamna thu puakkham sak hi. Paul’ kammalte in tua laitak in amah lungdam takpi ahihna pulaak hi: “*Note hong muang mahmah in note hangin kaki sathei a, lungkhamna a tuamtuum katuah hangin lung himawh lo in ka lungnuam mah mah hi*” (2Cor. 7: 4) cihhi. Paul in hehnepna leh lungnopna tawh kidim hi. I pawlpite in Christ tungah thumaan takin hong ki-aap ciangin Pasion’ nasemte zong lungnop hehnep na ngahtheita uhhi.

2Cor. 7: 5–16 sungah, Paul in ama’ hehnepna leh lungnopna thu gen hi. Hihthu te gel in tua sungteng ah dim hi. Greekpau *parakaleô* pen “*hehnem*” hi a, *paraklçsis* pen “*hehnepna*” hileuleu a; 2Cor. 7 sungah sagihvei tak omkha hi. Hih laikhak in a kamhon na mahtawh kamkhup kik a; Pasion’ hehnepna lianpi hong pia ding (2Cor. 1: 3–7) cihhi. 2 Cor. 7 sungah Paul’ hehnepna pen “*dahsakna lai*” hangin ama’ ngiimna tangtung ahih manin, hehnep lungnopna ngahthei ahi hi.

Hih lungnopna pen, Titus hong thupuak hang hiphadiak hi cihte hang; Paul’ lung nopna piangsak taktakpa pen Pasion ahi hi (2Cor. 7: 6). Pasion pen “*hehpihna khempeuh a nei, i kisapna khempeuh ah ahong huh Pasion*” (2Cor. 1: 3, 4) ahi hi.

Paul pen “*hehnepna tawh kidim*” ahih manin “*lungnuam mahmah*” (2Cor. 7: 4, 7, 13). Ama’ dahsakna laikhak in dahna tampi piangsak a, tua dahna in zong Pasion’ deihna bangin kisik kikna ahi hi (2Cor. 7: 9–11). Corinth mite pen “*Pasion’ deihna tawh kituak in dahna*” (2Cor. 7:11) hi a, “*hotkhatna ngahtheihna ding lungsim kikheelna*” (2Cor. 7: 10) ahi hi. Pasion’ nasem maan taktak te tungah bangteng peuhin lungnopna hong piak sakthei lai ding hiam?

Nangma nuntak sungin Pasion deihna bangin dahna naneingei kha hiam? Tua bangin Pasion’ deihna bangin dahna in kisikkikna hong tun cih na koici theih thei hiam?

FRIDAY

September 4

Ngaihsutbeh ding: Ellen G. White, “The Message Heeded,” pp. 323–334, in *The Acts of the Apostles*.

Nungkal in, a tunga thu pen *The Acts of the Apostles* bulpuh in simkhin hihang. Simkik taak mahmah lel hi. Tu in ahileh, Paul’ dahsakna lai lamah lungngai ni in, a lai gelhlai in a lungsim puakzia, leh tua mite a kisikna thuhoih a zak ciangin a lungnopna cihte lungngai ding hihang. Paul’ nasep pen thumaan taktak ahihna leh Christ a dingin na i septak ciangin zatpah theih ding pilna zong hong pia hi.

“*Pasion kiangpan mawhmaina leh, Pasion hong itna hangin, eite zong Pasion tawh kilemkik thei ihihlam vannuai leitungah pulaakkhia ding hihang. Mite a kisik uh ciangin, a lungsim uh a kitap ciangin, Zeisu pen eite’ leh Pasion kilemtuahna ding mawh thoihna hi cih umin Pasion tawh kilemta uhhi*” —Ellen G. White, *Special Testimonies On Education*, p. 223.

“*Pawlpit khat ihihna tawh, khuavak lianpi ngah khin hihang. Topa in muangin hong aap hih khuavakpen leitung ah thupha leh phatuamna bawl ding thi hi. Kilemtuah na nasep zong eite hong kipia hi. Tunglam panin vangliatna tawh mite in Pasion tawh kilem dingin hanthawn ding hihang*” —Ellen G. White, Letter 32, 1903.

Pasian tawh akilem mi peuhmah in siangthona zong ding hihang. 2 Cor. 7: 1 sung tawh kisai in EGWhite in Paul' cihnopna a genna ah “kisiansuah in Pasian zahtak” (2 Cor. 7: 1) ding cih. EGWhite in bel thu ummi a thakte in “*amau khe tungah dingzo in, Christian khangtote suak in, upna thakhauh, a lawp mahmah leh Pasian'gam a mainawt theihna dingin lungsim khempeuh tawh a ki-aap te suaksak nuam hi*” cih—Ellen G. White, *The Acts of the Apostles*, p. 201.

Kikupding Dotnate:

1. Paul in eite pen lungdamthu a kikoihna “*leibeelte*” (2Cor. 4: 7) hong cilel hi. Mi i cih limlim pen *thanem, kitam baih in ciangtan neilua* ihih manun, lungdamthu tang-kona ding thanemna omsaklo in, thahatsak semsem thei hi.

2. “*Mithak*” (2Cor. 5: 17) cihpen bang acihnopna hiam? Hih in i nisim nunna koibangin hong sukha hiam? Christ in koibangin mithak hong suah hiam?

3. 2 Cor. 6: 4, 5 sungah, Paul in lungdamthu hangin haksatna tampi gualsuk diudeu hi. Ama' thuaknate koibang in dawngthuk hiam (2Cor. 6: 6, 7)? Nang aa te zong e leh koicih ding cih hong hilhcian naci hiam?

4. Paul in Pasian' deihna tawh dahna leh leitung vai tawh dahna ci in tehkak hi (2 Cor. 7: 10). Dahna leh kisikna koibang in kizomthei ding hiam? Pasian' deihna bangin dahna leh leitung vai tawh dahna koibangin khentel thei ding hiam?

Lesson 11

September 5–11

KEPCINNA LEH MISSION



SABBATH NITAKLAM

Tukalsung Simding: 2Cor. 8–9; John 3:16; John 17:5; Luka 9:58; .Mang. 13:8; Rom. 12:8; Rom. 15:26, 27.

Kamngah: “I Topa Zeisu zong hau mahmah napi in, Ama' zawinna tawh note mihau na suahtheihna dingun, note hangin mizawng in hong kibawl ahah manin; Topa Zeisu Christ hong itna bangzahta in lian hiam cih thu nathei uhhi” (2 Cor. 8: 9).

Corinth Nihna 8 leh 9 sungah Corinth mite in Judea gam a om sanggam unaute huhna piak ding Paul in vaihawmsak cihthu pulak hi. Hihmun in piakkhiatna pen Pasian in hongpiak hunhoih hi a, Christ' in Amah hong kipiakkhiatna lim ciintheih hunlem ahi hi. Vantung' kammal khatpen piakhia cih ahihi. A kammalte ngaihsun dihve: “*Pasian in A Tapa neihsun a piak dongin leitung a it hi*” (John 3: 16).

Tua banah, John 3: 16 sungah Pasian in Zeisu a piakkhiatna deihna pulak a “*Amah a umte khempeuh kisialo in a nuntak tawntung na ding*” cih. Hihteng ah kepcinna leh mission (*Stewardship leh mission*)

tonkhawm hiuhiau hi. Amau tegel pen a kikhen theilo dangka tang' maitang nih tawh kibang hi. Paul in amah leh a naseppihte pen "*Pasian' thusim a zeekte*" (1Cor. 4: 1) kici uhhi. Tua ahih manin eite zong **a zeekte** ihi uhhi.

Tukal sungin stewardship (*a zeekte*) leh mission hi uh a, Zeisu' limlahna sungah thuklut mahmah khin uhhi. Stewardship leh mission pen kikhen theilo hi. Stewardship in pawlpi pen sum tha leh mihing tha tawh panpih in Pasian' mission picingsak hi.

SUNDAY

September 6

Zeisu' Lim Honglahna

2 Corinth 8 leh 9 sung thuteng pen, Judea gama om mizawng daipam teng huhna dingin sum kidong ding hanthotna a hihi. Tuateng khempueh nahih khinzo uh (2 Cor. 8: 10, 11; 2Cor. 9: 5; 1Cor. 16: 1-4) hi napi, amau leh Paul kikal ah kizopna hoihlo sese hi. Tua buaina teng a siansuah khit uh ciangun (2 Cor. 1-7), Paul in tua nasep teng thu khupna bawla hi (2Cor. 8-9).

Amasa penin, Paul in, Macedonia mite hihdan zui dingin hanthawn a (2Cor. 8: 1-7), amaute zong zawngkhalua mahmah hinapi "piakkhiatna lamah cingh thei mahmah uh" (2Cor. 8: 2) cih. Zawwna leh citna zong tonkhawm thei veve hi. Bangpueh hitaleh, Macedonia mite' citna pen Zeisu in Ama' pumpi hong kipiakkhiat a citna mah limciing ahi uhhi (2Cor. 8: 8-15).

2Cor. 8: 9 simin. Himun ah Zeisu' lim koici gen hiam?

.....

2 Corinth 8: 9 sunga Paul' thu gente pen, Laisiangtho buppi sungah a lamdangpen a vangneipen leh a thuthukpen ahi hi. Paul in Zeisu' nasepna tepen sumbawl kammal tawh pulaksak hi. Biakna vai tawhzong kinai mahmah hi. Laisiangtho tangkhat sung bek ah hotkhiatna tangthu om cihna ahi hi.

A lungluthuai semsemna pen, tua tangthu pen sumbawl kam tawh kisuut suk hi. Zeisu hau mah hi. Ama' hauhna in Amah vantung ah ma-omkhin (John 17: 5) cihna ahi hi. Hih leitung dahna sungah zawngkhal takin hong tuaksuk in vantung minthanna teng nutsiat ding khentat hi. Hong zawngkhal takpi hi (Luke 9: 58). Pasian tawh kikim uh hi napi, "*Amah hong kiniamsak tawmin nasem'lim hong puazaw a, mihing bangin Amah hong kibawltawm hi*" (Phil. 2: 7). "*Mihing' lim pua in, kiniamkhiat tawm in singlamteh tungah sih ding dongin thu-mang hi*" (Phil. 2: 8).

Eite in Zeisu tawh i nuntak tawntung nading in Amah'n a nuntakna piakhia hi. A hong kipiakkhiatna in ngiimna khat nei a: eimah hotkhiat na'ng ahi hi. Stewardship leh mission tonkhawm hiuhiau hi. Corinth Nihna 8 leh 9 tegel in, sumtang mahmah piakkhiat na tangthu gen a, tua tangthu in Zeisu tungah kibalphut hi. Tukalsung in, Christ in Amah mah hong kipiakkhiatna tungah bulphut in biakna thukhun pawlkhat mukhia ding hihang.

Zeisu' suahna, nundan, sihna leh a thawhkikna lungngai phot in. Hihteng khempueh nang a dingin ahih hi a, hi leitung khengval pek munkhat ah lam-etna khat hong neisak cih naphawk ciangin; na koici dawnthuk hiam?

MONDAY

September 7

Hanthotna

2Cor. 8: 1, 5 leh 2Cor. 9: 7, 9, 13, 15 simin. A thupuak laigil bang hiam?

.....

2 Corinth 8 leh 9 sungah piakkhiatna dim ziazua hi: "*Pasian' hehpihna ngah*" (2 Cor. 8: 1); "*Amau kipia masa*" (2Cor. 8: 5); "*Na lungsim sungah na ngaihsut zahciat uh pia un. Pasian in piaknopna*"

lungsim tawh apiate bek deih” (2Cor. 9: 7); “Amah in citna tawh mizawngte piakhia” (2Cor. 9: 9); “*Nomau citpiakna hangin ,, Pasian’ min kithang sak hi*” (2Cor. 9: 13); “*a manphatna genzawhloh Pasian hong piak hih thupha hangin Pasian tungah i lungdam hi*” (2Cor. 9: 15). Corinth Nihna 8 leh 9 tegel in piakkhiatna kammal tawh thuhong in thu-khup kik hi (2Cor. 8: 1 2Cor. 9: 15). 2 Cor. 8 leh 9 peuh mah piakkhiatna lungsim bek tawh simding hihang. Amaugel in sumpi piakkhiat na’ng hangthu thupi li hong hilh hi:

1. Pasian’ hehpihna hangin Lungdam (2Cor. 8: 1; 2Cor. 9: 14, 15). 2Cor. 8 leh 9 tegel in “*Pasian’ hehpihna*” cihtawh kipan limlim hi (2Cor. 8: 1). Tua banah Paul in “*I Topa Zeisu’ hong hehpihna bangzah lian cih nathei uhhi*” (2Cor. 8: 9) cih. Pasian leh Christ’ hong hehpihna pen; piakkhiat theihna dingin thukhun tawphah pi in hong pulak hi. Pasian in zong Christ hong piakna sungah tampi hong piakhia khin ahi hi. Tua hi a, eite’n zong sumpi piakna tawh eima’ nunna sungah Pasian’ hehpihna a kipsak ihi uhhi.

Piakkhiatna cih kammal pen “*hehpihna*” (Greek, *charis*) tawh kithuah in 2Cor. 8 leh 9 sungah omsuksuk hi. A kipatna ah *charis* a om mahbang in a tawpna ah zong om hi (2Cor. 8: 1; 2Cor. 9: 14, 15). Paul in eima’ nuntakna sungah Christ’ hong hehpihna in midangte tungah thupha bawlina leh hehpihna phatna ci in khiatna namnih in kikhen thei hi.

2. Zeisu’ Limlahna Zuinuam (2Cor. 8: 9). Zeisu hau gige napi mizawng hong suak (*Amah om tawntung ahihna mihing hong suahna limlahna*). Tuabang ahihtheihna ding lampi khatbek om a: a vekpi in piakhia hi. Eite’n zong sumpite piakkhiatna pen midangte in Christ theihsakna.

3. Pasian’ Thupha Hawmsawn nuam (2Cor. 9: 10, 11). Pasian kiangpan in ngah masa ihih manun, midangte a piakhia ihi uhhi.

4. Itna Maan taktak (2Cor. 8: 8, 24). Piakkhiatna pen itna maantaktak sittelna ahi hi. Mi khatpeuh lungsim sungah itna a omlam theihna zong ahi hi. Mikang paunak khat ah “*Na gen bangin semin*” cih.

Nang bangzah na cingh hiam? Singlamteh khuavak sungah, nangma piakzawhzah sangin bangzah napia zaw hiam?

TUESDAY
Ngiimna

September 8

2Cor. 9: 7. Hihmun in sumpi piakna koici gen hiam?

Pasian in leitung a hotkhiat ding khentatna pen leitung in mawhna sung a tunma pekpan ahi hi. Christ in eite a ding si dingin hongpai ding zong tangtawng ngiimna ahi hi (*Mang. 13: 8*). Pasian kilatvat khollo hi. Zeisu Christ tungtawn in Amah hong kipiak sawm ngiat hi. 2 Corinth 8 leh 9 sungah, piakkhiatna ah ngiimna pen a omloh phamawh a kism biaknalam thukhun khat hi cih. Tua zong lampi nih tawh kientel thei hi.

1. Ngiim cihpen Ma-khentatna omkhin. Paul in “*kuama peuhmah in na lungsim sung vuah na ngaihsutsa zah pia un*” (2Cor. 9: 7). Khentat cihpen Greekpau in *proaireô* ahi hi. Kammal kigawm hi a *pro* in ‘*a masiah, hihkhol*’ leh *aireô* pen khentat ahi hi. Tua ahih manin *proaireô* cihpen a *masang in khentat* cihna ahi hi.

“*Akuama peuhin*” cihtawh a kipat ciangin, Paul in a phazah dingpen khatlehkhat kibanglo ding acihna ahi hi. Ama’ cihnopna pen mi khatpeuh in piak ding a khentatna ah, kidopna tawh khentat ding hi. Ei mahin piakding hoih i sakzah pen thumaan hipah lel hi.

2. Ngiimna ah a kilawmzah ding thukhun omhi. Macedonian mite in “*amau’ ngahna tawh kituakin*” (2Cor. 8:3) pia uh Paul in cih. Tuakhit ciangin Corinth mite a dingin a kilawmzah cileuleu hi. Amau’ kipiaknasa vaipuak a zawhsiang theihna dingun amau’ neihsa mahuh zang dingin hanthawn hi (2Cor. 8:11). “*Piaknopna lungsim neih nakleh, neihlohna te siksanzawlo in, neihna tawh kizui in piakna Pasian in sang*” (2Cor. 8: 12) cih.

Laisiangtho in a kilawmbang in piakna ah sawma khat cih ciangtang hongpiak hang; sumpi pen ciangtan omlo hi. “A kuamapeuh

in na lungsim sung uhah na ngaihsut sa zahuh pia un” (2Cor. 9: 7V) a kilawmzah ding thukhun zang ding hi, Thukhat panin mi kuamapeuh in ama’ piakkhiat dingzah amah mahin khentat ding hi. Amau’ neihsa tawh ki zui in piak ding hipeuh hi. Hihpen ngiimna geelna lotawh kihih theilo hi.

Nang nahau in na zawng phial zongin sawmakhat piak bangzah nacitak hiam? A tamzaw hihthei gige napi in; nahih ding bang paulam peuh na zang zel hiam?

WEDNESDAY

September 9

Lungsimpuak

2Cor. 8: 1–5 simin. Macedonia mite hizah a citna tawh a piaknop theihna uh a hangthu bang hihtuak pen hiam?

.....
Macedonia mite’ lungsimpuak hoihna a nuaia bangin kimuthei hi.

1. Lungdamna lianpi tawh piakhia (2Cor. 8: 2). Paul in Macedonia mite pen “zawng mahmah uh hitaseleh, lungdam mahmah ahih manun piakna lamah cingh mahmah” (2 Cor. 8: 2) cihi. Anunglam ah Paul mahin “piaknopna lungsim tawh apia mite bek Pasion in deih” (2Cor. 9: 7) cihi.

Greekpau in “Piaknopna lungsim” acihpen, laisiangthothak sungbup ah hiteng bekah om hi. A kammal innkuanpih dangbel omkawikawi mah hi: “Mi dang hoptheihna ding anei ihihleh citna taktak tawh hawm ni” (Rom. 12: 8). Hih kammal huam dangte in laisiangtho tawh kisai laituumtuam te ah nuamna leh lungdamna tawh ci in omthei zel hi. 2 Cor. 9: 7 sungah piaknopna lungsim tawh cihpen tonlo in piakkhiatna ahi hi.

2. Cinghtak in piakhia (2Cor. 8: 2). Macedonia mite’ citpiakna a genkhiat ma in Paul in, amaute “zawngpha mahmah” cimasa hi. Citna cihpen (Greek, *haplotetos*) hi a, 2Cor. 8 leh 9 sungah nihvei hong omkik leuleu hi. Paul in

“note in na citgamtat zawh tawntung theihna dingun Pasion in hong hausak tawntung ding hi” (2Cor. 9: 11) acihteh, a deihna in, i piakkhiat zawh tawntung na dingin hong kipia ding cihi. A thuthuk zaw deuhin Paul in, “cinghtakin na piakkhiatna uh” (2Cor. 9: 13) cihi. Hihteng ah piakkhiatna ah citna pen, Christ’ lungdamthu tangkona namkhat mah ahi hi.

3. “Amau lungsim uttawmna uhtawh pia” (2Cor. 8: 3). Lungsim suakta takin pia uh cihna ahi hi. Aval a liap nei tuanlo napi uh in; amau’ neihsa in ciangtan om mahmah kawmkal panmah in piakhia veve uhhi. Corinth khua ah Titus a vahawhnopna thu Paul in a gen ciangin, tua ngaihndan mahpen zangin gen hi. Corinth ah hawhnopna lungsim neitawm cihi (2Cor. 8: 17).

4. Piakhiatna pen hamphatna in ngaihsun (2Cor. 8: 4). Huhna sum kaikhawm ding cih ciangin Macedonia mite’ ngetna sungah hibang lungsim omkhinkhian hi. “Ko zong hong huhsak un ci in hong thumthum uhhi” (2Cor. 8: 4) cihi.

5. Amaute Pasion kiangah ki-aap masa in Topa’ deihna bangin kote hong piakhia (2Cor. 8: 5). Paul in, “Amaute Topa’ tungah kipia masa uh a tuakhit ciangin Pasion’ deihna bangin kote hong pia uh” (2Cor. 8: 5) cihi. Eimah Topa’ tungah kipiakna in eimah mah midang a ding kipiakna piangsak hi. Macedonia mite in amau mission pen sum lam khengval in sem uhhi. Cihnopna in, piakkhiatna leh citna cihpen sum bek tawh kiciangtan lo hi.

THURSDAY

September 10

Kipumkhatna

Corinth pawlpi mite in Judea gam a mizawngte a ding sum kidonna ah kihel ding in Paul in hanthawn cih mukhin hihang. Ama’ ngiimna khat pen kipumkhatna tawhkuang nuam hi. Mission nasepna sungah amaute kihelsak nuam hi. Jerusalem a thu ummite mah bang in biakna pualampan

thu hong um mite zong Pasian innkuan sung hong lutta cih zong theisak nuam hi.

Hihmite in khatveilai in amaute' langpangte hikhin napi in tu in, Pasian' thuciam thak sungah a beibaangte ahi uhhi. Christian innkuan buppi Jew mi leh Gentile mite in vanglian takin kipumkhat in, khangthak pawlpi a dingin tecipangte ahih theihna dingun Paul in deihsak hi.

Titus leh a sanggam ahi adang nih tegel in funds sumte kem uhhi. Tuabang in pawlpi kepcin nopna lungsim pen Pasian in Titus' lungsim sungah koihsak hi (2Cor: 8: 16). Pawlpi sungpan in zong Pasian in tua unau tegel teelkhia hi (2Cor: 8: 18–23). Amau tepen “*Christ' min a thangsak, pawlpite' tangin thupuakte*” (2Cor: 8: 23) kici uhhi. “*Christ' min a thangsak*” cihpen hih a citak unau tegel zong hithei a pawlpite mahmah zong hithei uhhi. Sumpi piakkhiatna pen pawlpi' lutang ahi Christ tungah cihtakna lahna ahi hi (Eph. 4: 15).

Corinth Nihna 8 leh 9 in, sumpi cihlimlim, pawlpi tungtawn in, Pasian ciangtansa mite tungah piakding cih honglak hi. “*Pawlpi khempeuh*” (2Cor: 8: 18), “*pawlpite in teel in a sehpa*” (2Cor: 8: 19), “*pawlpite' thupuakpa*” (2Cor: 8: 23) ci in kiciantak in hong hilhcian khin hi. Tua ahih manin a nuaiyah hanthotna “*pawlpite maiah na itna uh limtak in lak un*” (2Cor: 8: 24) cihi.

Leitung ah Pasian in hong koihsak pawlpi tungah sumpite paipihna in – kipumkhat na piangsak a, kipumkhatna' gahmah zong hizel hi (2Cor: 8: 13, 14). Sumleh pai in hong pumkhatsak thei nalian khat ahi hi. A lehlam in mi khempeuh in Pasian' min than na'ng bek a mitusan keivua leh, sumleh pai in hong khenkham thei leuleu hi.

Paul in pumkhat ding a deihsak Rom. 15: 26, 27 in koibang in pulaak hiam?

.....
T-8

A nunung penin, Paul in, fund kaihkhopna cih peuhmah, donna, hehpihna, huhna, thupha saanna, biakpiakna leh kikhawlhna ci in pulaak hi. Tuate khempeuh sum pan hong pai hiam, lungngai in.

A gamla mahmahna a om i lawm thu ummite tungah, eima piakkhiatna in leitung bup huam pawlpi pumkhat theihna ding bang semthei ding hiam?

FRIDAY

September 11

Ngaihsutbeh ding: Ellen G. White, “A Liberal Church,” pp. 335–345, in *The Acts of the Apostles*.

“*Christ hong itna tawh akidim lungsimte bekin, eite hangin zawwna thuak a, Ama' zawwna hangin, eite hong hausakpa' nung zuizo ding hi. Sum, hun leh huzaap peuhmah Pasian kiangpan in kingah ahih manin; tuate pen aumau un lungdamthu mainawtna ding in manpha sak thei uhhi. Pawlpi masa sungah zong tua mahbang hikhin a; tuhun pawlpi sungah zong, Kha Siangtho vangliatna tawh pawlpi mite in amau' lungsim sungpan leitung nate hemkhia uh in, amaute' lawmte un zong tua lungdamthu a zak ciangin amau zong ki-aap nuam cih amuhuh ciangin; amau' tangko uh thumaan in tua mite tungah muibun mahmah cih thei ding uhhi*”—Ellen G. White, *The Acts of the Apostles*, p. 71.

“*Topa in eite' sumpi a kisas hihetlo hi. Eite' piakna leltawh Amah kiausak zolo ding hi. Laphuakpa in 'Na khempeuh Nang kiangpan hong pai a, Nangma neihsa hong piak ahi hi' (Late 16: 2) cihi. Pasian in Ama' hong hehpihna hangin lungdamna tawh midangte tungah hawmsawn piakkhiat ding deih leuleu hi. Pasian tungah eima' itna leh lungdam kohna te lahkhiat theihna'ng lampi in, hibekmah om hi. Lampi dang Amah'n hong bawlsaklo hi*”—Ellen G. White, *Counsels on Stewardship*, pp. 18, 19.

“*Pasian hong silpiak lian ve e; tuabang Pasian lamdang ve e. Kuama' dem zawh loh phalna tawh hongpia a, tua tawh langdo a tate Ama' hong itna bulpi telcian a hot khat theihna ding ahi hi. Tapa*

*khat aneihsun piakhia in Amah a ummite peuhmah kisia lo in tawntung nunna a neihtheihna ding: tuabang hong hihsakpa a dingin, nang piak theih letsong teleh sumpite khempeuh sangin lianzaw tham cih nalakhia ding hiam?”—Ellen G. White, in *The Advent Review and Sabbath Herald*, May 15, 1900.*

Kikupding Dotnate:

1. 2Corinth 8: 9 lungngai kikin. Stewardship thu i gennakleh, banghang in Zeisu hong limlahna etteh kulngiat hiam?
2. John 3: 16 in vantung’ kampau pen piakkhiatna cih koibang in hong lak hiam? John 15: 13; Ephet 5: 2, 25; Galati 2: 19, 20; leh 1 John 3: 16 simin. Hihmun teng leh John 3: 16 in kibatpih bang nei a, bang thupuak kila thei ding hiam?
3. 2Corinth 8–9 na simna bulpuh inla, piakkhiatna in bang phat tuamna hong ngahsak thei hiam?
4. Sumpi piakzia tawh kisai in, Zeisu’ hong limlahna bang tengpeuh zuihhuai nasa hiam?

Lesson 12

September 12–18

KAMSANG ZUAU TETAH KIZOPNA



SABBATH NITAKLAM

Tukalsung Simding: 2Cor. 10: 1–17; Jer. 9: 24; 2Cor. 11: 1–15, 22–28; 2Cor. 12: 20, 21; 2Cor. 13: 5.

Kamngah: “Kote’ zat galdona hiam pen leitung galhiam lelte hilo a; galte’ panmun phualpi a susiazo ding Pasion’ galhiam khauhte ahi hi”(2 Corinth 10: 4).

Paul in thusialua tuakngeilo hihtuaklel a, tu in thubuai dangkhat a siansuah ding hong om zel a: kamsang zuaute ahi uhhi. Hih mite in amah leh a nasep dokinken uhhi. A suksia zawlai in hih kamsangzuaute in Corinth pawlpimite zolsim den uhhi. Paul hih thu buaina sungah kidona pen khalam’ galdona cih.

Hihpen a thu omzah sangin a uang genuh ahithe i diam? Hilo hi. Tua mite in Paul lellel do hizawlo in Christ mahmah a do ahihna Paul in theitel mahmah hi. Paul pen a kiliansak mahmah angkhual makaite bang hilo hi. Ama’ aana kipkhona dingin ama’ khutnuai mite’ tungah a kiliansak keei makai namte hilo hi.

Amah'n a tangko dingin thupiak anghang ngiat tua thupuak pen: nuntakna, sihna leh tawntung thu hi cihpen amah'n telngiat hi. Hihmah sem dingin Pasion in amah asawl ahizong amah'n tellua hi. "*Christ Zeisu' Sawltak dingin Pasion in hongteel keimah Paul*" (1Cor. 1: 1) ci ngiat hi.

Thu zuau hilhte hong tun ciangin, pawlpi in Laisiangtho mah siksian in itna tawh kipkho takin om ding kisam hi. Lungdamthu kisia hetlo in siangtho sitset in kemcing ding hang a, kha khempueh in tawntung lam-etna neisak ding hihang.

SUNDAY

September 13

Khalam Galdona

2Corinth 10: 1–11 simin. Corinth mite tawh akizopna ah Paul' lungneemna pen thanemna peuh kisakha zawsop hi. Corinth mite laka kamsang zuaute tawh a ki zopna ah Paul in a hangsanna kammal bangteng hiam?

.....

2 Corinth 10 na pen Paul in ama' aituam in thu pan hi: "*Keimah, Paul in, Christ' migitna leh lungduaina tawh note kiangah ka hong thuum hi*" (2Cor. 10: 1). Hihthu in tua pawlpi sungah kamsangzuau thuhilhna simlutta cih a lunghihmawhna lahna ahi hi. 2Cor. 10: 1 sunga Paul ' kammalte in, langdo mite' mawhzonna tengpen lung hihmawhna tawh pulaak hi. A mawhzondan in; Paul in gamlapi panin a laikhak penbel, lauhthawanna sim-mawhna bang hinapi: midang tawh maitang kimuhna ah a meidawipa hi ci uhhi (2 Cor. 10: 10, 11). Meidawi thanemna cihte peuhmah pen, vangliatna tawh a kidim, Christ bang in lungnemna leh migitna tawh kidimna Paul in cihhi.

Kamsangzuau peuhmah hangsan tak lungmuang in talsik kul (2Cor. 10: 2) hi na pi, Christ' migit lungduaina tawh helh kulse hi (2Cor. 10: 1). Khatvei, Zeisu in "*Keimah in, kiniamkhiat in ka lungnem hithiat hi*" (Mate 11: 29) cihhi. Ahihhang Zeisu in zong sumkhekte pen hangsan

takin talsikpah in a sabuai uh lumlehsak in buluhte ci in taai hi (Mate 21: 12, 13). Pharisee tebang pen a maitang mahpan in, mi simtatte, a kaang kizut hankhukte cigiap hi (Mate 23: 23–27). Zeisu mahbang in Paul in zong, eite pen Pasion' galvan namkim (Eph. 6: 12–17) zangin khalam galdote ihihlam theilua hi.

2Corinth 10 sunga Paul' kammalte pen, nuntakna nangawn a lauhuaisak galthu vive (2Cor. 10: 3–6) ahi hi. Hihpen mihing maimai kidona hilo a; Christ kiangah mi zawh na'ng galdona siangtho ahi hi. Tuataw h kizui in, thumaanlo leh ngahsutna maanlo peuhma talsik do in Pasion' kammal siksian in hepkiat ding ahi hi. Tua hileh ngaihsutna khempueh "*zogawp in Christ' thu mangsak thei*" (2Cor. 10: 5) cihhi.

Hih khalam galdona ah, Paul in Christ' thupiakna tawh gamtang hi. Tua thupiakna in suksiatna lam hilo in puahphatna lam hizaw hi (2Cor. 10: 8). Khalam makaite in amau Pasion thupiakna tawh gamtang a kicih dinguh baihlam mahmah hi. Bangpeuh aci uh zongin, Christ' thupiakna a nei peuhmah in Amah bang ding cihpen phawk uh henla, lungsing sungah lungnem in kiniamkhiat ta uhhen.

Paul in thuneihna septheihna a gen ciangin, Christ' thupiakna tawh a sep hi a; tuabang in a cihna zongpen, Corinth mite in kamsangzuau' thu peuh ngai uh ahih manun Christ tungah a cihtakna uh a kisiatsak khak ding a launa hang ahi hi.

Eite zong kamsangzuau tetawh kizopna sungah koibang in lungnem in hangsan thei ding ihi hiam? Banghang in a nihtuak in hihtuak nasa hiam?

MONDAY

September 14

Topa sungah Kisial

Zanni in, Paul leh a naseppihte in, amau' nasep pen khalam galdona ci in hahkat takin Pasion kiangpan galhiam namkim zang uhhi.

Tuni in, kamsangzuau peuhmah in mihing' dinmun ciangbek tawh gamtang cih i mu ding uhhi. A kisialhdan uhlah khengval lua hi. A langkhat ah Paul in Topa sung bekah kisial hi. Amah'n zong "Mikhat in a kisialh nopleh Topa' sungbek ah kisial taken" (2Cor. 10: 17) ci in gelh hi.

2Corinth 10: 13–17 simin. Kidemna lungsim in lungdamthu hihhna ah bang zah lauhuai hiam?

.....

Paul in a kisialhna kammalte pen zalom tawntung in kamlette in lunglutsak mah mah hi. Ahihthei hang tuabang kiliatsakna cihpen amau' tanglai hunin pheivei lelpeuh a, mipite a sukkhak lohna dingin a mipi mahin kemcing zawsop uhhi. Paul in zong tuathu theiveve ahih manin, amau' nung zuiziau hi. Tua banah, Paul in ama' kisialhna dan pen tua kamsangzuaute kisialhna dan tawh kibang hetlo cih zong kitelcian sak mahmah hi. Amah Topa sung bekah kisial hi (2Cor. 10: 17).

Tuazong pen, Laisiangtholui sungpan in a lakkhiat hi a: "a kiasathei te in, Keimah leitung ah migitna, thumaan leh thutang a zang kahihna leh tuate sungah nuam asapa ka hihna a theihna uhah kiasathei uhhen" (Jer. 9: 24). Jeremiah' kammal zangin Paul in; Christ hong itna, thumaan thutak a zangpa leh dikna bek tawh a gamtapa bulphuh hi cih hong lakkhia hi,

Thukhat panin, Paul' kisialhna peuhmah pen Christ sungah Pasian in a hihsak teng hangbek ahi hi. Tua hi a, Paul' kisialhna in Laisiangtho tawh kituak hi. A langkhat ah, amah a langdo mite' kisialhna ahihleh, amau leh midang ki enkak in kidemna sungah kisial uhhi. Tua pen haina taktak ahi hi! (2Cor. 10: 12).

2Corinth 10: 14–16 sungah, Paul in, Corinth leh a kimkot huamah a nasepna teng pen lungdamthu tangkona mah bulphuhpi in nanei hi. Christ' sihna, leh thawhkikna sungah hotkhiatna thupha a tangko theihna dingin, Zeisu a itna mahin Paul tawsawn den hi.

Corinth khua ah amaumah akiphattawm kamsang zuaute tawh kibanglo in, Paul pen Pasian in pakta hi (2Cor. 10: 12, 18). Amah pen "Christ Zeisu' Sawltak dingin Pasian in a teeltuam" (1Cor. 1: 1) cih. Hih sapna tungah ama' nuntak tawpna dongin citak ngiat hi (2Tm, 4: 7)

2Corinth 10: 12–18 simin. Pawlpi makai leh pawlpi mite in, kidemnopna koibang in pelhthei ding hiam? Bangmah thupitna mel a neilo nate sungah awk ding banghang in baihmahmah se thei hiam?

TUESDAY

September 15

Kamsangzuau teng Pholhkhia

Laisiangthothak sungah Christiante te lakah kamsang zuau tetawh kisai hihkhoh na tampitak mah om hi. Zeisu mahmah in a nungzuite pen tua thumah hihkhoh hi (Mate 7: 15–20). Sawltakte in zong tuamah genbel in nei uhhi (Gal. 1: 6–9; 1Tim. 6: 3–5; 2Pet. 2: 1–3).

2Corinth 11: 1–15 simin. Paul in a tuahkhak kamsangzuaute tawh kisai tonate koibang in pulak hiam?

.....

Paul in kamsangzuaute nasepna pholaaksak hi. Tua santak mahah ama' nasepna pen Christ-bulphuh ahihna zong pulak hi. Corinth pawlpi pen mo khattawh genteh in, tua mo pen Christ tungah a aapding a pa pen amah kahi cih (2Cor. 11: 2). Pawlpi a itman in a cih cih (2Cor. 11: 11). Tua hangmah in amaute in Paul a panpih ding uh hinapi, sumlam vangik peuhmah pia nuamlo hi (2 Cor. 11: 7–12).

A langkhat ah, "Sawltak lthupi mahmahte" (2Cor. 11: 5) (kamsangzuaute a cihnopna hihtuak) pen Eve akhem gulpi tawh genteh hi (2Cor. 11: 3). Eden huan sunga Satan mahbang in, Corinth pawlpi sunga kamsangzuaute in khemma leh suksiatna bawl uhhi (2Cor. 11: 3, 4). Corinth mite in Christ tungah lungsim takpi tawh a ki-aapna, a cih takna tenguh pan lam apialkhak ding Paul' lungghimawhna bulpi ahi hi.

Buluhte in Paul' hihl thupuak tawh akibanglo a dangkhat – Zeisu a tuamkhat leh lungdamthu a dangkhat hong hihl uhhi (2Cor. 11: 4). Hihthu in Zeisu' thu a hihl mi khem peuh pen Pasion' thupiakna ngahmi hikhinlo cih lahna ahi hi. Tuathu tawh kisai in Zeisu ngiat in “*Topa, Topa hong ci khempeuh in vangtung gam lutlo ding uh a, Ka Pa' deihna bang ahihte bek lut thei ding hi*” (Mate 7: 21) cih. Galati 1: 6-9 sungah Paul mahin, a dang lungdamthu khat hong hihl a om peuhmahleh tua mipa in samsiatna ngah taken ci khin hinapi; Corinth mite pawlkhat in hih khialhna mahmah phal gige tazen uhhi.

Paul in tua sawltakzuaute minvawh in “*Sawltak a kineihkhem, nasepna ah zuau in Christ' Sawltak taktak a bat theihna dingun amel kiseelsak uhhi*” (2Cor. 11: 13) cih. “*Satan nangawn in Pasion' vantungmi tawh a kibangin hong kibawltawm thei hi. Satan' sawltakte'n zong thumaan nasepna bangin hong kibawltawm*” (2Cor. 11: 14, 15) cih. Christ' nasepna kineih in Satan' mimuan thukante ahih uhpen dahhuai mahmah hi. Paul in “*hunbei ciangin amau nasepna thuak ngawn ding uhhi*” cihtawh thukhup ta hi (2Cor. 11: 15).

**Pawlpil sungah khialhnate Paul in khuhtak in dawngthuk hi!
Tua thu in eite e leh, bangthu hong gen naci hiam?**

WEDNESDAY

September 16

Lungdamthu a dingin Thuaksiatnate

Kamsang zuaute pen Satan' mimuante a cihkhit ciangin (2Cor. 11: 1–15), Paul in, tua kamsangzuaute thugenna pen Corinth mite in vangaizel cihthu in khatna neivetlo a hihna a muhteltheih nadingun; mihai bangin; kisialhna tawmcik khat tawh amaute' kimawlina bang lianin kimawlpil hi (2Cor. 11: 16–21). Tua mite khawng Corinth mite in pimuh mahmah uh ahilhleh; Paul in pimuh huai semzaw tham hi. Lungdamthu a dingin a thuaksiatna khempeuh pen a citak Christ' nasempa ahihna hizawsop hi (2Cor. 11:22, 23).

2 Corinth 11: 22–28 simin. Bang thubulpi bawl hiam?

.....

Paul in Jew mi ahihna pen, tua kamsangzuaute mahtawh a kibang (2Cor. 11: 22) hinapi, Christ a ding anasepna ahihleh khengvalpek leuleu hi. “*Amaute in Christ' nasepna ahihleh, hong haipau mai ning; Christ' nasepna ahoihzaw kahi hi*” (2Cor. 11: 23) cih. Ama' nasepna ah khengval; a thongkiatna ah khengval; a satthuakna ah thuaksia zaw hi.

Tua ciangbek hilo lai hi. A thuaksiatna sajian sungah; sawmthum leh kuavei satna ngavei (2Cor. 11: 24), molhpum tawh satna, suangtawh denna, tembaw kisiatna, tuipi thukah lauhuaina (2Cor. 11: 25), khualzinna ah lauhuaina, gun sungah lauhuaina, buluhte lauhuaina, mipihle kiangpan lauhuaina, Gentile mite kiangpan lauhuaina, khuapilian sung ah lauhuaina, gamlak ah lauhuaina, tuipi ah lauhuaina, thu umlote tungpan lauhuaina (2Cor. 11: 26), gimtak in nasepna, ihmud khamlohna, gilkialna, dangtakna, an kitasapna, khuadam giahna ding neilo in ka om hi (2Cor. 11: 27). Tua bangteng bek hilo in, pawlpi tuamtuam te a dingin lunghihmawhna atuamtuam kaneilai cih (2Cor. 11:28).

Christ' nasepna taktakte bekin lungdamthu a dingin hibang thuakna thuaknuam bek uhhi. Paul in a thuaksiatna teng kisial ding hileh tampi a gending omlai hi. Ahizong in a laikhak a nununglam tengah, ama' kisialhna hangthu a pulaak ciangin Christ a ding ama' sepa teng bulpuhlo zaw in: Christ in ama; a ding ahisak teng bulpuh zaw hi.

Pasion' vangliatna peuhmah pen mihing' thanemna sungah kilangh phadeuh cih Paul in thei gige hi (2Cor. 12: 9, 10). Ka pumpi sungah ling khat hong koihsak (2Cor. 12: 7) cih. Paul in ama' sepzawhna tungah a kisialhtheihloh nadingin Pasion in tua ling tawh khaam hi. Tua lignin amah kiniamkhat sak, ama' thanemna phawksak in vangtung vangliatna bek muang sak, Pasion' hoihna leh hehpihna sang semsem sakzaw hi.

Lungdamthu a dingin na thuak ngei khin hiam? Tua nathuakna pan bang teng nakisin kha hiam? Paul in a thuaksiatna te a hihbang in, nangma thuakna zong koibang in nahih hiam?

THURSDAY

September 17

Akisiklote *tungah* Thuumna

2 Corinth. 12: 14–13: 10 sim lecin, Paul in in pawlpi kiangah a thumveina ahawhnathu ahi hi (2Cor. 12: 14; 2Cor. 13: 1). Kamsangzuaute khawng sangin amah niamzaw hetlo ahihna pulak khinzo hi. Tu in lungmuang takin Corinth ah hong paikik in, a kisikmello Corinth mite puahphat ding kahanciam ding cih. Ama' hong hawhna thu bulpi sungah hihzong khat kihel hi. Paul in a kampau gamtatna khempeuh pen pawlpi puahphatna ding vive ahi hi (2Cor. 12: 19).

2 Corinth 12: 20, 21 simin. Bang mawhna khawngpeuh in Corinth pawlpi kha dinmun a dingin lauhuai sak hiam?

2Corinth 12: 20, 21 sungah mawhna sazian Paul in a gualhsuk teng pen; Paul' lai-khakmah ahi Rom. 1: 29-31; Gal. 5: 19-21 sunga tetawh zong kibang uhi. Amaspen nih te ahihle 1Cor. 3: 3 sunga om masa a, Paul in pawlpi sungah hazatna leh ki langneihna om cih. Amah a thumveina a paihun ciangin bangmah a kilandan melloh ding patau hi. “*Kei kong tung ciangin note' omzia ding kadeih bangin na omloh dinguh*” leh a lehlam in “*note in keima' maisuah na muhnopzia bangun nong muhloh khak dinguh*” (2Cor. 12: 20) kalau hi cih. A cihnopna bulpipen amaute tawh kizopna ah “*Christ migitna leh lungduai na*” (2Cor. 10: 1) tawh hih ding sangsik in “*a thumaanlo a citaklo khempeuh gimpia ding kakipan zawsop hi*” (2Cor. 10: 6) a cihnopna ahi hi.

Ama' lunghihmawhna pipen in “*thaangtatna, zualzangna leh hukna lanna hangin na mawhnate uh*” (2Cor. 12: 21) na kisik keivua leh, tua mawhnate in pawlpi sungah pawl kikhenna piangsak hi cih.

Tuabanah, Paul in, pawlpi' khalna tawh mawhneite puahphatna ngiim hi (2Cor. 13: 1–4). Thanemna pen mawhnei nundan a dingin paulam

hitheilo hi. Gualzawhna nundan adeihte a dingin vangliatna om hi (2Cor. 13: 4). Corinth pawlpi mite pawlkhat in zahmawh mawhna abawl uhen, amau' nunna sungah Pasian' vanliatna omsaklo hizaw uhi. Amaute kisik uh henla, thumanna lamah hong paipih vangliatna ngah lehu Paul in deihsak hi. Taaina thuhilhna pen anunung penin koih nuam hi.

Tua ahih manin Paul in “*Note gamtakhial khalo in ... thumaan in na gamtat dinguh ,, kote' thungetna pen note kicingtaak theihna ding*” (2Cor. 13: 7–9) cih. Thungetna hoihlua mai! Amaute upna sungah a omleh omloh amau mah kisittel ding sawl hi.

2Cor. 13: 5 simin. Upna sunga om cih bang acihna hiam? Upna sungah na omlam koibang in thei ding nahiam?

FRIDAY

September 18

Ngaihsutbeh Ding: Ellen G. White, “The Laodicean Church,” p. 125, in *The Advent Review and Sabbath Herald, September 30, 1873.*

“*A beisa hun a mawhna khialhnate bawlkikkik loding in Topa in Amite kemcing hi. A teelsa mite nangawn ahihzawh leh khemding in upkhialhna leh a kihhuai nate thapia in, a lamdang mahmah in thumaanlohna ah dingin, meel kiseel khemna tetawh hong khem kamsangzuaute pen om denden hi*”—Ellen G. White, in *The Advent Review and Sabbath Herald, January 7, 1904.*

“*Eima' muhdan khempeuh zong sittel sitset in, eimah upna ah kipleh kiplo theih telna dingin, a nungta Pasian kammalte encian dingin Topa in eite hong deih sak hi. Thu maan ka um hi aci mi tampi takmah in, kei kalungnuam hi 'kei kahau hi, neihlehlam tampi kanei hi, bangmah kitasam ke'ng' (Mang. 3: 17) aci uhi*” —Ellen G. White, *Counsels to Writers and Editors*, p. 36.

“*Thumaan kician takin hong kilakkhin hinapi, Pasian thumaan dinmun ah amau' upna maanlo tengpeuh mihing in koih mawkmawk hi. Tuabang mite in amau' upna pen Pasian' kammal tawh*

etteh sittel in, amau upna maanlo tawh Pasion' kammal simlo in, amau'upna maan mah hi a cihtentan kei nakleh; amaute un khuamial sungah mittaw in vakvailo ding uh a, khialhna sungah om paisuak lo ding uhhi.

Mi tampi in Laisiangtho pen amau' ngaihdan in letkhia in amaumah kikhemtawm in midang zong amau' telkhialhna mah tawh khem sawnsawn uhhi. Pasion' kammal i sim ciangin, lungsim kiniamkhiat in sim ding hihang. Angkhuahna khempeuh, eima'thubek thu sakna cihte hemkhia ding hihang. Sawtveipi i neihsa ngaihdan peuhmah pen khial ngeilo ci in ngiahsut huailo hi"—Ellen G. White, Counsels to Writers and Editors, pp. 36, 37.

Kikupding Dotnate:

- 1. 2Cor. 10: 1–6 simkik in. Pasion thumaan a dingin 'khalam galdona' a tuah ciangin Paul' hihdan koibang hiam? Eima' khalam galdona ah zong koibang in kizang thei ding hiam?**
- 2. Laisaiangtho in hun beima in, kamsangzuau tampi takte in mipite thumaan panin pialsak ding uh cihi. Na khuatual pawlpi in tua kamsangzuaute khaamzawhna ding in bang hihthei ding hiam? Pawlpi' mission nasepna picinna dingin hihthu in bang hangin kisampha mahmah thei hiam?**
- 3. Thuaksiatna kigual deudau in kisialh theihna'ng hunlem, Paul in banghang in ngahthei dihdih hiam (2Cor. 11: 16–33)? "Topa sungah kisial" cihin bang acihna hiam?**
- 4. Pawlpi mite in upna sungah kip/kiplo cih banghang in kisittel kulkisam sese hiam? (2Cor. 13: 5)? Bang kilamdanna omsak hiam?**

Lesson 13

September 19–25

HEHPHNA, ITNA LEH KIKHAWLHNA



SABBATH NITAKLAM

Tukalsung Simding: 2Cor. 8: 9; Rom. 16: 20; 1John 4: 8–11; 2Cor. 13: 11; Phil. 2: 1, 2; Gal. 4: 4–6.

Kamngah: “Topa Zeisu' hong hehphina thupha; Pasion hong itna leh Kha Siang tho tawh kikhawlhtheihna note khempeuh tungah hongtung taken” (2Cor. 13: 14).

Paul in, pawlpi sungah a omloh phamawh mahmah sawlna nga tawh 2Corinth pen thukhup kik hi (2Cor. 13: 11).

Amasa sawlna, “Lungdam un”, amasa laikhakna sungah zong omkhinzo hi.

Anihna sawlna, “Na omzia uh kipuahpha un”. Hih kammal pen Greekpau in (*katartizō*) hi a, 1Cor. 1: 10 sungah om khinzo hi.

Athumna sawlna, “Khatlehkhat thugente nakizui un” cihpen 2 Cor. 1: 3–7 sungteng a tomlak na ahi hi. Paul in laikhak nihna pen thapiakna tawh thukhup hi. Pasion kiangpan thupiak na akingah mahbang in midangte zong thapiaciat ni (2Cor. 1: 4, 6).

Alina leh angana sawlna, “lungsim kikhat in, kilem un” (2Cor. 13: 11), cihpen kipum khat ding sawlna ahi hi. Lungdamna, kipuahphatna, thapiakna, pumkhatna leh kilemna cihte pen **“itna leh kilemna Pasian”** (2Cor. 13: 11) maiah omzia ding ahi hi. Tua pen thum kigawm Pasian in mihing’ lungtang sungah ansaepna gah ahi hi (2Cor. 13: 14).

Hehpihna, itna leh kikhawlhpihna pen thumgawm Pasian nasepna gah ahi hi. Hih Christian te omzia thumteng in, Pasian hong ompihna telcianna in dingkip hi.

SUNDAY

September 20

Zeisu’ hong Hehpihna

2 Corinth Nihna laikhak a thukhupna pen, a thupatna mahbang in Zeisu hong hehpihna mah tawh ahiah manin hong lawpsak mahmah phial hi (2Cor. 1: 2; 2Cor. 13: 14). Paul in hih alaikhak pen Hong hehpihna vive tawh hong in khup hi. Tu Quarter kipat tuungin imuhua mahbang in Zeisu’ thu ngaihsut leh gen cim thei ngiatlo hi. *“I Topa Zeisu zong haumahmah napi in, Ama’ zawwna tawh note mihau na suahtheihna dingun, note hangin mizawng in hong kibawl tawm”* (2Cor. 8: 9) cihhi.

Zeisu’ hong hehpihna pen pahtakhuai in nialzawhloh hilai hi. Vantung ah hauhna tawh om tawntung khin hinapi; tuateng nusia in hong kizawn bawltawm hiau hi. Galilee lampi tungah leivui sik ngiatngiat in hong paisuk hi. *“Amah kiniamkhiat tawmzaw in singlamteh tung nangawn ah sih ding a ut hi”* (Phil. 2: 8).

Tuateng khempeuh pen eite’ **“hauh”** theihna ding, vantung ah Amah tawh i om khawm theihna dingin hong hihsak ngiat ahi hi. Eite in mawhna kidim leitung, thuaksiat na ciang khawngbek thei ihiah manin; Zeisu in vantung innpi nusia in, eite a ding a nunna piakhia dingin hong tuaksuk cihpen telbanzo mahmahlo lel hihang.

Rom. 16: 20; Galati 6: 18; Philippi 4: 23; leh 1Thess. 5: 28 simin. Bang a thupi thu hong hilh namukha hiam?

Paul in a laikhak sungah Zeisu’ hehpihna cipahpah hi. Kepkhi bangliang in *“Zeisu Christ’ hehpihna hangin ... mi tampitak tungah hong kipia”* (Rom. 5: 15) cihhi. Tua alian hehpihna angah mite in *“Zeisu hangin nungta”* (Rom. 5: 17) uhhi. 2Corinth sunga omsa mahbang in, Paul in zong, a laikhak dangte ah Zeisu’ hehpihna mah thupatna leh thu khupna mahin zangzel hi (Rom. 1: 7; Rom. 16: 20; 1Cor. 1: 3; 1Cor. 16: 23; Gal. 1: 3; Gal. 6: 18; Phil. 1: 2; Phil. 4: 23). Hih thulupi in ama’ lungsim sungah a kidim mahbang in Corinth mite lungsim sungah zong kidim saknuam hi.

Hihmah pen pawlpi khempeuh a dingin deihsak hi. Ephet mite kiangah acihdan lungngai lecin: *“Tatsatlo in i Topa Zeisu Christ a it tawntung mi khempeuh tungah hehpihna thupha hong tung taken”* (Eph. 6: 24). Tua a vultheilo itna sangin a kiamzaw itna tawh eite in Zeisu hong itsak nuam ding hiam? Piangtheilo hi. Paul in a deihsakna pen Zeisu’ *“hehpihna a tam semsem in, mi a tam semsem”* (2Cor. 4: 15) tungah a tunthei ding Paul deihna hi a, ama’ a dingin a kicin mahbangin amaute a dingin zong kicingsak nuam hi (2Cor. 12: 9).

Tuabang in Pasian’ hehpihna nang kiang hong tung cih ngaihsun in. Nang paukhiatsa leh sepsate in bangtawh kituak ding hiam? Tuate munah Pasian in hehpihna tawh bang hong pia zawsop hiam?

MONDAY

September 21

Pasian Hong Itna

“Topa Zeisu hong hehpihna, Topa Pasian’ hong itna leh Kha Siangtho hong khawlhkhawppihna in note khempeuh tungah om taken” (2Cor. 13: 14). Hih kammal teng tawh Paul in laikhak nihna thukhup hi. Thumgawm Pasian’ min a kizom in losuk diudeu a – Tapa, Pa leh Kha Siangtho cihbang ahi hi. Pasian pen koibang hi a, bangteng hong hihsak cihte pen hih thumgawm Pasian’ nasepna ahi hi.

John 3: 16, 17; Rom. 8: 37–39 leh 1John 4: 8–11 simin. Hihmun tengin Pasion’ hong itna koibang in hong hilh hiam?

.....

Khatna John 4: 8 in “*Pasion in itna hi*” cih. Itna cihlimlim Pasion’ omzia ahi hi. Pasion in khatbek a neihsun a Tapa eite a dingin sihna dongah hong piakkhiatna na panin itna theithe pan ihihlam John in thupi gen hi (*John 3: 16*). Hotkhiatna nasep sem dingin Pasion in Zeisu hong sawl hi (*John 3: 17*). Tua in hotkhiatna ngimna nasep sungah thukhat mah hipah hi (*Sawl. 3: 20, 21; 1 John 4: 10, 14*). Zeisu in Amah pen Apa’ sawl ahihlam lungdamthu sungah tamveipi mah pulaak hi (*Mate 10: 40; Maku 9: 37*).

A ciapteh huai mahmah in Paul in “*eite mawhna nei ihih laitak in eite a dingin Christ hong si ahih manin; Pasion in eite hong it mahmahna thu hong lahkkin hi*” (*Rom. 5: 8*) cih. Innkuan sung pasal leh zi, nulehpa leh tate, lawm ki itte ki itna nuamtak in kikhawlhna panin, Pasion’ hong itna muvat thei hihang. Tua Pasion hong itna mahpen Ama’ bawlsa nate lakpanin zong muthei hihang.

Tuatawh kizui in EGWhite in “*Pasion in itna hi*” cih laimal pen pakmom khempeuh tungah, lopapo khempeuh tungah kigelh hi. A ithuai vasate in huihlak ah amau awtawnh lasa uh a; ahoih anem dikdek pakpalhte in zong huihlak teng namtuisak huiheu hi. A hing dildial singtehte tawh a kidim singkungte in taam sungteng nangawn adopbawl mahmah Pa Pasion’ kepcinna leh Ama’ tate khempeuh lungnuam in a omsak nopna thu pulaak uhi” —*Steps to Christ*, p. 10.

Bangbang hitaleh, eima’ mawhthoihna dingin asihlawh dingin Pasion in a Tapa hong piakna sangin a lianzaw bangmah omlo hi. Eite a ding anuntakna piakhia dingin a Tapa Zeisu hong sawl manin, Pasion in ei hong itna kithei ta a: eite’n zong “*i sanggamte a dingin nuntakna piakngamna*” (*1John 3: 16*) tawh dawngthuk ding hihang.

Paul in Corinth mite ki pumkhat saknuam hi. Ahihhang, itna omlo in ki pumkhat theilo hi. Tuahang mahin amah’n “*itna in mite kipsak hi*” (*1Cor. 8: 1*), itna omkeileh na khempeuh amawkna hi (*1Cor. 13: 1–3*) ci in hilh hi. Tua ahih manin nasepna khempeuh itna tawh sepkul a (*1Cor. 16: 14*), tua itna pen *Pasion hong itna keekna* ahi hi.

Zeisu ngiatpen tawtung Pasion taktak hikei zenleh, Ama’ lungdamthu sungah bangteng i suplawh tam maw?

TUESDAY

September 22

Itna Pasion

Tanglai lawki hunlai in pasiante in mihingte it cih upna neilo uhhi. A pasiante uh pen ngongtat mahmah uh a, thoih in mai-et kulden cih. Laisiangtho sungah itna Pasion i muhkak zenzen pen thuthak thuhoih mahmah ahi hi. Paul’ hunlai in lamdang a kisak mahbang in, Paul in zong Pasion pen “*itna leh kilemna Pasion*” (*2Cor. 13: 11*) naci hi.

2Corinth 13: 11 simin. Hitengah a kigenthu panin bang lam-etna nancithe ding hiam? Himun in hong hilh thu koibangin na nuntakpih thei tammaw?

.....

“*Itna leh kilemna Pasion*” a cihpen thunih in kiletkhia thei hi. Athu masa pen, Pasion pen ‘*Pasion pen itna leh kilemna phungpi*’ hi. Athu nihna pen, Pasion pen *itna leh kilemna tawh kiciamteh thei* hi. Hih tegel kikal ah bangmah ngaihsut luat ding zong omlo lel hi. Itna leh kilemna tegel pen Pasion’ omzia theihtelna leh ciamtehna cih. Tua hang mahin Amah in itna leh kilemna hong pia hi.

Muntampi mahah Paul in Pasion pen “*thuakzawhna leh thahatna*” (*Rom. 15: 5*); ‘*lam-etna*’ (*Rom. 15: 13*); ‘*kilemna*’ (*Rom. 15: 33; Rom. 16: 20; 1Cor. 14: 33; Phil. 4: 9; 1Thess. 5: 23*); ‘*Hehpihna nei Pa*’ (*2Cor. 1: 3*), leh ‘*kisapna khempeuh hong huh Pasion*’ (*2Cor. 1: 3*) cih. Pasion pen hih thupha khempeuh bulpi ahi hi. A beingeilo hong itna tawh a hongpiak ahi hi.

“Kilemna Pasion” pen Laisiangtho sungah omkawikawi ahihhang, “itna Pasion” cihlian pen (2Cor. 13: 11) sungbek ah om ahih manin, eite’n zong thupibawl in lahkhiat kik ding a kisampen pen ahi hi.

Kamlet tampi takte in, Paul in itna Pasion acihna pen thumgawm Pasion thupha tawh a laikhak nihna thukhup hi. Tuabang in 2Cor. 13: 14 sungah ahihna hangin Pasion cihpen thum kigawm ahihnam hong tel lahna zong ahi hi.

“Hihtengah ‘Pasion’ cih kammal pen thum lakpan khat a dingin zang ahihhang, Zeisu leh Kha Siangtho pen a laikhakna khempueh a helkawikawi a; pawlpi masate in a muhuh thumgawm Pasion mahpen eite’n zong i muhtheihna dingin hong hatthotna zong a hihi. Paul in kiteltak in hong pulaak khin ahihnam a kiteihna dingin tua thumgawm Pasion pen ki tomlak in ‘Trinity’ a kicik ziauna zong; Paul in a gengen khit kum zalom khat khit bangciang hipan lailai hi”—Tom Wright, *Paul for Everyone: 2 Corinthians* (London: Society for Promoting Christian Knowledge, 2004), p. 148.

Eite in itna tawh kikhawl in thum a kigawm a nungta tawntung Pasion khat sung ah i um uhhi. Tua thumgawm Pasion in ei hong it a, eite zong khatlehkhat ki itna tawh Amau’ thum ki-itna hong lengkik saknuam hi.

WEDNESDAY

September 23

Kha Siangtho Hong Khawlhpihna

Zeisu hong hehpihna in Pasion hong itna hong lakkhia bekthamlo, tua itna in a muibut theihna dingin Kha Siangtho khawlhpihna hong paipih lailai hi. Tua laitak mahin khawlhpihna in zong Pasion itna sung mahah zungkha leuleu hi. Tua ahih manin itna a omkei nakleh khawlhpihna zong omlo pahhi. Paul mahin “*Note Christ tawh kipawl in na nuntakna uh in note hong thahatsak hi. Kha Siangtho tawh kikhawl in, khatleh khat ki hehpih in dikna na kibawl uhhi. Tua ahih manin kei tawh ngaihsutna kibangin note khat lehkhat ki it in, lungsim kituak in*

na omna uhtawh keima lungdamna nahong cingtaaksak na dingin ka hong kun hi” (Phil. 2: 1, 2).

Pawlkhat in, Kha Siangtho cihpen, thahatna, huzaap peuh hilel hi a cihuh hang maan hetlo hi. A tawpna ah, Paul in, Pa leh Tapa tegel pen **thahatna** vangliatna bangle in banghang in hong pulaak hiding hiam? Khatna nei vetlo lel hi. Pa leh Tapa tegel in a mimal in kikhawlh khawm uh mahbang (2Cor. 1: 3; 2Cor. 11: 31) un, Kha Siangtho in hong mimal in hong khawlhpihna in, Amah pen mimal in om cihna ahi hi (Rom. 8:15, 16; John 14: 16, 17, 26; John 15: 26).

“Kha Siangtho tawh kikhawlhna” (Phil. 2: 1) pen nammih in kitelthei hi. Kha Siangtho tungtawn in khatleh khat kikhawlhkhawpna leh, Kha Siangtho mahmah tawh ki khawlhkhawpna ahi hi. Laisiangtho teite pawlkhat bangin hihpen khatlehkhat cihna hilo hi a ci zong om uhhi. Bangpeuh ici zongin, khatlehkhat kikhawlh theihna pen Kha Siangtho tawh kikhawlhna pan mahin a kingah ahi hi.

1Cor. 2: 10, 11; 1Cor. 3: 16; 1Cor. 12: 11; leh 2Cor. 3: 6, 17 simin. Paul in Corinth mite tungah Kha Siangtho’ thu bangtang hihlh hiam?

Paul in Kha Siangtho nasepna a gen ding tampi om hi. Corinth Masa leh Nihna sungah Kha Siangtho cih sawmli vei gen hi. Kha Siangtho in pawlpi phattuumna piang sak (1Cor. 14: 12) a, mission nasepna ah mite thahatsak (1Cor. 2: 4, 5), Pasion’ thusimte eitung ah hong kilanghsak (1Cor. 2: 10, 11 in, eite hong hillh (1Cor. 2: 13), eite sungah hong teeng (1Cor. 3: 16; 1Cor. 6: 19), eite dikna dingin Christ tawh hong sepsak (1Cor. 6: 11), pawlpi tungah kha’ silpiakte guan (1Cor. 12–14), a hotkhiat ngah dingin eite hong ciamteh (2Cor. 1: 22), mihing lungsim sungah thukham hong gelhsak (2Cor. 3: 3), Christ sungah nunnathak hong neisak (2 Cor. 3: 6) in mawhna pan hong khahkhia hi (2 Cor. 3: 17). A taktak in Kha Siangtho lotawh eite nungta theilo hihang.

Kha Siangtho in Pasion taktak ahihna theihcianna pen eite a ding Pasion hong itna i matzawm na'ng in banghang in thupi thei hiam?

Paul' telcianna dampen, Pasion cih thum kigawm ciangbek hilo, tua thum kigawm tengin Lutang Pasion hi uh a, ei hong hotkhiatna ding maapang khawm uhhi (*Eph. 1: 3, 13, 14*). Ephet laikhak sungah Paul in, Pa' cingtaakna (*Eph. 3: 19*), Tapa' cingtaakna (*Eph. 4: 13*), leh Kha Siangtho' cingtaakna (*Eph. 5: 18*) tawh eite kidim dingin hong sawllai hi.

THURSDAY

September 24

Thumgawm Pasion Eima aa

2Corinth 13: 14 sim leng, hehpihna bulpi in Christ, itna bulpi Pasion leh kikhawlhkhawp theihna bulpi Kha Siangtho hi cihtheih na'ng thu a om hang, thumaan tawh kigamla khollo lel hi.

1Corinth 1: 3, 4, 9; 1Cor. 10: 16; 2Cor. 1: 2, 12; Rom. 8: 35; Rom. 15: 30; Galati 2: 20; leh Ephet 3: 19 simin. Hihmun in hehpihna, itna leh khawlhpihna pen Thumgawm Pasion tawh koibang in kizom sak hiam?

Pa, Tapa leh Kha Siangtho te in eite hotkhiatna dingin nasemkhawm uhhi. Hehpih na, itna leh khawlhpihna in tua Thumgawm Pasion kiang panin hong luangkha ahi hi. Amau khatsim in hotkhiatna tangthu sungah maapanna khatciat nei uhhi. Paul in tuathu thei khinkhian in ama' laikhakna sungah thupi bawl mahmah hi. Etpak dingin, hotkhiatna ngimmna pen Galati 4: 4–6 sungah, sumbawlna kammal kician khat tawh tehkaak in, hot- khiatna sungah a Thum mahun a maapanna uh teng pulaak sak hi.

Pa Pasion in Zeisu sawl cihciangin, tua ngimmna a bulpi in Pa cihna (*Gal. 4: 4*) ahi hi. Tapa in numei sungpan in hong piang (*Gal. 4: 4*)

cihpen sunglutna tawh tanglai kamciam khat a picinna hi (*Pian. 3: 15*). Tapa in zong eite hong tankhia in, Satan in hong khemnasa mun ngei mahah Pa tawh kikhawlkik thei dingin hong koihkik hi (*Pian. 3: 5*).

Paul' laikhak dangdangte sungah Thumgawm Pasion thu tampi takmah omlai hi. A thum mahun semkhawm dimdiam in mission sem dingin pawlpi kipsak (*1 Cor. 12: 4–6*), khalam thahatna hong guan hi (*Eph. 3: 14–19*). Tuapen, Thumgawm Pasion' kikhawlh theihna a kipsak kipumkhatna tawh akibang pumkhatna khatmah ahi hi (*Eph. 4: 4–6*).

Paul' telcianna dampen, Pasion cih thum kigawm ciangbek hilo, tua thum kigawm tengin Lutang Pasion hi uh a, ei hong hotkhiatna ding maapang khawm uhhi (*Eph. 1: 3, 13, 14*). Ephet laikhak sungah Paul in, Pa' cingtaakna (*Eph. 3: 19*), Tapa' cingtaakna (*Eph. 4: 13*), leh Kha Siangtho' cingtaakna (*Eph. 5: 18*) tawh eite kidim dingin hong sawllai hi.

Corinth mite tungah a laikhak thukhupna sungah (*2Cor. 13: 14*) Paul in, a hoih zaw tham ding thukhupna khat bawl a – vannuaibuppi vangliatna thum, vantung vangliat na thum kigawmna in eite tawh tu leh a tawntung omkhawm dingin kamciam khat pia hi.

Pawlpi mite kikhawlh theihna in Lutang Pasion kikhawlh theihna koibang in limpua thei ding hiam?

FRIDAY

September 25

Ngaihsutbeh Ding: Ellen G. White, "Let Not Your Heart Be Troubled" pp. 662–680, in *The Desire of Ages*.

"Zeisu Christ' hong hehpihna bekma in suang-lungtang panin sa-lungtang ah hong kheelsak thei a, Pasion a dingin hong nungta saktei hi. Mihing in kha peuhma thu tang sakteilo hi. Gamtat hoihlo natna pen Zato Mangpipa lobuang in damask theilo uh hi. A sangpen

vantung' silpiak, Pa in a neihsun, hehpihna leh thumaan tawh a kidimpa bekin a mangthang te honkhia thei bek hi"—EGWhite, *The Signs of the Times*, May 2, 1892.

“Pasian in ki itna hi’ 1 John 4: 16. Ama’ omzia leh thukham in ki itna hi. Tua bang hikhinzo in hilailai ding hi. ‘Asang, alian, a nungta tawntung pa’ (Isaiah 57: 15); ‘a om tawntung pa’ (Habakkuk 3: 6); ‘a kikheel ngeilo, a kihei hangin khua zong mial tuanlo’ (James 1: 17) hi.

Piansak sate kipulaakna vang khempeuh in mong neilo itna vive ahi hi. Pasian uk-zawhna in piansaksa khempeuh a dingin thupha kicinsakna ahi hi. Sialehpha kidona lianpi’ tangthu sungah, vantung panin hong kipat laipek panin, langdona khempeuh a ki hepkiat a, mawhna khempeuh a kisuksiat siang ni ciangdong in, a kikheel ngeilo Pasian’ hong itna lahkhiatna hi den ding hi”—EGWhite, *Patriarchs and Prophets*, p. 33.

“Kha Siangtho in zong, Pa Pasian mahbang in a mi in omcih theih ding ahi hi. Kha Siangtho in zong pumpi mahtawh om hikeileh, eima’ khate in zong Pasian’ tate ahih lam teci hong pansak theilo ding hi. Amah zong siangtho Pasian hikeileh, Pasian lungsim sunga thusimte mukhia theilo ding hi”—Ellen G. White, *The Faith I Live By*, p. 52.

“Vantungah thumgawm Pasian anungta mimal thum om uhhi. Hih vangliatna thumteng amin uhtawh pulaak leng; Pa, Tapa leh Kha Siangtho hi a, Christ a sang mite ki tuiphumna, Christ sung mahah nundan thak a nungta nuamte tawh hih vanglian thumteng in naseppih in panpih ding hi”—Ellen G. White, *Evangelism*, p. 615.

Kikupding Dotnate:

1. Mi tampi’n a theih uh “Amazing Grace” cih la khat om hi. Zeisu hong hehpihna in bang a lamdang om hiam?

2. Tapa taimang gentehna sungah Pasian hong itna lahkhiatna hoih mahmah khat om hi. Hih gentehna sunga a pa in itna nei pa abihna koibangin kithei thei hiam?

3. Khuatual pawlpi te sungah “Kha Siangtho tawh kikhawlh khawpna” om takpi cih koibang in lahkha thei ding hiam?

ZING BIAKPIAKNAJuly, 2026

1. Wednesday	John	2:24
2. Thursday	Daniel	5:25
3. Friday	2 Timothy	3:12
4. Sabbath	Galatians	4:4
5. Sunday	Isaiah	55:9
6. Monday	1Peter	2:4,5
7. Tuesday	Ephesians	5:1
8. Wednesday	John	13:36
9. Thursday	John	17:17
10. Friday	1Corinthians	1:30
11. Sabbath	John	16:24
12. Sunday	John	5:32
13. Monday	Isaiah	33:22
14. Tuesday	Luke	9:56
15. Wednesday	Matthew	26:39
16. Thursday	Matthew	13:55
17. Friday	John	15:9
18. Sabbath	John	1:12
19. Sunday	2Corinthians	5:10
20. Monday	Late	118:22
21. Tuesday	Romans	11:33
22. Wednesday	Ezekiel	33:8
23. Thursday	Zechariah	6:12
24. Friday	Psalm	44:26
25. Sabbath	Matthew	5:16
26. Sunday	Hebrews	9:11
27. Monday	Mark	15:37
28. Tuesday	Ephesians	1:22
29. Wednesday	Matthew	6:19
30. Thursday	Isaiah	66:2
31. Friday	Isaiah	49:16

ZING BIAKPIAKNAAugust, 2026

1. Sabbath	James	1:5
2. Sunday	Mark	4:2
3. Monday	Sawltak	26:28
4. Tuesday	Matthew	5:17
5. Wednesday	2Timothy	3:16
6. Thursday	2Corinthians	6:14
7. Friday	Matthew	21:38
8. Sabbath	Mangmuhna	1:7
9. Sunday	Filipi	2:7
10. Monday	1Corinthians	15:23
11. Tuesday	Kolose	1:13
12. Wednesday	Isaiah	53:4
13. Thursday	Matthew	19:17
14. Friday	Late	138:8
15. Sabbath	Matthew	8:17
16. Sunday	1Timothy	2:5
17. Monday	1Peter	1:20
18. Tuesday	Gamlak Vakna	13:33
19. Wednesday	John	18:37
20. Thursday	Matthew	4:16
21. Friday	1John	1:6
22. Sabbath	Jeremiah	32:17
23. Sunday	John	6:38
24. Monday	Late	103:8
25. Tuesday	Late	119:105
26. Wednesday	Mangmuhna	3:18
27. Thursday	Zechariah	9:11,12
28. Friday	Gamlak Vakna	22:12
29. Sabbath	Late	34:17
30. Sunday	Matthew	26:53
31. Monday	Jeremiah	8:22

ZING BIAKPIAKNASeptember, 2026

1.	Tuesday	Luke	18:13
2.	Wednesday	2Timothy	1:12
3.	Thursday	Sawtak	10:38
4.	Friday	1 John	3:1
5.	S'abbath	Late	25:11
6.	Sunday	Hebrews	2:9
7.	Monday	Matthew	3:1,2
8.	Tuesday	Isaiah	40:11
9.	Wednesday	Matthew	13:3
10.	Thursday	Paikhiatna	12:7
11.	Friday	1Corinthians	1:23
12.	Sabbath	1Corinthians	1:13
13.	Sunday	Thuhilhkikna	32:2
14.	Monday	Paunak	19:23
15.	Tuesday	Matthew	2:16
16.	Wednesday	Matthew	25:8
17.	Thursday	Jeremiah	23:6
18.	Friday	Late	111:3
19.	Sabbath	Ephesians	5:1,2
20.	Sunday	Matthew	13:23
21.	Monday	Johan	2:11
22.	Tuesday	2Samuel	22:47
23.	Wednesday	Psalms	25:4
24.	Thursday	John	7:46
25.	Friday	Luke	1:32
26.	Sabbath	Johan	1:26
27.	Sunday	Mangmuhna	3:18
28.	Monday	Zechariah	3:2
29.	Tuesday	Johan	19:30
30.	Wednesday	Zechariah	14:9